

萬 有 文 庫

第 二 集 七 百 種


王 雲 五 主 編

湖 海 詩 傳

(三)

王 昶 輯

商 務 印 書 館 發 行



湖海詩傳

(三)

王昶輯

國學基本叢書

湖海詩傳卷十三

梁敦書

字幼循，號冲泉，錢塘人。乾隆十二年舉人，官工部侍郎。

蒲謁山房詩話：冲泉爲文莊公仲子，嗜學好古，詩得文莊家學，抒寫性靈，并深工力，其服官啟歷中外，懋著廉聲。當乘臬湖南時，適梁文定公爲中丞，拊循之暇，修舉廢墜，潭州鐵佛寺舊有鐵柱，周刻陀羅尼咒，爲淳化元年所鐫，久埋土中，因修寺發土得之，嘗搨以遺余，余爲作詩以記其事。

蓬壺朝旭爲湯少光祿先甲賦文石

我公等身富著述，書法恰與光祿匹。餘事風流水石閒，到處搜羅不失一。文旌近自思唐歸，攜石滿篋生光輝。過從主與客成二，冰釐清異爐烟霏。或如江上漁磯濺，剩有垂綸落一片。或如峽內鐵堂開，何處尋詩人對面。其餘衆美難具陳，就中一石何玢璠。海天一色白鳥漾，絕壁拔起凌蒼旻。青黛模糊溼欲瀉，紅雲繚繞光紛射。我疑火炎昆山巔，又擬夢游赤壁下。公言此是蓬壺尊，初升朝旭蒸天關。小山旁列附庸耳，餘霞倒映扶桑暎。始皇求仙徒浪好，博望乘槎恐虛蹈。壺中九華昔縱傳，海上三山茲可到。千態萬象徑寸中，一覽曷谷馮夷束。縮地有術縮本畫，蛟龍潛伏雲氣通。是時庚暑方揮汗，嵐氣波光動几案。清絕茶甌又酒甌，衣袖生寒忘日旰。前年曾作萬勝游，題品自謂窮巖幽。今來觀止氣已懾，砒砒詎與球琳儔。

公將旋京。致使命。敦也。瓜期備朝請。問字還當借異書。玩石時從養本性。

廖景文

字覲揚。號古檀。婁縣人。居青浦。乾隆十二年舉人。官合肥知縣。

自寒巖靈峯歷香亭

春風散晴和。花塢繁桃杏。登彼千仞岡。澄潭鑒鬢影。石陷地自偏。雲扃境何靜。躡屐力不勝。拖筇上煙艇。
泝流舟行遲。幽趣乃全領。灣環蝦尾洲。款乃穿溟滓。雲碓閒煙扉。淡若邨墟景。萬卷書無存。舊有萬卷一樓遺址
川流自永。清磬響林皋。斜陽銜峯頂。誓欲窮仙源。茫然凌萬頃。

虎邱玉茗軒卽事

山館依巖徑。紅欄積翠分。花寒桐院雨。茶沸石泉雲。倚竹悄無語。開簾忽見君。殷勤同惜別。芳訊幾時聞。
感舊二絕

遺真一曲譜真真。舊事傳來墨暈新。物換星移家樂散。十年春恨細如塵。
鶴放孤山舉手招。綠迷秋浦水迢迢。何時重訪貞姬墓。紅帽青衫過六橋。

舒城卽事

暮籬煙嵐到眼昏。龍眠居士迹猶存。畫眉聲裏穿雲去。碧嶂蒼松別一邨。

寄石門

年來心跡冷如冰。玉版禪參大小乘。今日板輿過竹院。白雲深處擁寒燈。
尙平事了一身閒。扶病衝寒到此閒。竹杖芒屨人莫笑。出山原是爲看山。

過米海嶽墓

寺門斜對最高峯。梵宇蒼涼暮靄濃。惆悵襄陽埋玉後。更無人倚十三松。

王鳳儀

字廷和。號審淵。太倉人。乾隆十二年舉人。官至西安鹽道。

蒲楊山房詩話。廷和爲孝言巡撫之孫。和州進濟子。與弟嶸谷皆能傳其家畫學。廷和在蜀。雖從制軍督運汶川。而人求其翰墨者益衆。山腰谷腳。行帳一區。草束米囊之外。絹素盈牀。廷和揮灑應之。目取鳥道蠶叢。作爲畫本。閒以吟哦。故所作益奇。凡橫戈躍馬之上。見者都爲失笑。

閒居有作

幽棲罕人事。當晝掩籬門。所得在靜理。無論城市喧。虛庭滴深翠。遶屋秋苔痕。清風了無意。惠然披我軒。
卽事生悟悅。真趣時復存。古琴再三弄。可以滌塵煩。將爲洛生詠。曲盡已忘言。

食菜二十韻

久客遠鄉風。每食念時藪。湖蓴及山筍。吳餉杏難續。北方有異菜。佳者出安肅。秋畦嫩甲齊。茸茸已盈握。

肥霜飽根菜。燦然黃且綠。巡圃割沙泥。連車汗烏犢。市販擔新柔。園官薦香熟。先生藜莧腸。清餓食無肉。朝旭照荒廚。闌干餘苜蓿。忽欣食指動。觀頤得所欲。一把已堆盤。百錢行滿屋。松薪燒破甑。浮浮煮黃玉。妻孥勸加餐。放箸自捫腹。其餘壓老盆。御冬誇旨蓄。得飽卽爲珍。底用窮水陸。適口味自長。寡嗜願易足。矧此比醍醐。天子亦已篤。元修名旣喜。信民言可讀。逝將學灌園。芳蔬手親斲。

鐵畫詩並序

蕪湖鐵工湯鵬。能鍛鐵作畫。凡花卉草蟲山水屏障。無不精妙。其山水巨幅。必曠年乃成。世不多見。見者皆徑尺小景耳。好事者爭購之。範以木懸諸壁間。或合四面以成一燈。亦名鐵燈。每幅輒值數金。且不易得。湯旣歿。他工效爲之。終不能逮。蓋錘鑪之巧。前後所無也。同年山舟梁編修作詩見示。賦此爲和。

良工使鐵如使筆。萬象紛紛躍冶出。竈晴夜照昆吾寒。碎翦元金若無質。隔牆鼓鞀疑有神。洪鑪百轉燒酣春。春枝婀娜春蟲撲。沒骨新翻鏤銀簇。或爲巨嶂窮刻鏤。十日一石猶嫌促。界欄銜壁懸玲瓏。清光飛射秋屏空。連臺四照九微轉。蘭膏掩映星星紅。雲烟過眼千金換。那及青瓜鍊烏炭。巧匠爭傳丁緩名。寫生欲學嵇康鍛。梅根舊冶尙輝輝。不比當時老畫師。若教妙畫通靈去。雷兩應隨龍劍飛。

題畫時在灌縣桃關

少不如上書請纓終子雲。健不如射生飲血曹將軍。胡爲短衣曼纓走萬里。入山更與羣山羣。蒼烟斷空白日匿。山勢杳與天無極。鳥道春盤一綫青。龍湫晝閉重陰黑。平生五嶽羅心胸。蠟屐欲躡松喬蹤。猿啼鶴唳不到處。落墨忽掃西南峯。高堂素壁坐蕭瑟。絕壑時聞風雨疾。莫指丹青當臥遊。雲間雪外方籌筆。

塞下曲

萬馬出雲中。三邊戍草空。鐵衣春疊雪。玉帳夜翻風。健卒能橫槊。孤兒解帶弓。漢家方遠略。不敢薄從戎。空磧寒雲外。連營積雪閒。風翎時飲石。火旆欲燒山。駝馬收胡幕。金繒出漢關。璽書猶未報。大將在闔顏。新賜單于宴。前驅淨塞氛。將開五屬國。更調六將軍。飛檄隨邊鳥。翻營逼陣雲。金人初入獻。驃騎已邀勳。

沙市卽事時余權判荊州官廨在沙市距府治十五里

憔悴南冠久滯淫。渚宮花月劇駸駸。官居近野諸田事。蠻語隨人變土音。故國萑鱸千里夢。虛堂琴鶴十年心。焚香執卷堪消日。退食還應愧俸金。

題畫

溪光黯黯常籠樹。山氣空濛不辨雲。還似江南梅熟候。綠陰如幕雨紛紛。蒼茫風景黯江天。竹杖芒屨入暮烟。客思蒲帆秋水外。詩情楓樹板橋邊。

題查儉堂觀察北征集後

玉壘金城路透迤。鼓鼙聲裏向關河。鞭絲帽影堂堂去。又聽西風出塞歌。
雪花六月犯貂裘。塞北風雲接素秋。行盡蜀山七百里。亂霞黃葉是松州。
玉門誰更繼班超。老去戎軒髻半彫。卻喜歸來笳鼓競。載將詩卷過紅橋。
橐筆年來餽肉生。新詩百讀感商聲。短衣匹馬吾猶健。恨不從公作騎兵。

橋在松州

王秉韜

字含谿。漢軍鑲紅旗人。乾隆十二年舉人。官至東河總督。有含谿詩草。

宿松歸塘

烏雀棲烟樹。牛羊下夕原。危峯疑阻路。曲逕又通邨。雨意連山暗。蟲聲徹夜喧。數程已不遠。十度月黃昏。

晚舟

寒林有宿雅。莫鶴欲成霞。火露漁舟暗。星懸嶺樹斜。板橋通野寺。草舍集人家。爲問停橈處。猶云驛路賒。

邵齊熊

字松阿。昭文人。乾隆十二年舉人。十九年賜中書。有隱几山房詩鈔。

舟次夜雨同江楓原蔣秋涇家兄叔一清話用少陵宿贊公土室韻

古岸繫扁舟。雨滴宵逾靜。蕭蕭篷背風。寒燈淒孤影。促座興偏生。清譚夕以永。雪梨分玉乳。鬪茗試龍井。

忘機意自得。灑脫性所秉。聽雨既愜願。對牀愛夜迴。二客況佳士。清風溯箕穎。平生喜交遊。一笑萬慮屏。安得洗寒空。素月出高嶺。回首望燕臺。雲沒西山頂。

舟次天津

南歸多逸興。沽上問青帘。落日大堤晚。深林野水添。津雲迷估舶。海月動秋檐。空外寒砧急。誰家女手織。

次杜林先生題壁原韻贈至上人

一桁青山倚翠筠。山空省得是閒身。濤聲欲墮松閒月。雲逕欣逢世外人。勝處烟霞無定相。靜中華木不關春。禪心試看空潭影。魚躍萍開總見真。

梁國治

字階平。號瑤峯。會稽人。乾隆十三年殿試第一人。及第。官至東閣大學士。謚文定。

過觀音巖

石壁立水外。風濤浩洶洶。何年巨靈劈。幻此金蓮湧。給訝豁幽竇。液瀝垂乳漚。飛空上危梯。萬象羅森聳。澄潭空心顏。倒景羣山拱。江帆日暮搖。回首蒼烟重。一聲清磬鳴。上界香雲擁。

過港口驛次雲巖侍讀韻

歇心隨處足。堂有歇心處三大字。是董思白督楚學時書。今非其舊矣。小憩息羣喧。不見銀鉤舊。誰同貝葉翻。萬年留寶刹。前有萬年橋寺。因以

名。五字和慈恩。威歲星輅過溪聲客到門。

謳吟將楚曲。要眇望湘烟。永夜南樓月。懷人北渚船。前塵蓬梗合。客夢藕絲連。我已忘情者。題詩任晏眠。

平定城樓天衢閣成詩以紀之

飛閣浮空接漢槎。冠山濃翠挹晨霞。關河榆柳連三月。烟火樓臺出萬家。幾度嚴城籌保障。偶從賢守話桑麻。蓬瀛天際塵難到。指點人寰路未賒。

汪廷瓊

字衡玉。號持齋。鎮洋人。乾隆十三年殿試第三人及第。官至工部侍郎。有賜書堂集。

題蔡葛山先生觀海圖

蒲昌引度絡西北。百谷分道趨東南。六鼈最屬拱地軸。離坎應位陰陽含。閩山磅礴結霞嶠。辟易金廈千峯嵐。就中太武更弁冕。嵯峨嶺巔羅諸男。天雞踞且閭闔啟。博桑高射蓮華龕。此是先生讀書處。十年月窟天根探。罡風卉歛雜魚梵。匡牀靜課爐香飴。壇前萬象露假詭。馬銜矐睖虬螭驂。臨崖振衣一縱目。近取遠納歸淵涵。畫圖寫景兼寫臆。神運直使鯤鵬慙。我昔向若躡旗鼓。名山卻步但解捫籃窺。至今落筆謝蠡勺。望洋欲語徒嬰媿。

迎鑾赴榆關宿永平試院見舊刻三松歌因和其韻

迎鑾道出榆關東。寒飈已戒律未冬。平州官廨暮投宿。重門授鑰塵猶封。佶曲磴路入奧窔。山堂突兀當巖嵒。堂前堂後雲影冪。舉頭瞥見三喬松。徘徊庭除夜霧合。未遑掃石披蒙茸。詰旦整冠爲肅揖。千尋古幹何鬱蔥。是時曉日吐光采。金支翠葆扶童童。上拂華蓋蔭曾宇。下拖霏霧連崇墉。昔賢駐節發高唱。遙想振筆凌長風。我今銜命歷畿甸。輶軒北指經盧龍。夷齊古廟在咫尺。仰止孤竹欽遺蹤。屈蟠之叟雖未識。夷齊廟中有屈蟠松。以此例彼將毋同。寒垣雪早沒山骨。停車難覓霜林紅。惟有虬姿轉蒼翠。天畱藻寫元冥窮。岑樓忽落步虛響。仰視濤籟翻琤鏜。乃知德產厚雨露。因篤直擬人材鍾。豈容樵牧溷斤採。要待匠石勤磨礪。苦心造就始適用。抑高舉下猶張弓。會當奇文副嘉觀。磊落翹秀開心胸。詩成策馬尋古道。灤河繞岸聞山鐘。

素心蘭

花葉澹如此。一庭風露深。炎埃吹不到。空谷杏難尋。潔白笙詩意。寂寥琴操音。虛堂冰鑑在。晤對有同心。

扈從木蘭曉發都門

金枝肄武天家法。侍從班輪驂乘人。風襲弓衣初滌暑。露零車轡不飛塵。平橋沙軟駝蹄淺。馳道陰濃馬步馴。北望雲壯猶六舍。懷恩感遇倍駢駢。

題皇六子燕坐圖次韻

花香鳥語有禪蹤。靜掃蒲團簾影重。小憩使參尊勝座。無言兼息辯才鋒。庭前苔長聽經石。屋角雲移作禮松。結習未除凡骨在。一瓶慙伴六時鐘。

奉命祭告東嶽恭紀

城闕更籌肅麗譙。廟庭燎火徹通宵。天闈誅蕩趨重殿。神陞森嚴備百寮。盛德大生羣望長。明禋晉舉萬靈朝。春巡鑾輅申昭假。早有繁禧集慶霄。

冬夜朱石君同年招飲新居有詩索和走筆奉簡

蘭堂夜飲舊坊東。新居在舊宅稍東老遇歡場故態同。屢索三升新釀白。慙澆十丈軟塵紅。盍簪落落星低曙。飛

轍匆匆燭散風。早貴如君誰得比。年華猶是日方中。

朱珪

字石君。大興人。乾隆十三年進士。今官戶部尚書協辦大學士。

蒲褐山房詩話。參政兄弟少入翰林。即以高文典冊。照耀蓬萊華蓋之間。為蘇林所仰。垂三十年。然其尚名教。敦清節。世或未盡知也。任山西布政使。司以方正為巡撫。所嫌。謂其不諳吏治。由是仍改官翰林。久之。上深知其公正廉潔。擢用為巡撫。入長吏戶二部。而參政愛才。下士以此望而趨之。昔韓忠獻為中正所歸。而於元祐諸賢。未嘗偏徇。葉文忠為清流。眉目而于東林君子。亦無私好。參政益深得此意者。也。

己卯仲冬奉命祭告南嶽定興道中月夜觀雪

皎月下積雪。竟空生白烟。氣寒清無風。涕唾瑋冰堅。圓靈際大地。凍光一色連。河漢失蕩漾。列星收精躔。雪月本同居。一鏡照雙妍。羿妃與玉女。交手拍皓肩。旁舞萬靈娥。助笑開瑳然。戲吐玉池水。萬頃瓊瑤田。夜行不可耐。絕景誰當傳。

喜雨呈舅氏冀寧公

司牧頽上泚。農夫眼中淚。齋心哀龍公。迸此雨脚脆。久愁雲慘澹。暫訝珠瑣碎。綿綿聽簷溜。欲斷屢驚悸。遙知四郊外。點點八芒穗。行恆交雲根。汾漳欲潤氣。居然生枯槁。不忍嗜薪蕪。深慚肉食鄙。靜念糠粃悴。澗句謹齋廚。頗狎菜根味。行當賽雨師。歌舞薦祈岬。寄聲白水翁。杜詩白水見舅氏清宴許我醉。

蒙恩復入翰林竹君兄以詩見賀奉答

方材宜軫圓宜轂。散樗亦受膏霖沐。車行平地穩栖雞。巢近高天收野鷺。十年悔不熟讀書。一枕何當淨揩目。君如退之苦詰盤。我學方平甘鞭扑。布帆無恙到三山。肉芝可采輕九牧。羨君高議開石渠。坐令玉堂生暖暈。子雲口吃頌鴟夷。不能爲舌聊爲腹。偶作劉萐妻。擘擘深辨頡書神。鬼哭東坡有弟何敢望。太邱必世應知慝。漫誇屋上星蔚然。且聽窻前雨滲漉。

富陽道中次黃左田韻

之江晴湖搖空蒼。蔚藍倒影涵渺茫。暗潮漸遠沙岸靜。碧玉簪髻菱花妝。山枝誰唱思公子。鷗浴儵翻亦

如此卅年老我七往還巖頂桐君青不死。昨來拏棹錢唐東。鑑湖鄞江風景同。釣臺七里最幽絕。一重一掩探無窮。髭霜齒抗慙學道。山鬼有靈顧我笑。御風貫月更何人。如此江山竟空到。連宵月出華滿江。金波蕩漾流珠降。眼酣心醉玩不得。清夢不隔蓬萊窻。同游初平真妙器。餐霞已識空蹄乘。然犀照水漫相矜。靜鏡浮烟我何意。上灘邪許篙力柔。下灘風動箭射眸。從流順逆各自努。一盞江水長油油。

游半山觀梅花

半山山後神道路。廿里梅花香潑霧。交林夾徑行愈深。萬隊霓裳擁靈媠。散花天姝香國來。優曇蓀蔔彌天篩。眼根鼻觀住不得。八識淨澈庵摩開。江南鄧尉香雪海。莆田凌厝名妃在。洞天咫尺知者希。吳儂爭艷天桃蕾。盤陀居士偷學閒。目成萬冶甘孤鰥。傭兒生長依冰玉。斛量梅子收梅田。可憐香色多傾國。雪霽暉移光欲泐。一篙回首百徘徊。夢魂飛徧琉璃域。

謁東坡亭卽公白鶴峯故居在歸善縣城北

入州督罷嶺外游。三年故客仍淹留。合江嘉祐未黔突。買山更上白鶴頭。我行殘臘月正望。百七十里勇未休。惠守導我謁祠蹟。北江繞戶開軒幽。山僧指觀百尺井。當年手鑿勿幕收。嗟公丙子作重九。朝霞已卷孤光秋。明年又復渡海去。逆旅電逝真虛舟。大賢所憩人愛樹。況此鴻爪了可求。公神跨鶴返奎斗。萬世俎豆同魯鄒。如公遷謫尚不朽。而我擁節慚鞠謀。西隣咫尺勾漏令。東望拱揖韓潮州。他時誰識盤陀

老。竭來此路停軒驕。

舟行

粵人送我五嶺北。皖人迎我三水南。我身浮雲寄空曠。誰將逝影求江潭。三年種樹未翦愛。連宵好雨宜稼甘。舟行遲遲聽襖鷺。岸沙漠漠紆烟嵐。吏民猶見古直道。祝我此去當迴驂。我謝邦人情豈忍。力微恩重才非堪。蠻風蜚雨費調燮。海鯨島鱷難驅戡。書生何有銅鑄柱。宦跡或可山留龕。食猶戒肉鐘敢疊。飲能敵水泉焉貪。皖山江月吾肺腑。昔年餘澤猶津涵。道傍父老喜露冕。燈前竹馬歌趨趲。他時記我竭來處。桑下已宿浮屠三。

六月廿七日竹君先兄忌

最了無生旨。難忘不朽名。文章金薤重。富貴白衣輕。芳樹空連理。青山酌一觥。相知論海內。作誌愧欒城。

詠顏平原

妖星照野海飛瀾。灑血何人首築壇。西望常山舌不爛。南流睢水齒先寒。論功千載汾陽郭。轉敗三齊卽墨單。忠義神仙同脫屣。漫將尸解擬劉安。或疑公好神仙。不知公真不死矣。

馮浩

字養吾。號孟亭。桐鄉人。乾隆十三年進士。官監察御史。有孟亭詩文集。

兕觥歸趙一十六韻前明萬歷初常熱趙文毅官檢討劾張江陵奪情廷杖除名歛許

文毅拜杖時陰雷動天異編修武進吳公中行首疏同杖時稱吳趙史藪墮肉腊而藏中閨凝血淚
吳傳云杖時陰雲四起天鼓大震故據以為言

夫人腊腊兕觥為餞贈銘勒廿四字前輩穎陽生論交初未貳款云穎陽生許國門戶此萌芽班聯紛擊刺

禍烈人凋殘運窮國殄瘁大端垂史書遺物綴傳記推移二百年復始歸苗嗣追溯收儲家六七屢遷地

朋來競捧玩酌彼或酣醉斯須設輕脫非意驚翻墜諦觀古色深沈黝溢溫粹感歎昔諸公一一神所庇

拜藏欽祖澤禋祀守宗器舊侶玉杯亡許文穆鑄玉杯贈吳公今不知所在江東無有二恆山竝高門忠毅鐵如意高邑趙忠毅物

以同姓敬及之

舟中喜見惠山

青山斗入空船裏山氣薄人襟袖起此身坐臥此山中何曾限卻衣帶水山頭晴雲作絮飛山下落木山
風吹復開水面寫山色煙鬢隱現時可窺鴛鴦湖邊無寸碧秋蟀春鷗思蠟屐山靈莫笑行客忙老去方
宜弄泉石

于忠肅公墓

九廟將傾隻手當旋令中外固金湯濟時遠勝唐靈武失策羞稱宋靖康絕塞居然生馬角元勳何罪死
魚腸氛霾披豁青霄朗高揭丹心日月光

錢汝誠

字立之。號東麓。嘉興人。文端公子。乾隆十三年進士。官至刑部侍郎。

敬業堂山躑躅盛開。主人招飲。花下詩以紀之。

趨庭指點說兒時。今夕歡同杖履隨。曾是高曾遺手澤。能無淚灑角弓詩。
萬株火齊萬玫瑰。一朵花宜傾一杯。花影在杯杯在手。主人愛客客休回。

李中簡

字廉衣。號文園。任邱人。乾隆十三年進士。官至侍講學士。

辛巳季春五日龍池紀遊二十韻

一百五日天氣新。三十六渠春水漲。龍池下注三十六渠坐惜鶯花催節過。來追鶻詠龍池上。龍池風景城西南。碧草芊綿彌一望。屢穿曲岸逗烟津。豁眼垂楊拂畫舫。新荷平鋪饒妥貼。迸籜孤抽空倚傍。山川佳麗客後來。臺榭玲瓏誰始創。細檢題名無故老。劇憐磨盾輸飛將。千金百戰想風流。白髮青山對惆悵。池上有明將軍鄧子
龍一聯鑷括其語池心構亭發興孤。水面看山得神王。最好冲融窈窕中。玉壺風蹙生微浪。回身俯檻窺水源。蟹眼松風迷想像。不知地脈濟南如。濟南泉水皆如湧珠錯擬天漿帝臺餉。遙見紅裙作薄遊。正逢象板邀低唱。堤邊桃柳認新栽。牀腳龜魚憐舊放。佳處全分西子湖。秀色小亞南屏嶂。春蘭秋菊不同時。地角天涯互相讓。

已知勝蹟須品評。況復塵蹤得寬曠。鴻爪安知鄉夢遙。龍槎一任蠻碑妄。向晚殷雷送微雨。坐深纖月窺夕帳。歸途不用鳴騶喧。清景隨緣余所尚。

辛巳三月六日自永昌起程聞金雞邨有溫泉迂道訪焉賦詩一首

板橋東去風日喧。十里五里雞鳴邨。粉蝶不斷菜花路。綠水自穿楊柳門。縱心獨往偶成適。懷古百端誰與論。春山又送馬蹄遠。萋萋芳草思王孫。

張裕榮

字幼穆。號樊川。桐城人。乾隆十三年進士。官至國子監祭酒。

琴城課士圖

爲盧太守嵩作

長吏帥斯民。身教與言教。士爲民之秀。閭左是則傲。成人既有德。小子亦可造。其風返古初。其化始學校。奈何吏道雜。操術昧津要。百里忝侯封。覲然執同瑁。空遊百室林。譬如身未到。賢守令棄城。愛士勤啄菹。胃子抱書來。一顧掀髯笑。講堂曾手闢。水木澄瀟照。諸生謹程課。佳時赴期約。音門闌停阜蓋。牕几側烏帽。藝苑鼓箏簧。文壇卓旌纛。子良藹如春。心香靜繚繞。長者坐皋比。靈臺詎能肖。閒與章縫游。魚水入罟罟。涕唾視繭絲。談笑馴虎虓。必連北溟鯤。整隱南山豹。惠然示茲圖。侑以詩古調。展卷生清風。太息發長嘯。今之古人哉。一洗世俗誚。五馬鳴鸞鑣。且晚聽綸詔。豈惟韋丹碑。但誌一隅效。壺漿溢康衢。敢爲迎者。

告。

邵齊然

字光人。號闔谷。昭文人。乾隆十三年進士。官至杭州府知府。有聊存草。

蒲褐山房詩話。闔谷兄弟五人。先後登科第。入館閣。而闔谷尤以風度勝。故京維名人交口譽之。及以部郎出守杭州。修學校。纂志書。文教一新。因與巡撫監司。齟齬。惋憤而卒。闔谷尤工書。學蘇文忠公。時與河東運使沈君栻。齊名。今維摩輿福諸寺。開遺碑具在。中吳人士所當摩挲把玩也。存詩雖少。而清宛可誦。足見一斑。

九日法源寺看菊。晚過王述庵寓齋。小飲分韻得客字。

涼風吹我襟。草木日夜易。黃花於此時。凌霜露標格。閒尋古招提。入門有奇獲。周羅軒階前。僧意斬珠璧。滿頭插未能。開口笑自適。秋光殊可愛。爽氣侵肝膈。招攜素心人。歡會旅肴核。論文氣如虹。射覆手屢戟。慮不牽世榮。心已醉佳客。厭厭且莫歸。微月窺簾額。

新秋夜雨

每到秋來雨。淒涼滴晚空。無端當漏靜。不覺入愁中。明滅一燈影。飄蕭半夜風。暗隨黃葉墮。清響上疎櫳。耿耿久不寐。蕭蕭聽未稀。有人愁永夕。無語對孤幃。殘穗挑將盡。流螢溼不飛。秋風看貼體。應悔典春衣。

劉星煒

字映榆。號圃三。武進人。乾隆十三年進士。官至工部侍郎。

贈廖古檀明府

三泖湖波近若耶。人家水木舊清華。安仁詞賦知名久。不待河陽始種花。
金斗城高鎖綠苔。公餘攜鶴任徘徊。知君懷古多情思。定上城東鮑照臺。

查禮

字恂叔。號儉堂。宛平人。乾隆十三年由監生爲戶部主事。官至湖南巡撫。有銅鼓書堂集。

蒲褐山房詩話。中丞爲蓮坡先生弟。能吟詠。喜賓客。襟抱與兄相俱。尤嗜古印章。金玉銅器。自吾子行。王厚之而下。名人鐫刻者。無所不備。藏弄至有千餘。生平莅蜀最久。而居西南。松潘徽外者。十嘗七八。崎嶇險阻。爲羌人所服。偶歸省。重築楊文憲升菴。藝花竹。招邀爲文酒之會。然亭衢初達。遽賦龍蛇。此勞臣志士所爲扼腕太息也。

西峪雲居寺

山坳結花宮。朱甍隱石罅。下馬尋寺門。門前碧澗瀉。住僧喜客來。整衣遠相迓。遂登十笏堂。竹樹侵臺榭。
古殿氣森嚴。四面羅精舍。拾級歷愈高。漸與鳥巢亞。焚香塔影圓。禮佛磬聲罷。齋廚甘淡泊。客飯泯高下。
坐令塵俗心。種種冰雪化。地靜堪讀書。將期半龕借。

宿西峪雲居寺後院

深峪夜尤靜。懸空宿高閣。推窗看前峯。一片青漠漠。星斗插簷閒。巖花霑露落。萬籟寂不喧。秋氣滿丹壑。
孤鐙繫剝竿。冷光頽寥廓。倚林山鬼嘯。蘿帶想綽約。坐久月上東。遲回入簾箔。經牀方偃眠。天風掃殘蘖。

兜率寺

連巖勢迴抱。未測深幾重。古寺居中央。白雲當戶封。入門見老樹。滴翠清陰濃。鯨魚靜不鳴。碧蘚生廢鐘。殿背嵌經版。活筆含纖鋒。坐讀淹晷晷。微言懷睟容。諸天本閔寂。塵土無由逢。僧繻喚客起。更踏前山峯。

登文殊殿後閣晚望

遊屐遍山阿。腰腳仍未倦。登高望所遊。歷歷眼中見。向背羣峯殊。陰晴衆壑變。喬枝飛木葉。瑟瑟與秋戰。壁閒佛像古。紺目白毫現。明季肇塑雕。內監督營繕。此身非常住。百年等過電。踟躕下閣來。清梵起鄰院。

清音洞

一水源源來。漩濃逼山足。山石空同開。亂流入山腹。沿流側徑通。往來走樵牧。水積漸成溪。溪遠更紆曲。鬼工鑿幻形。天匠鑿奇局。邱壑理所無。亦竟結空谷。斯遊得巨觀。是時冬氣肅。取徑穿洞過。巖崑若廣屋。鐘乳延苔花。垂垂挂碧玉。小坐心骨寒。衣裳染蒼綠。此中有清音。涓涓奏琴筑。洞口含殘暉。煙光散林木。幽邃宛畫圖。閒雲遮縱目。名山比高人。遯世遠塵俗。隱跡峙荒陬。意可避榮辱。孰知萬古後。偏我蹈其麓。摩崖更題詩。山靈勿謂瀆。

嵐光洞

陟險歷亂山。身若蟻旋磨。空谷響急流。略約溪閒臥。微吟眈尋幽。嵐光爲我破。窅然一洞天。邱壑生頓挫。

人自洞中行。水亦洞中過。石徑多崎嶇。心悸崖前墮。下瞰水底潭。澄清不忍唾。漁父舉網來。舴艋兩三箇。登臨恣所向。徘徊步還坐。鳥語共泉鳴。終古聲相和。

登摘星陀絕頂

入山頗盡登。臨目翹首高。崖還側足。褰衣負杖結伴行。磴磴芒屨踏蒼綠。猿驚鳥駭路若線。俯對竄竄萬丈谷。愈危愈進進愈難。直自腹腰度緣督。循初憚險中道返。予獨爭先尙馳逐。近巔忽見雙峯開。厲風洶洶振萬木。薄寒宜有肌粟生。盛氣翻教汗如沐。行行漸與鐵絙邇。匍匐欲前先頸縮。木梯數級懸虛空。若掉都盧髮反覆。百升豈有天可飛。一跌定知魂不續。全身眩轉付雲烟。餘念逍遙託鴻鶴。須臾越險陟山尖。枯僧待客茶已熟。自言卓立久不眠。屏絕醯鹽甘菜菽。得非金世鐵頭陀。靜閱恆沙如轉燭。我來亦覺塵境忘。下瞰羣峯殊碌碌。北望紅螺僅隔巔。隱現風光照茅屋。南望桑乾近不遙。一帶蜿蜒界沙陸。卻愁歸路益嶮巖。襆被擬畱桑下宿。塵機未斷仍下坡。如鷁退飛宋都六。古賢居室戒垂堂。大道康衢憂脫輶。何爲漫試榛荆間。蕤湖騰坑狎樵牧。東坡昔上吳王臺。亦有同遊臥九曲。歸途客問摘何星。笑指星光若朝旭。

石經洞觀隋靜琬法師所刻佛經

佛法東行自秦景。殿庭夜夢金人影。洛城白馬馱經來。畫像遂遍清源臺。月支于闐翻譯凡幾部。小品大

乘紛莫數。法苑晨鈔。貝葉書香。林夜散曼陀雨。茫茫大地分劫塵。或恐銷沈異今古。隋代沙門有琬公。慨然念之憂心忡。誓將四百二萬言。一一勒石垂蒼穹。鐫摹四大部。點畫釵腳工。其餘弟子復繼作。洊歷五季猶未充。太平清寧續刻亦繁富。合計二千七百餘石。瘞其中萬人。乃畢一人力。慈雲廣覆蓮花宮。我來不見寫經客。但見愔愔古洞青瑤石。銛鋒深刻等摩崖。周遭舒指捫四壁。雨淋不到日不炙。鏡光欲照鬚眉碧。遙思隋時歐褚猶未生。筆蹤乃爾多精英。恐是貞範先生劉元平。或者司隸大夫薛道衡。摩挲躑躅不忍去。眼底萬斛明珠傾。重尋八洞徑。屈盤鎔鐵作欄石。作欄俯闕疊石密于櫛。亦有側立高巒。旣窗櫺隙處露字畫。縛帚掃拂真奇觀。穴深直疑劓地肺。當日或使神工安。春雲陰陰春晝寒。秋風颯颯秋光殘。爐香不絕清磬杳。千年無客來開關。因慨吾儒六經光日月。鴻都古本多殘逸。開成以後訛亦多。蘚蝕苔侵如棄物。昨朝偶得嘉祐本。千百石中存什一。孰若此經閉置名山閒。碑完好無闕剋。豈真龍象永呵護。定力不受風輪旋。吁嗟乎。讀書衛道何人識。空與緇流競得失。每逢奇境心膽雄。茲覽尤覺情突兀。負筇肩笠取逕欲下山。滿山莎草蟲唧唧。

投半壁店僧寺

沿坡尋宿地。秋柳繞田塍。均水畱殘碣。孤雲伴老僧。茆菴昏過雨。山店夜明鐙。一榻支頤臥。幽懷夢裏增。

涿州懷古

荒臺殘壘。雲橫巖邑。從來慣用兵。二水爭流環傑閣。千峯連翠落高城。精廬尙有靈椿覆。仙館應無赤鯉迎。試看童童舊車蓋。樓桑邨外暮煙生。

春暮散步城東渡河過香林院小憩田舍晚歸

潑醅新水滿塘坳。潑灑晴光浸柳梢。三月海螯初上市。一春江燕未歸巢。澄懷豈必常高臥。遠眺無妨出近郊。寂歷紺園人不到。隔牆閒聽梵鐘敲。

喜申及甫上舍自都下至招同紫仙荆帆西顛江臬循初文錫及心穀兄飲舍南小築分賦得九青

寒雲如凍晝冥冥。忽報征車遠叩扃。我數梅花登小閣。人隨臘雪到閒庭。眼前誰市千金駿。座上休孤雙玉瓶。更喜卜鄰酬宿諾。清吟應許百回聽。

寒食過水西莊雨中作

歲月侵尋歎擲梭。身同泡影感滄波。水西寒食煙猶冷。門外梨花雨正多。悶檢殘書人懶讀。喜添新漲客須過。可堪載酒呼漁艇。獨把魚竿溼短蓑。

夜坐

池上茅齋竹外亭。風來微覺有芳馨。月當夜瘴消時白。山向秋林闕處青。卻飲非關愁酒病。品泉猶得續

茶經太平一載侵尋過。暫許偷閒枕席寧。

暮春竹樹青華居卽事

閨寂西岡景物疎。清華竹樹襯幽居。一灣碧水侵階淨。幾疊青山入檻虛。春暖老奴晴曬藥。花陰小吏日鈔書。天涯領郡稀民事。吟詠無妨案牘餘。

王德甫考功由滇南來川以詩遙寄子月六日偕趙損之抵汶川畱榻行館因次原韻以答

拂廬連壘結氈鄉。雪片封山冷夕陽。徼外烏啼邊草白。關前馬踏陣雲黃。短兵西向如飛礮。上將南來定破羌。報道故人聯騎至。盾邊籌筆助疆場。

峻谷蠻江作斬壕。斑斕山勢接天高。裹糧計可爲三覆。掃穴謀須用六韜。絕域烽烟征雁避。殘年孤月野狐號。凱旋屈指無多日。古句先期詠大刀。

飄泊萍蓬跡略同。近櫻鋒鏑百蠻中。錦衣軍駐桃關北。畫省郎馳玉壘東。寒夜小畱欣有伴。吟壇闊別恨無窮。圍爐翦燭西窗下。詩律當嚴似卽戎。

約王德甫丹仁趙損之明守亭過行帳小飲

萬馬西來塞草荒。連山積雪少春光。弓刀隊裏藏身健。風雨聲中感話長。羽檄頻催疲轉粟。烽烟高起強傳觴。相逢盡說籌邊事。嘯詠誰堪靖戰場。

余慶長

字元亭。安陸人。乾隆十五年舉人。官至成都府同知。有壬癸詩藁。

蒲得山房詩話元亭生長楚中獨嗜陳季立顧亭林之學為人淵靜閒止薄宦川滇非其好也告歸後益留心經術古文亦清深簡潔詩偶爲之然如牂牁名士推張叔河北文章重魏收躬耕養母旌江革尚節懷人識范雲知有小園屬開府可能大樹號將軍高情已欲舉黃鸝中隱且從盟白鷗頗工隸事隨予雲南江西幕中十餘年極稱同志又爲予撰銅政考八十卷始終本末釐然畢具亦食貨志必採之書也

人日過莫浪坡

蛇盤青嶺窟。猿落白雲窠。人日常爲客。天涯復此過。春烟生石磴。孤夢逐江沱。行息菴前水。清泉倚薜蘿。

退思堂懷輿山太守

十笏頽椽蔭荔牆。無端躑躅退思堂。子瞻詩和陶彭澤。漫叟歌招孟武昌。簿領閒時惟閉閣。賓僚散去自焚香。平生心跡真蕭瑟。落落高風未可望。

寄楊虹孫李翼茲兩進士

關西清德傳楊震。北海詞林有李邕。一見又知旋遠別。兩年莫得問芳蹤。文須久澤纔成豹。性不能馴未是龍。欲寄詩無阿買寫。最難療處病疎慵。

吳翀

字在揚吳縣人。乾隆十五年舉人。有艾香吟草。

包山

橫舟入包山。曲徑引幽翠。蒼松旣鬱盤。寒篠亦密被。潺潺瀉瀉坡。漠漠雲封寺。始至疲已忘。隨步輒領異。不辨五湖烟。但覺千嶂邃。時有樵聲來。瞥見山僧至。畱憩飯伊蒲。參證無生意。指點毛公壇。幽閨起涼吹。仙蹤緬已杳。養真夙所嗜。安得謝塵鞅。翛然此孤寄。

擬韋左司寺居

白雲護禪居。獨夜聞葉落。清氣習靜知。悠然滿山閣。吏事謝喧煩。幽興耽澹薄。不見同心人。鈴語慰離索。

將至武昌寄王西莊鳴盛

浩淼江流吳楚分。故園回首悵離羣。一聲落雁伍殘照。千里孤舟入斷雲。露白緞蘭悲屈子。峯青鼓瑟弔湘君。登樓幸有同心侶。玉笛吹時得共聞。

詠懷

啟期三樂興何長。帶索披裘豈是狂。劉項空勞爭逐鹿。穀臧相笑等亡羊。花邊好鳥春風酒。松下清琴夜月香。莫問行藏尋管輅。殘僧野鶴共徜徉。

黃文蓮

字庭芳。號星槎。上海人。乾隆十五年舉人。官泌陽知縣。有聽雨集。

夜坐

月出臨廣除。牆陰見殘雪。松竹一掩映。光景洵清挹。閒居寂無聊。攬衣坐超忽。稍聞宿鳥喧。漸覺爐薰歇。我欲撫絃琴。幽懷誰與說。月送孤鴻飛。碧雲渺天末。

題秋林讀書圖

秋氣忽淒厲。落葉紛階除。之子抱古處。閉門絕軒車。涼風在簾戶。清影交籜筵。凝塵滿瑤席。時復陳吾書。淵淵潤金石。渺渺親黃虞。道腴得至味。不知饑與劬。翳子困世網。未結山中慮。古人日以遠。芳歲日以徂。何當共饘粥。悠悠謝簪裾。

石琴精舍用韋公義演法師西齋詩韻

西峯古巖下。日夕聞清磬。蘭石無人蹤。松風悅禪性。茅茨帶修澗。香積依樵徑。回首重林端。白雲度山暝。

寄懷王德甫效山谷體

臥病秋光殘。懷人江路永。記別初夏時。忽忽山窗冷。竹几裊香絲。繩牀蹲藥鼎。碧梧吹脫葉。一一下苔井。坐憶泖湖西。碧玉光千頃。水際鷗鳥眠。烟外蘋花暝。夕陽沾酒橋。夜月吹簫艇。更愛雲中山。九點環高嶺。松蘿樵徑深。梵唄禪林迥。勝地愜清游。幽尋足遐騁。獨惜抱秋衾。閒對孤燈耿。會須把釣竿。趁此烟波境。

著我綠蓑衣。同君背笭箠。

拜韓忠武王墓

西風蕭蕭靈氣蒼。古松離立參天長。穹碑十丈字盈萬。銘功第一韓蘄王。蘄王當年佐大業。手撐半壁歸錢塘。金山一戰破敵膽。中軍枹鼓資紅妝。紅袍得脫實天意。不關獻策燒帆檣。官家魚水格天闊。燕山夢斷徒悲涼。英雄束手置閒散。良弓克敵嗟空藏。奚童蹇驢足游豫。日對山色餐湖光。嗚呼中興稱四將。局促那數劉與張。精忠鄂國洵伯仲。黃龍痛飲情慨慷。一生一死豈異軌。韓忠之戒何煌煌。只今寢園絕樵採。賜莊風景連滄浪。千秋魂魄應戀此。棲霞回首驂翱翔。冬青杜宇恨未滅。令我懷古霑衣裳。

趙忠毅公鐵如意歌爲外舅作

空堂白晝生雷電。倏忽光芒射星漢。輿酣決眼三摩挲。知是尙書舊時玩。尙書嶽立森孤標。彈壓婦寺清羣寮。陳辭直欲誅曹節。抗疏何嫌劾趙嬈。茄花委鬼相糾結。忠義生平嘗噴切。想像悲歌擊節時。中宵起舞情嗚咽。一自飄零別玉鑾。荷戈遠謫鴈門關。徒聞竿下金雞放。未見天涯戍客還。東林舊事成千載。古製蒼茫閱人代。碧草荒苔埋沒多。天垣星斗依然在。太息孤忠照古今。畱傳舊物等球琳。試將銘語分明誦。彷彿當時鐵石心。

得曹劒亭舅氏書知有悼亡之戚卻寄

寂寂滄江候雁過。瑤華萬里慰蹉跎。寧知荀粲傷難再。頓使桓伊喚奈何。遲日板輿勞獨御。畫簾微雨漫悲歌。留賓苦憶開西掖。夜夜琴尊聚玉珂。

過王存素寓齋有贈

竹梧小逕啟雲關。酒伴詩朋共往還。結社幾年依北郭。捲簾終日對西山。松陰滿院閒調鶴。月色經秋好放鷗。便擬滄洲共乘興。看君潑墨寫孱顏。

香櫟

別種江鄉重橘田。山家爭摘晚秋天。疎林霜後香偏遠。小閣裝來品自妍。每到嚴寒封蠟蒂。最宜遙夜伴茶煙。笑他兒女誇新樣。綵縷低懸斗帳邊。

蚤春過趙升之邨居看梅兼寄吳企管

溪雲林靄望中移。數里江邨步履遲。閒客正宜無事飲。幽花偏愛半開時。水邊烟淨浮空影。籬外香來露瘦枝。忽憶銅坑山下路。十年風雪負前期。

王元啓

字宋賢。號惺齋。嘉興人。乾隆十六年進士。官將樂知縣。有祇平居士集。

蒲褐山房詩話。惺齋冲和厚重。神觀從容。足爲後生矜式。工古文。尤熟於宋諸儒書。通鑑綱目。皆能再三尋繹。補其遺誤。又長於推步。前史月日參錯者。均爲考定。惜名位不彰。人少知者。曾主山東深

源書院余奉使至濟南往訪之始得悉其學術嗣後有所論撰必寄於京師故祇平居士集若干卷亦予與令子尙珏攜至南昌所審定者

題杜太守甲知通州日釐正祀典罷榷油酒雜稅二文案後二首

睿宗祀先達後學所矜傲。奈何從賊臣。妄使玷鄉校。時魏藻德濫廁鄉賢杜公領通牧。志在維風教。念茲關勸懲。僭差不容稍。直筆彰信史。詎任爛縫巧。錚錚數百言。震耳若驚爆。綱常一以明。粟主旋毀橈。誅彼既死魂。足使人心校。死鬼豈足誅。維用勸忠孝。

關征暨屢稅。國賦自有常。誅求逮負販。奉法殊未臧。公心切民隱。疾痛如身嘗。作書告大吏。陳義何慨慷。飛章達宸聽。恩語來天闈。歡聲動衢巷。共拜聖澤長。乃知盛明代。選吏須循良。德澤不下究。吏實乖其方。公恩廣且永。潞水同汪洋。

故明金御史殉難詩

御史名毓嗣保定人崇禎末奉命監李建泰軍山右未至賊已逼退保保定城陷入井死

乾坤瀕洞燿塵昏。狼獾蜂蟻紛聚屯。橫流潰決不可制。逆勢直欲滔天奔。金侯攬轡憫宵溺。逝將赤手墮崑源。茫茫晉土皆賊壘。右臂已失寧復論。畿南郡邑實門戶。走保鄉土堅藩垣。妖星忽熾帝星隕。六宮九廟咸灰燼。復仇討賊志彌烈。皎皎大義明朝暎。毀家犒士博死力。爭先徒步當輻輳。山摧地裂鮮完土。勺水莫止炎岡燉。猶飈蕩瀟簸宇宙。孤松豈得牢其根。危城既破身與殉。英風颯颯飛忠魂。維時守臣重首領。迎賊往往先開門。失身蒙恥等一死。視侯不異狐與豚。侯之志義耿不泯。去之百歲今猶存。寒泉古井

人莫汲時有虹起光蜿蜒。

湖海詩傳卷十四

劉墉

字崇如。號石菴。諸城人。乾隆十六年進士。今官體仁閣大學士。

蒲褐山房詩話。予以乾隆戊寅爲中書舍人。時先生已觀察山西。後四年召直武英殿校書。初至京師。見文正公。公方閱予所題李龍眠畫十八觀漢贊。公問曰。曾識王某否。對曰。未也。公因指册中一應真像曰。王某似此。故先生嘗謂曰。我兩人定交于圖畫中也。文正公清得重望。雅不欲以詞章自見。先生如之。先生督學江浙。及予在陝西。江右念及輒手書近詩見示。清心超悟。有香山東坡風格。十餘年所得甚夥。而漸次遺佚。門人陳子韶因合梁侍講同書。鐫于西湖上。名劉梁合璧。今所採者皆合璧中詩。全集則未之見也。

題阿少司空迪斯尋河源小像

二萬輿圖驛使通。遠探星宿被恩隆。一源迢遞來天上。九曲分明到眼中。密勿陳情歸聖鑒。飛騰絕域嗣家風。斯人宛在無今昔。鯨背游仙問海東。

述庵司寇惠及水仙木瓜賦此以謝

秀啓珠胎蘊妙香。不離色界住仙鄉。晴雲窈窕生虛白。新月嬋娟上晚涼。幽夢乍回天半曉。伊人宛在水中央。朝來解佩留餘馥。應爲凌波託意長。

拜賜曾霑貢篚臨。香清色正果中琛。何人投報偏酬玉。幾處園林競鑄金。風露滿盤生遠思。芝蘭入室有

同心。便因雅贖成新咏。一種清芬愜素襟。

大士巖

蒼巖近接舊山房。藥竈茶鐺入草堂。黃葉滿林多老榭。綠陰一徑有垂楊。新參大士心源寂。屢夢前塵水月涼。他日宦成歸小隱。繞檐雲海看茫茫。

贈日者

小黠從來是大癡。紛紛六合又三奇。人間富貴誰偏有。天上星辰爾遽知。何事一身還作客。更憐八口亦長飢。鴉鳴鵲噪原無過。載好其音且聽伊。用石霜語

贈相者

把鏡回看便了然。底須骨相問流年。祇應鬢雪將人老。那得心光伴月圓。媿我支離形似鶴。笑渠落拓酒無錢。春風楊柳長河路。認取誰儂待喚船。

題曹麟書學士天下名山圖

不知雲夢芥吾胸。蓬島方壺有路通。曾倚鼈身看日出。又凌鵬背試培風。尙平婚嫁何嘗累。顧陸丹青未足同。他日窺窗誇曼倩。真形五嶽在囊中。

題大學士英勇阿公雲巖小照

坐斷空花不計年。心光常照意珠圓。却參枯木龍吟句。八陣風雲玉帳前。
萬里歸來鬢雪新。桓圭袞繡畫麒麟。白雲無盡閑舒卷。依舊青山似故人。
石室松風滿意聽。濤翻雪落語泠泠。不須更覓無生話。此是新傳了義經。
彷彿拈花笑口開。等閑蔬笋味鹽梅。從容幾刻爐烟裏。佛語親承拜賜回。

題徐樹峰問僧圖

有何不了更求僧。聾啞兼盲那解聽。聽取兩松常說法。居然北秀對南能。
渾忘官職外形骸。小憩還招釋子偕。未必有疑須問答。愛渠磨衲共芒屨。

譚尙忠

字會文。號古愚。南豐人。乾隆十六年進士。官至吏部侍郎。有紱芳齋詩集。

遊馬鞍山

石磴欹斜上翠微。黎川風景到牕扉。雲橫遠岫衣千摺。水落平橋帶一圍。仙客何年乘鶴去。山僧向夕掃
松歸。聞鐘幾動烟霞癖。檻外寒枝挂落暉。

無題

東風無力耐春殘。倦體輕盈怯小寒。獨坐孤帷難自遣。細研松露寫秋蘭。

周於禮

字綏遠，號立崖，嶧峨人。乾隆十六年進士，官至大理寺少卿，有聽雨樓詩草。

潘陽山房詩話：少卿生在要荒，性耽吟詠，又嗜書法，為侍御時，稍暇輒行琉璃廠書肆，中見有佳者，隨時售之。宋元石刻既多，真蹟尤不少，故取褚、顏、蔡、蘇、黃、米六家，先勒于石，蓋非全璧也。旋以疾終，所居聽雨樓在京師，神匠胡同為明殿介溪別墅，國初徐健菴尚書居之，繼歸于溧陽史文靖公，其後分為數處，畢君秋帆得之，為燕會觴詠之地。及秋帆出為觀察，遂歸少卿，迄今三十年，是樓不知誰屬，石刻亦無可攷。

曉發

亂山迷向背，一徑忽東西。曉日明征路，清風送馬蹄。仰瞻天宇闊，乍覺嶺雲低。遙憶金華叟，尋羊遍幾谿。
襄城寄田玉年同年

武侯祠石琴

雞幘關前路，遙遙捲旆旌。迴峯失雲棧，一徑入襄城。地邇房陵舊，人懷漢水清。使星何處覓，珍重故人情。
澹月低祠樹，疎星帶遠林。言尋沔陽路，尙想武侯琴。片石真存漢，無絃亦賞音。挑燈讀古碣，恍見出師心。

出陳倉

黃紙除書媿我名，三秋風雨捲歸旌。飽經棧閣千重險，還對秦川一掌平。陳寶祠荒迷故跡，磻溪石在有余清。關心最是隴城北，古水長流日夜聲。

種 丹

字荔帷。烏雅氏。滿洲正黃旗人。乾隆十六年進士。官至嘉定府知府。

同芷堂同年登松岡喇嘛寺

巖業番塞高。崢嶸佛寺壯。探奇借勝友。歷覽懷抱暢。初緣鳥道行。漸陟羊腸上。磻房幽似墨。拾級頗冗長。土官僂倮迎。劍佩光泯漾。樓塔蠱雲表。欄楯環相向。登閣敷座具。錦繡四壁障。僧徒雜沓趨。鐘鼓演梵放。諸天佛菩薩。幻詭窮變相。蛟龍互攫拏。鬼物逞撈掠。罽毘揭中天。貝葉森三藏。披衣極冥搜。拓窗肆高望。青蒼山遠近。蜿蜒水激宕。民稠雜市廛。高下紛難量。悠然清景舒。豁爾心目廣。須臾駿奔走。樽俎執饋餉。入口駭腥羶。下箸竄鹽醬。番童能大嚼。薄劣慚壯浪。番民貌睢盱。番女態輕颺。匍匐延道左。相送何恭讓。愧非國工手。莫繪新奇狀。徐君富文筆。詔鈞奏清唱。瓊瑤如我報。嘉惠永不忘。

惠 棟

字定宇。號松厓。元和人。諸生。乾隆十六年以經學徵。

蒲褐山房詩話。惠氏四世傳經。至學士而大。至徵君而精。論經術必宗漢魏。六朝次之。其于史子諸書。亦必取自唐以前。六書從說文。輔以玉篇廣韻。所著書凡十餘種。先是東南文士。疎于經誼。百有餘年。及徵君出。而古學大昌。丁卯戊辰。後予與鳳嗜曉微。企晉從而羽翼之。繼盧雅雨。畢秋帆。又為盡粹。所作行世。而四庫全書館開紀。曉風陸健。男悉取其書。作為提要。發明大指。然後古經師大儒流傳之緒。猶可窺其涯略。皆徵君力也。徵君祖父兼精吟詠。蓋辨香漁洋。故徵君少撰精華錄。訓纂亦以箋疏之學行之。極為該博。其後經術日深。不復為詩。然其序吳企晉詩。謂詩之道有根柢。有興

會根抵原于學問。與會發于性情。二者兼之。始足稱一大家。卽其所言亦談藝者。當所奉爲質的者。已時休寧戴東原。震均以經學稱。且長于九章三角之術。但所宗在江氏。慎修多採宋元之說。與徵君鑽研漢學者不同。詩亦無間。因與予善。故附記于此。徵君最精于易。先以李鼎祚周易集解爲主。復采之。羣經注疏。及史記兩漢書諸注。以發明孟喜卦氣。鄭君爻神。虞翻納甲。荀爽升降。京房飛伏。共五家。惟京房卽火珠林之術。滅大衍四營十八變。而以錢卜。至今猶用其說。至荀爽升降。已與經傳往來。上下多不通。虞氏所釋者。僅有西南得朋。東北喪朋。及月幾望數條。其餘亦無從推究。爻神本與卦氣相通。而所云上直某星。推之各爻。皆難取象。其卦氣卽六日七分。自後漢書至五代史。歷官皆用以驗中節六候。而不可以釋經文。且東漢時太初四分三統諸歷。皆存鄭君又嘗注乾象。歷于大餘小餘。盈縮強弱。不知用何歷法。以爲推步。此諸家之說難合。亦難通。故周易述亦以鄭義。虞義爲言。而不能因端竟委。上符先聖微言也。若孔安國古文尙書。歷代大儒疑之。徵君鈎深至遠。抉所從來。雖毛氏寃詞。無以解免。其明堂大道錄及禘說。具見三才之奧。而于建置。在郊在國。與九室十二室。太廟太室。亦無定義。故其子若孫。述臨歿言。以所著未成爲嘆。正須後來同志。疏通證明。以蘄復古。乃近時英俊。一知半解。甚非徵君守先待後之意。而背聖人一貫會通之旨矣。

題高司寇其韋畫鍾馗

老馗生在東南方。周行天下窮要荒。生不逢世死作殤。誓爲明主殲游光。頭帶雞父身朱裳。居傍石室鄰銅墻。庶疫剛瘴莫我當。以鬼爲飯霧爲漿。阿誰出出嘯于梁。擅吹玉笛偷香囊。老馗見之心怒張。赫軀拉幹抽肝腸。一朝痞疾除膏肓。神靈衛德感上皇。畫師屬意追豪芒。肖成馗體眞軒昂。千載絕筆遠擅場。誰其繼者高遼陽。指頭蘸墨何披猖。能與吳生相頡頏。周官設氏毆方良。老馗遺像非荒唐。開元粉本難評量。此圖應出千金裝。詩成徙倚行風廊。寒星欲墮天蒼浪。

陳鴻寶

字衛叔號寶所仁和人乾隆十六年召試舉人官至給事中

蒲褐山房詩話寶所風神蕭散舉止頗似晉魏間人與予同在內閣者五六年及余遷副都御史寶所爲給事中同在臺省故相知最深又好書畫時金壽門農工墨梅重自珍惜獨贈余十六幅寶所見之借去賞玩累月既而索之笑曰我以為是爲性命矣其可還乎蓋性情幽僻如此詩瀟灑出俗如見其人弟鴻寶字用儀亦工畫附見於後

胡敬銘招同杭堇浦諸人避暑分得帶字

我性既畏炎。矧方病求艾。閉門謝熱客。一榻掃埃壒。恢台氣何驕。坐臥歎無奈。忽枉故人書。招我西郊外。茶瓜足清供。吳榜初擊汰。四山曉翠分。十里水風大。長林半翳蟬。亂荷自搖蓋。佳處指南屏。一徑破深蘂。寒泉沁詩脾。陰洞寂羣籟。拾級憩孤亭。密影交松檜。相對禮數寬。儘容弛巾帶。清言暑不知。如脫醉吏害。磨崖何年書。字畫辨茫昧。流連至斜曛。茲游應數最。擬作追涼圖。妙手倩誰繪。載酒儻重來。記取此高會。

和梁山舟移竹用漁洋山人韻

平生山澤癯。骨相寒少肉。世味百不宜。破夏來看竹。好句如琅玕。主人迥絕俗。十丈東華塵。得此始刮目。颯然聲已秋。幽夢落崖谷。坐待月影篩。勿假一星燭。

過汪二玉岑湖上別業奉贈

十年阻面惜心朋。歸計菟裘歎未能。近水誅茆輸爾早。款門看竹記吾曾。生涯漫指營巢燕。氣味何如退院僧。乘興自今來往熟。春波一櫂入西陵。

六月十七晚赴西苑雨後宿雲公精舍

城西積水護田廬。巖岫歸雲解駁徐。柳影沙堤聞馬語。豆花籬落見蟲書。多情涼月如看待。可畏炎光且破除。又復打包烟寺宿。一聲清磬萬緣疎。

雨夜懷可儀弟

欲買湖莊費百金。白頭行坐自沉吟。少游有語哀新息。老圃何年學漢陰。邨野尙餘三樂在。具茨奚事五悲深。西風又響庭前樹。根觸平生聽雨心。

湖上卽目

斷岸枯楊不繫船。一雙白鳥破寒烟。願尋好手繫東絹。爲寫重湖水墨天。

遊慈雲寺井序

寺建于周顯德二年。在杭之城東隅。舊有白雲居。甘露泉。鸚鵡院。娑羅閣。紫芝堂。翠竹林。赤松亭。梧桐塔。諸勝盡廢。今所存者寒泉一泓。苦竹滿徑。及寺前之萬生池。千衆井耳。明蕭山魏驥爲寺記。趙古書記後載東坡慈雲四景絕句石刻。在寺。今蘇集失載。壬午夏日與汪五隨丁二傳。道暑過此。感歎之久。輒形于詩。

一牛鳴地意行遲。吟遍眉山五字詩。偶與殘僧話陳跡。弄泉看月立多時。

佛像纔教毀作錢。誰知初地占幽偏。赤松老盡梧桐死。石碣猶存顯德年。顯德二年詔毀天下佛像鑄錢正寺建時

七夕寄內

瓜果紛陳乞巧盤。孤懷今夕不成歡。人間亦有經年別。可作盈盈一水看。

吳煊

字荀叔。號杉亭。全椒人。乾隆十六年召試舉人。官山西同知。

蒲褐山房詩話。荀叔爲玉隨編修。孫疏節閩。眉宇軒然。在京師如梁山舟。陳寶所。王穀原。諸君皆親愛之。工勾股旁要之學。直隸聞者數年。出爲郡司馬。又數年而歿。兼工詞。予刻入琴畫樓詞鈔中。

冬日寄王德甫

孟冬風日淒。庭樹脫殘葉。攬衣步前楹。霜華覆地濕。冉冉歲將暮。鬱鬱憂懷疊。所思天一方。道遠關梁隔。矯首望飛鴻。徘徊空竚立。

鳳凰集阿閣。梧桐生朝陽。造化鍾靈異。蔚爲家國祥。明珠薦玉敦。太廟陳五英。遇合會有時。乃卜熙景昌。之子榘楠材。細理敷文章。班匠顧不用。弃擲委路傍。已矣復何道。嘆息摧中腸。

朔風激塵鞅。九陌弛軒車。朝謁金張館。暮讌許史廬。新知若膠漆。灼灼春華敷。昔時同盟友。窮賤趨路隅。高言諱姓氏。目笑何其迂。所以楊子雲。守元惟著書。

我愛榮啓期，帶索朝歌琴。悠然得三樂，舉世無知心。高風一以逸，至今傳濟陰。吾友遠行客，永慕梁父吟。金函與玉牒，窅窕勤追尋。嗤彼於陵子，毋乃避人深。因風託情愫，惠我瑤華音。

效香奩體

最憐曲榭近東墻，長夏風微院宇涼。綵線閑拋貪鬪草，繡簾不捲爲熏香。牕中避暑揮團扇，花下窺人佩錦囊。眉語目成都省記，何時夢雨到高唐。

寄德甫

征衫拂拭塵猶在，風雪重呼江上舟。辛苦可堪聞塞雁，飄零只合伴沙鷗。敝廬種竹成虛想，古埭看花負勝游。騎省年來雙鬢改，莫將青鏡照煩憂。

長江東望雪廉纖，料得推篷朔吹嚴。舊業凋殘嗟道路，壯心磨滅爲齏鹽。人如失侶投林鳥，事比沿流上竹鮎。又挂一帆京口去，西津潮落晚峰尖。

客路茫茫仗友生，王郎書尺訂鷗盟。性因愛嬾難言學，詩爲多愁易不平。三泖湖波春草綠，九峯山色晚霞晴。何當與爾乘船去，手把漁竿變姓名。

褚寅亮

字搢升，號鶴侶，長洲人。乾隆十六年召試舉人，官刑部員外郎。

蒲褐山房詩話。鶴侶少以制義名。中年覃精經術。宗惠氏之學。一以註疏爲歸。三禮折衷。賈孔。尤通喪服。時公羊何氏學久無循習者。所謂五始三科九旨七等六輔二類之義。不傳於世。惟武進莊侍。郎存與默會其解。而鶴侶能闡發之。世稱爲絕業。以病假歸。主常州龍城書院八年。羣經咸有論撰。其書尙存於家。惜未登劄。後學無由津逮耳。

題王德甫三泖漁莊圖

王郎著論同潛夫。長身鵠立山澤癯。十載相於道不孤。譬飲醇酒嘗醍醐。忍饑朝誦至日晡。汲深綆短陋俗儒。嗜好酸鹹與世殊。弗趨榮利耽菰蘆。圓泖之濱宅一區。蒼茫震澤來委輸。芰荷荇藻紛縈紆。水禽拍拍游。鵲隅。橫雲秀出俯衆雛。空翠無定難名摹。高人獨坐倚檣梧。素琴一張酒一壺。置身仿佛在畫圖。秋風忽起雲滿湖。無數浴鷺兼飛鳥。筆牀茶竈煙艇俱。短棹微茫入有無。但聽款乃聲于喁。網來魚婢獨蟹奴。一笑頭銜署釣徒。草堂佳趣致足娛。浮雲富貴誠須臾。愧我長安塵俗軀。如馬戀棧鳥在笥。韭畦蘘圃日就蕪。便擬歸畊返故都。卜鄰君側相歌呼。檝頭繫柳池栽蒲。風流來往無牽拘。吾將終老於是夫。息壤在彼盟弗渝。

懷王德甫

春風生夕館。之子意何如。靜對滄浪水。閑鈔笠澤書。禽聲鳴復止。雲態卷還舒。想爾長吟罷。憐予未定居。

邵嗣宗

字鴻箴。號蔚田。太倉人。乾隆十七年會試第一。官至翰林院侍讀。

鐵畫蕪湖工湯鵬能揉鐵作畫凡花竹蟲鳥曲盡生致又能作山水屏障其大幅積歲月始成故不可得所傳惟尺幅小景耳好事者以木範之懸之虛壁亦復四合而成一燈其鑪錘之巧前此未有也鵬沒後無得其傳者間仿爲之即工拙不侔甚矣山舟紀之以詩并囑予同賦

剡鋼起頑礪百鍊轉靈秀歛從烈燄中飛精入文囿何年神鬼工絕藝似指奏赤手操鑪錘突與筆妙鬪萬象宛轉成意匠孰指授布散紛細碎層疊逞刻鏤有時規嶽勢生拗蟲數岫上聳簇螺髻下拾俯鵬味忽翦半江水挾勁作波皺潏洄如有情石竇隱搜漱或狀花與竹葩葉互煦茂亦懸鳥與蟲意態足飛走倣詭不可名一一畫心就本色留吾真衆形虛與構異哉工倕指剛耿乃受揉奪胎無遁藏肖物中理腴創此質而巧物理安可究得非龍護儔爐前默提佑不然古畫師降靈弗待咒洩此造化奇神物敢呵詆流傳少益珍好事那輕購粉墨有時消此畫與世壽

從軍行贈別徐生淦給六品服隨侍讀索爾遜賞定邊將軍印赴巴里坤軍營

徐生昂然來短後曼胡纓問生何爲者持符走從征自言平生志談笑無丁零男兒輕萬里安能跼欄楹沙場枕戈臥仰看天漢橫馬上飲蒲萄焉知兒女情況今天子聖西賊破膽驚疾靈走尺一萬里暗無聲將軍大威武金印如斗形龍謙蟠十丈呵護趨羣靈風雲赫欲動白日低行營會鈴一紙書揮彼十萬兵蹴踏無空闊突殪狂奔鯨生也壁上觀腰劍亦爲鳴右顧天山服左盼交河清崔嵬玉門關杳與暮雲平歸來笳鼓競一笑投青萍我請爲生歌去矣無留行少年重意氣大荒亦門庭迂儒昧遠識坐令老此生

長揖跨雕鞍。結束何鮮明。脚下豪豬鞞。頭上烏鴉翎。疾出橫門道。回首春城晴。

梁同書

字元穎。號山舟。錢唐人。乾隆十七年進士。官至侍講。

蒲褐山房詩話。元穎爲我師。文莊公長子。少入詞館。戊寅大考。翰詹仰荷恩綸。升擢侍講。旋充講官。以丁嗣父憂歸。嬰疾。遂不復出。而老師宿儒。文人詞客。踵門來見。必倒屣迎之。其浙閩貴人軒車過訪。報以一刺之外。未嘗往也。能詩。尤工書。東南士大夫碑版及琳宮梵宇題額。有求輒應。而節鎮屬書。則歷年不報。海內益以此推重之。年踰八袞。明燈矮紙。猶能運筆。人謂唐歐陽信本。明文衡山之也。

秋圃雜咏同述庵作

白花何淡淡。紫花何離離。晚花角上總。早花眉下垂。一番涼露泫。幾點疎雨肥。生香傍籬落。風味野老知。我來棚底坐。散髮斜陽時。似聞絡緯語。爲我寫鄉思。豆花

秋星曉未收。光景淨於洗。小草澹衆芳。延緣青竹尾。圓摺皺欲舒。一碧翦天水。惜哉抱弱質。開落朝槿似。

爲語牽蘿人。莫採此花蕊。采遲色不如。采早露如許。叶牽花

昔人疏草木。或云卽蒲蘆。底傍青豆架。高綴碧玉壺。犀老腹則堅。斷取霜寒初。小可供几案。大可浮江湖。

所以王元禮。愛玩常區區。詩成在一擲。我愧非其徒。蒹蘆

吾弟讀書處。青乳顏其屋。宿土埋深根。蟠屈纒一束。方春引龍須。怒走漲天綠。漸看纓絡垂。却喜珠露沃。

穎綻不容排。色淨似可漉。遠人憶此無。悔不涼州牧。

蒲桃

沙壠寬作畦。香苗自成畝。年年秋社前。磊落分子母。黃割朶朶雲。紅苗纖纖手。是時飽霜螯。到處鳴壺臼。園官吾故人。分致意則厚。藉糟儲瓶罌。歸而謀諸婦。薑

蔬中有菜服。是處種不乏。尤宜入沙壤。脆玉不勝搯。北人麥爲飯。炎毒苦難戢。生啄勝梨頭。涼冷沁肺葉。

園丁資地利。街市肩擔壓。不見王爽兒。千緡易宦業。

蘿蔔

題翟晴江書巢圖

先生吾故人。相知逾卅載。生平無一嗜。枕藉書史內。書盡繼之夜。燈檠鎮長對。丹青雜研摩。筆未事鋤刈。編香動等身。咿嚶欲枯肺。前生定書魚。字字百雜碎。所居城東鄉。鍵戶謝俗態。茅堂開三間。以書作襟背。左旋而右抽。上睽或旁睇。縱之復橫之。亂疊菜几碍。嶷嶷兩孫雛。毛羽非凡輩。攤書解滿牀。有若盤弄晬。先生巢中居。暇或示勤誨。居然南面擁。寫貽贏金穢。吾生眼如月。惰學淪幽晦。豈無卷五千。閣東同捆載。少年倏又過。炳燭光不逮。對茲巢中人。能無生感悔。

題陳九儀畫冊

述庵先生吾畏友。一代詞場斲輪手。風雅端能被後生。揄揚輒向誇誰某。絳帷弟子穎川陳。詩名耳熟殊凡倫。尤工繪事逞餘技。有才不偶徒風塵。風塵漫說卑棲穩。落拓官身稱吏隱。一檄來從青浦濱。家江恰

與錢湖近。湖山藹藹。湖波澄。銜齋几淨。鋪溪藤。折腰敢笑種秫令。署尾胡礙。礮松丞。官閒大可供瀟灑。況有丹青足陶寫。昨來示我幾幅圖。幅幅林泉總清雅。神明古法師古意。眼前誰復如君者。我昔聞陽城主簿陳仲仁。畫格直與吳興隣。又聞待詔陳子久。渲染徐熙得八九。君家家法本天機。一官可惜轅下鞅。却將墨瀋了公事。等是江南胡不歸。卅年我愧林間住。爲欠平生濟勝具。讀君之畫贈君詩。胸中觸撥雲烟趣。安得煩君徧寫湖上山。坐臥空堂長不去。

題溫忠烈公遺像卷內附家信二通

名瑛烏程人

釋褐官司李。時危髮已皤。四郊爭舉燧。一掌獨壇河。劍得知心友。書留正氣歌。還憐妻與女。相伴國殤多。已墜虞淵日。揮戈執魯陽。力難醫國活。身遂與城亡。小影蒼顏見。孤忠碧血藏。易名褒聖主。千載發幽光。

同弟敦書過江上舊廬集杜

小徑升堂舊不斜。夜來吹折數枝花。已知出郭少塵事。且盡芳尊戀物華。雲白山青萬餘里。江深竹靜兩三家。百年地僻柴門迥。弟勸兄酬何怨嗟。

答友人作二首

卅年蒲柳早衰蕪。壯不如人況老乎。苦筭硬差良有願。葫蘆依樣已難摹。休言報國文章在。只合投閒草木俱。物不答施天地大。始終慙負是頑軀。

北望君恩首重回。一門三世盡栽培。臣心不是菴施草。天意須憐擁腫材。絮到泥沾飛不起。豆和灰冷爆難開。它生願作銜環雀。再上觚稜高處來。

題白菊溪廉使雲樹歸舟圖即送之黔藩任

辱公車騎數經過。忽漫相逢欲別何。天下青山行處半。孟郊詩。舊說天下山半在黔中青。坐中白髮去思多。蠻童獠婦歸

懷畏。峒草江花人嘯歌。莫道帝城雲樹遠。它年旄節返鳴珂。

錢載

字坤一號礬石秀水人。乾隆十七年進士。官至禮部侍郎。有礬石齋詩集。

蒲褐山房詩話。礬石襟情蕭曠。真率自如。乾隆甲戌初夏。從金檜門總憲一經齋。與余訂交。遂成雅契。性豪飲。嘗借朱竹君學士金輔之殿撰陳伯恭王念孫兩編修過余。冬夜消寒。卷波浮白。必至街鼓三四下。時竹君推戴東原。經術而礬石獨有遠言。論至學問。可否得失。處礬石頓發赤。聚訟紛拏。及罷酒出門。斷斷不已。上車復下者數四月。苦霜濃風沙蓬勃。餘客佇立以俟。無不掩口而笑者。善鑒別。法書名畫。望之審其真偽。故尤工繪事。晚年致仕歸。藉以給朝夕。乾隆庚戌年八十三。上元日。猶爲予做黃鶴山樵長林修竹梅雨葉風枝之妙詩。率然而作。信手便成。不復深加研鍊。殆其鄉李日華姚綬一輩人也。

葺填城內舍與至元嘉禾志作于

嗚呼先侍御。青衿劾大璫。明思陵初。先公以貢生首劾魏忠賢。思陵旨有青衿書生云。國亡身亦隨。萬古斯邱藏。一子兩孫祔。鬱鬱松柏行。瓦屋得五楹。歲久今無牆。嗟予幼失母。靈樞安西廂。陰寒風雨夜。起立痛我腸。人生豈不貧。所貴有

扶將。我身非草木。天其忍枯僵。支傾懼見墜。邪許多驚惶。塗泥塞孔漏。敢曰禦冰霜。悠悠歲既宴。父母待於堂。去府百里近。拭淚歸村舡。

湖山神廟

金沙灘外雨。亂濕垂楊絲。荷深欲無路。遂入金碧祠。亭臺出秀樾。下匯泉成池。池中雙文禽。飛上魚梁窺。日斜游女散。天迴涼颺吹。兩峯青忽斷。濃淡雲歸時。

涵白齋

虛窗夜氣流。素壁天光聚。獨坐夏成秋。頻來客亦主。明燈二十年。幾宿溪邊雨。

游華山

飛瀑見晴雪。千尺雪石上刻句云。飛瀑晴迴萬仞峯。旋螺聞妙香。僧言華山處。華擁支公堂。秋田石路遠。晚樹雲陰涼。高高穿鐵壁。磴道造嶺處刻鐵壁關三字。寂寂轉蠶房。腳踏菡萏瓣。動搖天風長。飄然不染心。不在菩提坊。

題顧孝廉鎮毛詩劄記後

子夏不序詩。昌黎語初揭。夾漈攻已厲。雪山廢何決。斷斷紫陽翁。序既頗采列。淫奔二十四。自作得無媿。遂令後賢心。於此未能折。沈重與范煜。源流各疏別。要之毛公學。近古少頡頏。康成收三家。尙欲補其闕。逆志不以辭。亦惟援據切。孝廉家補溪。箋傳獨穿穴。其先宋遺民。作歌見風烈。孝廉之先細二翁上虞人。元初程文海奉詔求人。

材以名。被徵乃避地常熟。芙蓉之荒莊。紅豆春可搗。莊有紅豆一本。細二翁手植。後屬于錢。名紅。君也。其詩有云。吾貞所志在四山。芙蓉之荒莊。紅豆春可搗。豆。莊樹。伐且四十年。今仍歸顧氏。復生一本。君也。老著書。樂歲飽糠粃。劄記毛鄭朱。而旁及羣哲。相逢在京師。同舍同晝閉。寒燈時解頤。五十頭未雪。明年入太學。將爲諸生說。季廉以學正。薦蒙記名。

九日竹西亭登高

閏年秋已寒。茲日氣殊爽。復蹟倚勝情。攜壺發遐賞。亭爲諸吟社重構。寺隣北郭迴。阜較平山敞。江渺數上風檣。天品卓吟杖。崑臺老鮮積。葯圃涼烟上。離短菊未黃。林疎葉時響。醉深不厭百。會偶應難兩。歌吹定何如。清言屬吾黨。

集行庵題王西室水仙梅花卷

斑竹低窗秋影折。案頭橫卷披香雪。數叢綽約姑射姿。羅浮仙來參入之。葉葉銖衣支玉骨。照渠只少光明月。涼颺拂鬢不可簪。合將供養近佛龕。知故愛墨亦愛紙。子固元章兩居士。

毘陵曉望

戚墅平平岸。橫林遠遠村。水清秋更碧。烟澹曉無痕。魚菜將船賣。雞豚並舍蕃。九龍山不老。窈窕麗初暾。
七月十五夜祁陽對月

湘水露華滿。祁陽雲翠流。今年無閏夏。此夕卽中秋。高館深留客。疎簾半上鉤。舉家京邸話。應憶到南州。

飲望湖亭

落景延高賞。歸艫託暫閒。蕭蕭聞木葉。渺渺見君山。估客帆檣去。漁舟浦溆還。洞庭今夜月。醉我鬢雙斑。

法源寺看牡丹歸飲王秋曹昶齋

看過棠花乍歷旬。微雲暖日又催人。萬無九十屏風品。一洗三千世界春。退院僧猶譚往事。提壺鳥已喚比隣。歡場得步諸公後。且鬪明燈現在身。

杏花

杏花村落不勝情。二月風光出趙城。楊柳插簷人上塚。江南明日作清明。

秦 巽

字序唐江都人。乾隆十七年進士。官至岳常澧道。有石研齋詩鈔。

冬日田居漫興

寂莫村墟杖策過。寒林落盡水微波。打頭屋只三間少。負郭田無二頃多。陸氏荒莊成一笑。陶家蕪徑較如何。此中且住爲佳耳。收拾心情付懶窩。虛白窗生暖暖烟。更無車馬漫喧闐。冷官且免書驢券。孤帳還疑伴鶴眠。庾信小園原有賦。蘇公淨几豈無緣。挑燈午夜回頭憶。一別柴荆已廿年。

周天度

字心羅號讓谷仁和人乾隆十七年進士官至許州知州有十誦齋集

蒲山房詩話讓谷學問淵奧先以經學薦舉及為詩以雄博見才而絕句中如與吳南磻說丁山
湖勝云春波瑟瑟小橋橫十里沿河似掌不記得年時輕舸別杏花疎雨近清明曲水銀塘宛轉
通千絲楊柳盡垂風結隣合伴東家住畫閣遙臨一畝宮望九華山云寒溪百折繞秋屏石甌香林
徑眇冥欲向懸橋問雙瀑斜陽猶隔數峯青嵌岩如鈿月如纏齒浮空夜色澄好似露涼風定後
秋湖遙挂九枝燈題張墨岑畫云蒼厓華潤碧苔滋春入林泉尚未知幾日小亭人不到東風吹過
綠濃時風迴雁激碧鄰鄰漁具罾竿趁晚晴見說鯿魚初上水斜陽一抹待潮生歸途云一橋浮波
大江東游戲真教初祖同下界卻談金地藏年年秋夜佛燈紅翠微仙掌萬樣枒東閣時烘闌地茶
開落岩前玉瓔珞吹香再訪鉢囊花五溪雪後響潺湲席帽篋與一日還更上玩華亭上望隔簾黃
對夕陽山譜作
尤為時人傳誦

金聞石將之京師訪余淮浦維舟信宿出天山攬轡圖屬題漫賦五言五十韻兼以錄別

丈夫貴壯游託意務開濟闔門詎事宜紆籌當遠謫與君同鄉友結交始燕薊片言金石固情好逾兄弟
尤軫用世心六合一平睨余本凡庸質因君日摩厲困頓走塞垣君遠更數遞雄疆綏遠城皇輿職方紫
是地漢甌脫元封首除薤旋踵遺育蕃烏桓錯白題石槐闢王庭猗叵大饗帝歡仇水深黑盛樂宮崇麗
一從六鎮設懷朔屹屏蔽人民樂清宴毛物競般裔正光水德衰沈淪入荒翳倔強兜牟族狂忍恣剗
穹蒼厭昏德五日照妖沴豪椎鐵山碎力奪金人祭單于設都護受降奉盟誓巨慙起幽陵荒服咸反噬
自此外聲教隔絕終唐世阻干部族昌遙蜚霸圖繼鳴驛室韋逐橫戈屬珊瑚稽古制郡縣南面華風泣

豐州及淨州。表裏山河勢。金元代更易。沿革事無替。紜軍繇招討。羣牧準前例。維昔勝國中。義輪靈霧曠。板升一以築。官雲重顛癢。所幸殺運終。女戎生燕嬰。表餌糜金繒。墉言貯婉嫵。甄甄四十秋。驅場日睥睨。桓桓我文祖。西略六師隸。宏基恢漠南。岳服走徒隸。經今又百年。山高水清厲。書生挾策至。幕府富雄製。寒泉九十九。弔古足流滯。攀緝寫作圖。紀勝擬書契。別來三改歲。相逢河淮滯。維舟一夕共。去住兩迢遞。三亭慎遲留。行矣吾繼逝。

夏夜集古榆別墅以月上風徐爲韻得上字

空館無繁聲。庭戶延虛敞。幽人暫息鞅。俗客謝來往。過從皆素心。約履及三兩。清談愜我願。雜坐忘少長。夕風來舒舒。琴樽薦餘爽。古榆濃翠深。暝色勿復上。歡情託遐眇。矯首賦河廣。小佳亦云佳。吾意屬孤蔭。

題霽堂三十三峯草堂圖

研隄塵。浴春星。翦鷺溪。緝揮蚶蛤。阿誰寫此三十三。朶芙蓉。青傍富架。築白版屋。日未向午。門常扃。雲浴浴兮樹冥冥。石細路古盤。螢蛉。暨陽先生卜居處。畫手慘澹供模型。先生異材振羣雅。天錫難老歸長齡。平生作客不作宦。弓衣好句遐方聆。談經容寫異馬鄭。摛詞豈願儕溫邢。學成名立五十載。冠蓋絡繹釋交前。廷故山往往坐拋擲。空令歲月搖千莫。尋常捫腹且讀書。餘年準擬餐芝苓。太平天子重儒術。要使者宿班頭廳。浴堂之西拜詔入。烟霞未許長居停。先生此卷慎藏弄。歸田後約煩丁寧。猿驚鶴怨幸勿爾。夙

懷但遣盟山靈。他時載酒隨弟子。好事借欲書幃屏。瀼西筠溪莫浪語。役驅花鳥眞勞形。舊聞看續吳地記。再向某邱某整一一微圖經。

楓香驛題壁

江驛近江城。陰陰夏木清。四山渾雨氣。一路足溪聲。攤飯安長簞。微吟對短檠。勞人最多感。飄泊若爲情。

送陳桂汀表兄楚游卽用齊次風太史原韻

晴川春樹楚天波。風物於今問若何。漢水西來環赤壁。巫雲東下接黃坡。歌徵子夜纏綿切。賦入申椒感慨多。無限江山助文藻。壯游眞不羨鳴珂。

烟水迢迢鬻子城。郎當風鐸送君行。莫偕宋玉窺隣里。偶借蕭公作騎兵。官閣攤書清晝夢。閒宵聽雨對牀聲。來朝我亦揚鞭去。紫塞前頭一鴈橫。時予有宜府之行。

過土木驛

一簣荒蕪統幕城。土木本稱統幕。今蓋語訛也。戰田犁盡綠郊平。老成當日誰謀國。中貴何人竟盜兵。忍使蛟龍愁失水。幸無金帛與尋盟。傷心瀚海銘功日。絕漠空煩三駕行。永樂三出塞。勒銘曰瀚海爲鐫。天山鏤云云。

冬宵獨坐漫賦示蘭浦任齋

嚴風槭槭小牕寒。爐雪初銷絳樹殘。此夜月華空似水。更無人起捲簾看。

升降依人澹一燈。栽詩輕琢硯池冰。茶烟塵榻清無寐。氣味真如退院僧。
故人別我挂征驂。滿目離情酒不酣。空羨隨陽一繩鴈。年年冬盡到江南。

北郭聯吟

邵墳豆莢翠眉尖。塔下蓴絲雉尾纖。得似唐南梅醉好。紅玫瑰糝水晶鹽。

邵皇親墳出蠶豆最肥實。三塔蓴菜最芳鮮。塘南出梅土人醃

以供客色香迴絕。

梅花勝日數西溪。永福山門路總迷。試上獨山山頂望。村村香雪壓簷齊。

西溪梅事最著。近日橫里獨山村人以種梅爲業。花開彌覆十里餘。

餘

高柳風蟬噪夕陽。蒔秧歸去酒瓶香。方池纔滴紅菱雨。曲牖疎牕過晚涼。

荒塍古堦暗栖鴉。環珮魂歸識帝家。春雨野棠開自落。無人知是玉鉤斜。

六墓村距塘西七里。宋宮人埋玉地。今堦漸埋矣。

董元度

字寄廬。號曲江。平原人。乾隆十七年進士。由庶吉士改官東昌府教授。有舊雨堂詩集。

蒲褐山房詩話。曲江寄興蕭疎。不爲繩約。改庶常後。乞假南游。來往蘇揚間。寓虛雅雨署中。最久。與余同舍。每把瓊論詩。斷斷不倦。於其鄉先生王貽上。趙仲符。兩公咸所宗仰。未嘗有軒輊也。乾隆丙午冬。余以入覲過保定。曲江適主蓮池書院。往訪之。則已頽然老矣。仕途僂蹇。連蟄以效。故其詩清婉中多感慨之作。

冬杪太史王丈西園先生暨之岩侍御紹衣翼子兩同年邀同李雲卜先生虞典孝廉游陶然亭

澹日冷平臯。寒林倚荒圃。招邀上孤亭。不記春前路。憶昨早春游。晞陽媚烟樹。冰開新水融。蘆長才如筍。隔林紅杏花。啼鶯不知處。日月曾幾何。蒼涼失其故。一年京雒中。十丈迷塵霧。何期心眼開。噩夢如初寤。高坐敞虛窗。廓然成野趣。庾公興不淺。少長愜情愜。逝景豈可追。茲游良非誤。

夜雨讀朱太史次筠李上舍蟠木聯句見示詩慨然感賦得六十四句

屋漏夜淙淙。新舊雨相續。短檠伴深更。嗒然同槁木。何來石鼎詩。忽忽動心目。掩卷幾沉吟。愁腸轉車轂。束髮入名場。章句恥碌碌。希登作者堂。大雅繼芳躅。麻中能直蓬。他山可攻玉。山谷鳥嚶鳴。友聲應林麓。車笠訂鷗盟。上下雲龍逐。琴臺有朱君。矯矯雲中鶴。隴西佳公子。溫溫荆山璞。先後結同心。氣味芝蘭郁。吾鄉名士多。山川倍清淑。佛慧數峯青。明湖半城綠。俯檻聽鳴泉。蠟屐訪修竹。互荅以行歌。夜闌更秉燭。白雪罷吟壇。慷慨思重築。聚散十年閒。萍飄不相屬。強踏京華塵。抗顏還走俗。蒙頭雪千絲。堆胸愁百斛。依然一故吾。天高漸跼促。翳我同袍友。華藻振新沐。或登瀛洲侶。然藜校天祿。或鼓成均篋。槐市扇芬馥。聯牀感離羣。古道交相勗。示我索和章。百感互相觸。回首憶同游。落落碁布局。雲散而風流。勝會詎可復。況我本散人。底事自羈足。風雨攪中宵。舊夢縈心曲。漁洋曾有言。成句吾能讀。冷落鵲山湖。幾人爲令僕。

偕沈學子陪雅雨丈渡江宿金山

生長齊趙閒。未涉江湖水。欣附元禮舟。談笑渡揚子。張帆出瓜步。豁然心目啓。天水接空濛。浩浩去海底。

隔岸數點青。突兀三山峙。艤艫若輕鳧。東下疾於駛。風利忽思泊。繫纜金山趾。舍舟快登臨。逍遙陪杖履。迴望廣陵城。烟樹真如薺。

渡江

平明漠漠霧全消。遙指邗溝廿四橋。渡口微風催短棹。海門殘雪咽寒潮。驚心歲月愁方劇。放眼江山興尙饒。自笑孤蹤似蓬轉。一年三度過金焦。

送別鞠未峯前輩

十載南樓折柳枝。驪歌重唱鬢成絲。客逢異地忘飄泊。人過中年重別離。海內同心惟舊侶。天涯屈指幾新知。那堪先後邗江棹。正是秋風乍起時。

題雅雨盧丈平山高會圖

好憑高處豁雙眸。載酒頻來作勝游。地脉遠從全蜀至。山光坐向大江收。銜恩轉運重持節。遲客登臨獨倚樓。一自冶春文讌後。代興畢竟屬齊州。天涯倦客病維摩。仙侶聯舟一再過。饒有烟霞隨杖履。不妨山水當笙歌。梅分官閣寒香早。月傍揚州夜色多。好事屏風傳饜饌。使君鬚髩未全皤。

移居

一肩襆被便移家。藥裹書囊不滿車。薄宦乍叨方朔米。故人昨寄玉川茶。窗前殘雪初堆砌。夢裏寒梅已著花。爲憶鄉園小兒女。圍爐相對話京華。

舟行雜詩

漁莊蟹舍接菱蒲。浩淼烟波夜月孤。一棹檣燈數聲舫。輕舟已過獨山湖。河流瀾瀾柳毵毵。綠酒銀鱗盡日酣。回首嶧山青不見。長年捩柁入淮南。

紀復亨

字心齋。歸安人。乾隆十七年進士。官至鴻臚寺少卿。

爲徐友竹先生題夏山圖卷

眼前何突兀。睹此夏山圖。匠心出北苑。畫手今東吳。連山起何處。駿馬爭馳驅。竹樹忽虧蔽。村落相縈紆。石蒸雲氣熱。澗繞林風蘇。高人靜無暑。長日狎鷗鳧。幽境造鄧尉。烟波廓具區。懷鄉轉綿邈。撫跡空踟蹰。昨與髯翁約。謂程魚門卜築同吳趨。毋與城市近。但爲山水娛。寒梅結茅屋。乳竇通齋廚。客漫計寒餓。天或憐疎迂。圖今爲息壤。鑿此盟不渝。他日接几席。翰墨隣不孤。

沈清任

字萊友。號莘田。仁和人。乾隆十七年進士。官至川東道。

十一月三日重過娘子嶺

木葉脫將盡。殘秋又早冬。三年思遠戍。匹馬立危峯。老衲清茶供。征夫玉粒舂。明春兵事息。民氣定從容。
爲千秋汀作畫每幅系以絕句

蹀躞同霑馬足泥。蕭蕭吟篋落巴西。蠶叢烟雨連天碧。寫作儂家罨畫溪。
連卷老樹秋風健。寂寞寒烟古道斜。和淚寫來都不似。同岑萬里各天涯。

斷港平沙葦葉秋。天南極目碧雲愁。不堪孤影空江老。一道哀鴻月滿洲。

雪壓馱峯霧幕張。五更刁斗斷人腸。短衣匹馬南山頂。風雨瀟瀟相對牀。

壬辰夏秋之交。予與述庵銀臺。秋漁員外。及浣花刺史。並在卡

了軍營。述庵秋汀同幕相洽。及今圖此。情味宛然。

三尺枯筇走浣溪。天涯吟客一時齊。梅花十斛春如海。老我曾經索笑題。

前歲春初集晴沙觀察榕櫺。查丈。吳白華庶子。王審淵太守。楊

笠湖刺史。及曹秋漁。秋汀主人。朝夕尋題於此。

門前垂柳嘶斑馬。牆外新醪過綠醅。落落晨星何處覓。故人真个畫中來。

松花落盡松根老。半顆茶煙石乳香。我欲東山尋屐齒。那堪零落謝家郎。

謝軒鑄。孝廉。東野。同年。長。君。秋汀。壻也。年未三十卒于家。秋汀

愛其松聲。茶小熟。花影蝶雙飛。句屬寫此。以寄恨。

四圍流水清風徑。兩鬢烏絲玉疊山。桐帽棕鞵收拾去。與君比屋話烏蠻。

張鵬

字紀常。號楚門。吳縣人。乾隆十七年舉人。有楚門詩文稿。讀史別情吟。橘膜編。

鵷燕

燕生八九子。知傍誰家屋。羣飛入簷牙。高下翠可掬。翩翩不禁風。喃喃競相續。豈忘朱樓好。而念幽人獨。愛茲毛羽新。愧我華顛秃。

移寓

重來銷夏處。境僻足清幽。不傍梁鴻竈。常登王粲樓。書聲風捲出。花氣月勾留。但望中郎到。青衫典酒籌。

舟過匠門志感

滑滑泥妨步。舟從曲折移。水枯橋影沒。沙漲櫓聲遲。一塔撐雲出。千簾護雨垂。干將門畔過。良冶想鑪錘。

聞鴈

一夕清霜落葉紛。北窗夜靜鴈聲聞。淒迷冷咽三更月。斷續寒衝萬里雲。茅店夢回驚驛路。玉樓人起瘦羅裙。年年不負愁中約。待得鶯花又送君。

秦淮水閣

虹影落晴波。羅衫颺棹歌。似含淒怨意。楊柳六朝多。

湖海詩傳卷十五

翁方綱

字正三。號覃溪。大興人。乾隆十七年進士。官內閣學士。左遷鴻臚寺卿。有栖霞諸藁。

蒲褐山房詩話。覃溪年甫及冠。已入詞垣。而精心績學。宏覽多聞。所著兩漢金石記。剖析毫芒。參以說文正義。茂欲駕洪文惠而上之。近年研精經術。嘉慶己未。予入京師。見其方考禹貢。顧命兩篇。諸儒同異。相與辨難。斷斷竟日。詩宗江西派。出入山谷。誠齋間。雖嘗仿趙秋谷聲調。譜取唐宋大家古詩。審其音節。刊示學者。然自作亦不能盡合也。書法初學顏平原。繼學歐陽率更。隸法史晨。韓勅。諸碑。生平雙鉤摹勒。舊帖數十本。是以北方求書碑版者。畢歸之。

陶然亭雅集分賦呈述菴先生

旗亭畫壁詩。偶出騷人託。英靈間氣集。又非一時作。公錄湖海什。聊仿真率約。筵雖萃簪紳。體不拘臺閣。秋聲入蒲褐。拈出當郊郭。城陰葭菼間。山翠衣襟落。夕陽烟濛濛。飛鳥去寥廓。觴忽望遠停。臆爲懷人拓。同聲感于喬。在陰和爾鶴。日佩湘皋蘭。誰喻檀園擇。琴理了無因。畫稿從何著。試續西園記。還訂重陽酌。

早發德安

七月十四日

犖确高下中。蒙蘿若無路。前輿跨灣環。後騎披草樹。蛇騰與猿挂。裊窕知幾度。建昌達星子。一逕取斜注。直避鄱湖險。繚繞屢穿互。與人肩左擔。僕夫泥沒屨。我亦衣袂上。飽裏山葉露。晃蕩日出高。曲折隘口赴。

香爐生紫煙。句髓今始悟。

靈秀泉

雍正十一年癸丑季冬董文偉記云。試院落成日有泉出堂階下因立石名之。

院居山麓間。泉出堂階下。傳聞始庀材。泓然映新瓦。實爲人文兆。豈比聲聞假。我來試手爨。測量遞杯罍。恍乎於水監。以告飲泉者。學務源委尋。功敢晝夜舍。千峰蒸靈液。一眼始輪瀉。蔭樾交桂枝。泉上即聰明比蓮社。東林寺秀峯寺皆有聰明泉勿務發脈長。深愧瀦蓄寡。側望玉簾飛。忽送山風灑。

出南康府城西門望廬山雲氣

門開星灣北。郡抱沙洲面。旬日風四霾。晨容豁一變。融融霽氣中。野曠山葱蒨。我與匡廬君。始以真相見。兜羅冒半腰。玉簾垂一線。濛濛噓淡白。吞吐青瑤片。大哉膚寸澤。端可六合遍。顧以晴翠光。洗我連宵倦。衡雲禱無私。海市祈敢炫。半日竹輿上。冷風有餘善。

玉淵潭

步出長松門。猶聽松濤響。路滑不容立。俯測潭深廣。奇哉玉淵字。其氣雄千丈。建瓴東北來。直瀉勢莽莽。到此一洞漩。小作圓折養。然後萬珠璣。滾滾橫摩盪。割翻水晶宮。神龍掣蛟蚌。精靈來會合。虛無出惚恍。誰識中粹溫。玉烟浮盎盎。拈破鯢桓機。何如求象罔。

五老峯歌

五老峯如五老人拔地千丈青嶙峋。廬山諸峯出其下。前後遶鄰皆兒孫。我從七峯遊。三峽湖濤疊翠蒸。曉瞰全湖之勢西北拱。到此始見峯雄尊。衆峯西來擁屏障。一峯屹立蒼烟屯。一峯纒住二峯起。肩差相讓顏相溫。三峯中峙最雄厚。背負龍象騫鵬鯤。四峯與三嶺相亞。其五離立仍孤蹲。五緯之精降南極。榮光河雒騰天文。衡霍中間控翼軫。斗牛紫氣三垣分。聚來匡廬奇秀處。千里跌蕩開天門。面南炎離炳正位。香爐獻壽精氤氳。日月光華雲霧窟。霞裙星珮清淨身。妙鬢曾鋪大雲海。今晨萬里無纖雲。我與老人來對面。豈借點綴空繽紛。維岳極天作屏翰。政要會合眞精神。山靈知我意有在。積翳一洗人文醇。乾坤清氣在神骨。必鍾靈淑於秀民。湖光圓碧鋪玉鏡。山容紫翠澄秋旻。仰見蒼顛顧我笑。試叩眞宰堪共論。晚來雲意仍四合。讓我游過徐吐吞。我詩不要海綿語。請問初白誰識眞。查初白有五老峯海綿歌。

雲片石

德雲菴過白雲菴。遙見蓬蓬雲滿院。度橋小憩橋西亭。我與白雲初對面。一西一東從何來。滾滾濛濛翳深殿。忽然結作萬戶戶。羅列撐空諸恠變。縱橫掀舞掉尾脊。觀者循廊目爲眩。我從峰頂得脈來。雲葉雲根初一線。瓔珞華交妙鬢旋。芙蓉葉接兜羅冑。泊水中央四合抱。飄如衣袂飛如練。茫乎浩乎大雲海。蛟鼉崩嵐來酣戰。霽者下垂圍上升。墮掣流星圓劃電。攝之靜坐凜仍逼。氣欲蒸空青可鍊。道人莫漫拈幻形。但執天花石巖片。

天開巖

西嶺不識朝暎升。地險石巨排層層。中開一逕豁石壁。危梯如削不可登。何年巨靈以手劈。巖谷呼舞相
然。譬尙餘石縫作開合。右脅一掩千峻嶒。石花噴綠苔蘚漬。半巖松氣青相承。始知初日罩巖際。萬峰直
下皆欄凭。赤文綠字儻可迹。架厂鑿戶初誰勝。傳聞岌嶮三大字。開巖近自釋惠能。又聞南唐二徐筆。螺
篆遺法光金繩。捫蘿四顧渺何在。千佛題字迷荒苒。巖深去急覓未遍。禹碑摹本空嗟稱。俗儒信耳不信
目。此習亦到巖間僧。二楊釋文太搯拄。嗟此何足相蟲冰。巖前謾謾風掠耳。露襟側帽寒凌兢。

受翠樓

紫閣峰轉太古堂。曲房直檻交迴廊。樓背有峰峰背樹。十步五步皆礪岡。宋齊以來垂黛綠。真色不受秋
空霜。修眉嫵顏與列髻。凸凹濃淡排青蒼。今晨雲霞昨烟雨。石竇炯炯穿初陽。中峰左右屹兩股。萬松萬
壑森相當。迴環到此大結束。臨高臺以層軒張。拍肩挹袖絢掩映。遠深近淺收丹黃。漸空漸俯忽無際。奇
哉疊複不可詳。江東諸山出檻外。緣遶京口兼維揚。陰晴明滅極萬變。嵐烟江靄同一光。千里面規半掩
勢。六扇窗甫寸目價。造化增損巧結構。嗟此位置誰料量。更有亭乃遜此。其視平碧惟松篁。乘除可悟
消納法。頓挫起伏皆文章。盪胸之雲一抔瀉。迴輦忽又撥滿囊。翠從何來不可記。旭照雲海仍茫茫。

九曜石歌

九曜亭邊九曜石。南漢劉龔故苑之遺跡。愛蓮種蓮事俱往。千載仙湖水猶碧。前秋訪石因登亭。周遭顧盼疑列星。五日輒乘使車去。未得剜苔剔蘚恣畱停。古色摩挲入夢寐。巾箱髣髴圖真形。一石圓頂如建瓴。危根下削激清泠。一石四達如疏櫺。旁有直幹撐鈴屨。樹與石抱石轉青。往往樹皆過百齡。不獨昔日太湖靈壁浮海至。影沙激浪增瓏玲。崩雲散雪那遽一一數。但覺嵌崑崙兀勢欲凌滄溟。昨歸經冬水初退。坐看家僮洗萍塊。雨溜磨崖字尙存。泥淤仙掌痕還在。盧程許刻次第尋。陳九仙書竟晦昧。不知米家詩句刻何處。想在老榕巨根內。文藻同時有傳否。亭沼何心嘆興廢。九曜石。今日誰能識。音爲九一石獨合三石成。此語聞又百年後。藥洲兩字亦是元章題。斜日蒼烟但翹首。

漢石經殘字歌

熹平初作皇義篇。石渠故事追孝宣。通經釋義事優大。文武之道非丹鉛。雕蟲篆鳥那比數。鴻都未立前三年。議郎意不在工畫。蓋以正誤代傳箋。蘭臺漆書敢私易。煌煌日月當中天。四十六石堂十丈。聚觀車兩爭駢闐。楊家遞著洛陽記。宋初尙有斷石傳。東觀論出御史府。論語跋記董廣川。成都會稽各撿篋。洪相八石精摹鑄。因依破缺非貌古。太璞粹氣逾于全。吾鄉孫氏研山笈。南原摹本殊不然。隸原隸辨槩與籀。毛槩黃槩烏非焉。鄒平復聞張氏本。研山又落吳淞船。義門每用譏退谷。弄藏鑒別相後先。盍毛包周證魯義。歐陽夏侯訂孔編。越州閣圮海水綠。柯亭桐爨朱絲絃。玉邸半圭虹貫斗。龍頷百寶珠騰淵。崑山

顯亭 四明萬季野 各有記。我欲彙續無由緣。便當摹勒自此始。涓濡瀟瀟且尺研穿。乞名蓬來扁小閣。賀梁語
驚來翩翩。

漢建昭鴈足鐙款拓本爲述菴先生賦

井序

述菴先生以所得漢銅鴈足鐙款拓本見寄。其文曰。建昭三年。考工工輔爲內者造。銅鴈足鐙。重三斤八兩。護建佐博嗇夫。幅掾光主右丞宮令相省中宮內者第五故家。又云。後大廚。又云。今陽平家。畫一至三。陽朔元年。賜愚按此鐙與揚州馬半槎所藏形式相埒。而逕圍稍弱。半槎所藏者。予嘗見其拓本。中間云。重三斤十二兩。以今所見此文云。三斤八兩。正足驗漢代權量相去不遠。而厲樊榭詩注乃云。四斤十二兩。則太懸絕矣。末云。護工卒史不禁省。此七字爲句。其下又云。某宮內者第廿五。正與此鐙中宮內者第五之文相應。而樊榭誤以某宮句與前一行連讀。遂訛省爲首。又誤牽薛尙功鍾鼎款識所載蒲阪首山宮鐙之文。不知彼自在永始四年。與此無涉也。蓋半槎所藏者。銅質半蝕。其文難辨。遂致省訛爲首。卒訛爲衣耳。考漢孝成鼎云。守令史永省。又大官壺云。主太僕監掾蒼省。又綏和壺云。主守右丞同守令寶省。蓋省乃稽察之義。猶漢碑云。察書也。今是鐙字字完好。且造於建昭。賜於陽朔。一器中有西漢字二段。尤可寶也。爰作歌系於後。

厲徵君詩內者銘。我見拓文未見鐙。君今爲拓鐙款寄。使我砭誤心忤忤。甘泉秦時修故事。河東后土屢

薦馨初元以後開歲舉不獨汨選更迂經誰歟傅會首山祀荆山之鼎朝萬靈賈慶造鐘在永始不合牽引來竟寧昔屢疑之未敢質得此款記尤可憑其槩規旋徑稍弱漢權漢尺原相乘底曰建昭側陽朔故家畫一於陽平前鑄後識歲一紀八分小篆絲迴縈歐公恨少西漢字今乃一器雙妙并陽朔之題更圓勁元尙急就篇初增半槎所藏字半蝕幾被亥豕紛訛承孰如此鐘底瑩澤燦若列宿捫生稜劉敞裴煜不可作林華蓮勺誰能評我詩不憚證焚榭君藏庶可追廬陵

述菴先生見示新詩并惠周元公道州拙賦八分石刻賦謝

披岡聚米當登臨握槩懷鉛盡好音岸柳春風前度影江船夜雨故人心口窩賦古波痕在挂月巖高草逕深判共城南亭子上晚涼斜日試追尋

栖霞道中示謝蘊山

尙記城東並轡歸詩情先逐曉雲飛重陽細雨遲黃菊六代精藍冷翠微遠眺合教青眼共深談喜未素心違洞天且莫題名姓苔蘚濛濛恐溼衣
峯巔一宿記吾曾已覺塵勞句可憎禪畫只添雲半幅幽居豈在屋多層儘饒泉響來供客如許松陰可少僧尙恨不逢新雨後栖霞三峽恐難勝

顧光旭

字華陽。號晴沙。金匱人。乾隆十七年進士。官至甘涼道。署四川按察使。有響泉集。

蒲褐山房詩話。晴沙數歷中外。雅著循聲。早遂初衣。杜門養母。人尤以風節高之。生平詩文而外。尤精書法。今世工書名者。北則劉相國。崇如孔。主事中山南。則梁侍講山舟。王太守夢樓。而嘉興周觀察。稚圭及晴沙。頗頹其間。殆無媿色。由甘涼道。從制府籌運西川軍務。所過蠶叢。鳥道。多作詩紀之。丹徒陸炳錄入蜀徵詩鈔。

鄂陵月

癸巳閏三月之望。宿鄂都官廨。月上酒酣。兀然而睡。夜過半。起行庭中。清光爛然。憑闌坐翫。援筆得長句。

放舟不到巫峽雲。拄杖不到峩帽雪。仙都清氣盪胸來。欲捉銀蟾入蟾窟。軒然已掛庭樹枝。對影持盃醉兀兀。隱几未覺青山橫。擁衾詎識華燈滅。神清夢冷沁肌骨。斜逗一痕窗紙裂。攬衣啓戶思欲絕。銀漢迢迢玉壺澈。萬里而遙江影長。四更以後天容闊。假令斫却惡木陰。定放清光到牆缺。人生對月坐飄忽。看我星霜點毛髮。小時笑指白玉盤。壯歲常依青瑣闥。瓊樓玉宇幾度看。蜀棧隴雲行未歇。巴舟十日浪拍天。嶺色千重雨如潑。信知春月令人悅。驅烟埽霧春雲活。一春明月今宵發。五魚山名躍出江波凸。月上如環復如玦。月落啼鵑更啼鳩。籌筆無能謬持節。聽雞爲賦鄂陵月。

弓插

隔水斷漁樵。橫斜壞木橋。燒痕空樹腹。雲氣束山腰。已信人蹤絕。猶看鳥道遙。巉巖餘舊壘。半壁見堅礮。

送人還江南

細雨華陽國。嘉陵江水生。綠波與春草。萬里蕩舟行。山木啼鶻路。汀花過客情。鄉心渺何許。直到海潮平。

冬杪沈莘田招集張氏園亭分韻得支字

小築城隅路。殘鐘歲暮時。樹容臨水淨。鳥影度雲遲。欹石孤藤絡。平橋獨木支。誰將巖壑意。折簡爲催詩。

渠江絕句

軟輿輕夢宕渠邊。林鳥頻呼上渡船。綠到鴨頭春水足。嫩晴風色薄雲天。

天妙閣

濯錦江空還似練。大峩山遠只如眉。天邊風露無聲處。獨立西南月上時。

蔣宗海

字星巖。號春農。丹徒人。乾隆十七年進士。官內閣中書。

送人靈隱出家

百年身世等浮槎。脫却儒衣壞色加。聞道授書還有女。可堪彈鋏已無家。靜參南嶽千篇偈。飽看西湖十里花。他日相逢惟一笑。雲天瓶水是生涯。

周大樞

字元木。山陰人。乾隆元年薦舉博學鴻詞。十七年舉人。官平湖教諭。有存吾春軒詩鈔。

蒲褐山房詩話。元木在京師。寓虎坊橋小蘆衙門。有大井。老屋三間。蓋鹽終日。予贈以句云。小住常依元亮井。出遊誰問孝廉船。蓋紀實也。學博而才長。滔滔莽莽。動以數百言。蓋其時浙中詩人如胡稚威。桑岑甫。皆門奇騁異。故元木亦如之。然文從字順。自較兩家爲優。

丙申九日同趙虞咸文熙韞山文照兄弟登高柯山燕飲終日

好山如名人。秀極照心目。雖無千仞高。磅礴意自足。峯轉路更幽。雲開嶺還複。霜氣變疎林。晚紅間危綠。

芳質鬱嶙峋。斧鑿轉繚曲。何山石夙供採伐。深入山底。遂成石蕩十餘。窅然得大穴。有僧倚茅屋。清泉十餘泓。寬者極百斛。蛟

龍深或藏。魚蝦多可漉。東南入古刹。石佛涌丈六。經始記赤烏。彷彿字可讀。西行愛小菴。千竿戛翠玉。絕

頂望鏡湖。冰紈曳長幅。烟洲錯其間。瑣碎供麗矚。方者侔削觚。員或類輪殼。長嘯逗林杪。驚鳴下鸞鶴。萬

籟號天風。清音競絲竹。二子俱拍手。呼僮酌醴醕。半醉脫帽舞。滿頭插黃菊。日莫不肯歸。更深秉明燭。

病眼數月不愈。客勸靜坐。省思慮。以養之。乃復作詩自勸。可一笑也。

眼爲見色根。天燭含內景。品然蒲萄朶。流逸奔萬境。愧非杜又姿。點漆瞳雙炯。春風惡作劇。吹火變微告。

初如刺錐末。巖電爛俄頃。紅碧炫狂花。舉目礙游騁。生平阮嗣宗。途窮悵莫逞。多白殊少青。不見覲女覲。

厥罰更何爲。數月類朦冥。酒卮久不親。書帙亦復屏。刮膜無金篋。盧醫日煩請。欲速醫轉深。徒然怒生瘰。

有客張淇流。古方傳示做。曰此大火聚。弗熄勢將猛。絕慮去其媒。治躁厥惟靜。譬如水沸甑。爨止則清冷。

低徊聽客言。豁若咽去鯁。顧視小窗虛。天光自問問。

都下食冬筍和稚威

論心思故人。適口思鄉味。鄉味不靳珍。故人不靳貴。平生酸鹹意。往往殊俗嗜。盤殮足葵蓼。紅碧自相媚。雨翦春韭肥。霜摘秋菘膩。佳品劇三冬。箭萌深斷地。攫攫凌雲心。包含見銛銳。莖以芥菹綠。風味兩成契。翠篠團東軒。故人曾此對。騎馬向長安。旅食隨所寄。獻賦廁班揚。天廚拜珍賜。一飲勺藥和。頓洗藜藿胃。遇合會有時。蕭條奈垂翅。安得漢陽錢。衝寒買歸騎。忽此鄉味新。如與故人至。把酒對故人。歡言不辭醉。何用羅葷羶。一箸萬錢費。遠夢促歸心。揚糲及春季。園林迸籊龍。穿籬萬頭出。有買不論斤。玉管愁破碎。桃花煮斗米。千畝吞清翠。

東牟怪松歌小引

松在寧海州治之城隍祠。長六尺耳。而大合抱。枝柯盤鬱。團陰數畝。真怪物也。

怪松昔夢天台圖。怪魁作讚生嗟吁。巖因穴械可笑貌。何異文采彰崎嶇。竭來海國見此樹。意態宛與前圖符。孤根拔地甫肩及。螭拏鳳攫橫鋪舒。低頭再拜起卻立。爲君徑前捋髭鬚。君懷落落勢萬丈。岌強自與常人殊。天風怒起作濤響。潮汐澎湃還交輸。張蒼九尺自佳耳。臣朔一囊將何如。豈無淳于及平仲。壓倒十萬長身夫。凌雲特起縱斤斧。拔擢杞梓連枯株。大宋細栢各有用。莫以朱綠銜以珠。或駕國馬馳交

衢亦有貫月三秋桴。不然偃蹇空山隅。餐英彷彿來仙姝。胡爲潦倒混城市。坐令拍手羣擲揄。蟲穿蟻剝古社側。臃腫十圍同散樗。柳州作記竄逐後。虞卿著書窮愁餘。爲君嘆息復起舞。仰視亭亭白月孤。

長安燈夕篇

東風吹徧鳳城春。晴旭暉暉麗色新。雲舒三素環璇極。鵠立千官侍紫宸。芙蓉雙闕峩峩起。王侯夾道羅朱邸。十二交衢練影浮。東西翠幃流波駛。去去流波歲復年。畫雞貼燕鬪方妍。纔過翦綵來人日。又見傳柑話上元。上元綺節春無價。華燈處處懸朱榭。由來繡陌隘行人。況是金吾罷呵夜。夜影迢遙瀉月華。吹笙伐鼓競紛奢。漸晃星毬留白晝。全開火樹煖千家。千家萬騎喧喧出。紅榮皓魄交光射。別開鏡市向壺天。爭舞文鯨連太液。鳳腦虬膏雜豹脂。繇花倒暈笑枝枝。明綃薄似瓊雲護。寶絡紛如珠露垂。游螭戲殺來無數。涎涎玉燕亭亭鷺。裁成新樣值千金。費盡妍心邀一顧。別有仙人列似麻。絳幡緋纛擁雲車。一羣日戶飛炎鳳。十丈天台建晚霞。杏梁錯落明珠迴。披敷厭勝垂蓮井。銅琶錦瑟鬪新聲。畫燭金鸞叢豔影。豔影新聲劇可憐。脂開北地靨痕鮮。盡圍獸炭茱萸幔。未散鯖盤瑋瑋筵。魚龍百戲紛相逐。膺膊春聲催爆竹。榮光深照玉河明。香霧遙連西嶺複。百年秉燭幾歡娛。此夕繇華不可無。人間爍爍飄朱燼。天上離離見白榆。脛闔爭路飛埃裏。貴游意氣凌霄紫。橫陳方褥凭絲囊。爭看文衫結珠履。紅驄驕影響瓊珂。相逢趙李夜經過。換將寶玦千樽醉。擊碎珊瑚一曲歌。銀旛花勝春人聚。鈿車相喚看燈去。慢水層層燄裏

迴行雲片片烟中度。譙鼓遙擗漏轉深。蛭膏猶自耀芳林。燈光似月明君意。月色如燈照妾心。妾心君意交相向。流蘇香煖青牛帳。但使春燈夜夜懸。長教碧月團團漾。曲街長街去復來。管絃轟續幾樓臺。生憎啾啾雞聲早。不奈曠曠曙色催。年年行樂昇平日。浩蕩堯衢忘帝力。禮樂調爲玉燭光。圖書煥作卿雲色。西北還聞罷舉烽。征人迴馬戍樓空。春風併度羌中笛。明月長彎塞上弓。翩翩枚馬承恩遇。拔擢榷柁連箇篋。已看燭影送金蓮。更使銜痕畱玉署。寂寞東來獻賦人。藜釭獨對客愁新。夢迴憶得江南岸。索笑垂垂一樹春。

隆福寺觀市一百韻

天街古剎東北隅。峩峩丹碧暉琳珣。長廊千步直且紆。吹螺擊鼓棲繙徒。一月三集作市區。問胡爲此貪其租。紛紛日出誰見驅。車牛擔負來蔽途。隧分貨別期速沽。由來方物集帝都。冠袍靴袴裙與襦。羅紈綺縠充曳婁。別其黑白亂紫朱。虎豹狼麕貉鼯鼯。千羊之皮千腋狐。別有金雀繆以珠。珮環簪珥飾彼姝。食味適口萬品腴。豚肩雞臠何足樓。橙拘鮎鱧羹鴈臠。醯醢千甕酒百甌。秋菘春韭筍及蒲。檀梨棗栗落萬株。厥包橘柚來荆吳。糗粢餅餌雜粉麩。饑餓粒粒滑比酥。松風茗薺烹玉壺。近者尤尙淡巴菰。入口烟裊一縷孤。屬有百疾葯物扶。或進苓豕營菖萸。其器松栢兼檀榆。彫文彤漆黃金塗。北人燔土作釜杆。亦雜定汝堆盤觚。刻藤三萬葉。几鋪麝煤鳴眼及鼠鬣。赤脚之婢長髯奴。有畜在圈禽在笈。爲君擊筑歌烏烏。

琵琶箏笛簫笙竽。就中青幕紅氍毹。罇彝舊物誇璉瑚。大者鼎鼐小者爐。一刀一鏡一甌盂。歷歷似閱宣和圖。或參外貨工詭殊。中庭卷帙良可吁。苟錯諸地藉以芻。坐令盆垢紛相污。故知世俗多輕儒。雜沓寺外臨交衢。千蹄馬市混驥駑。驟驪驪駱魚駒駟。涓人已死伯樂徂。有脚千里何爲乎。珊瑚鞭玉勒金僕姑。壯士來買五石弧。吞刀吐火緣都盧。蒲人雜婦百戲俱。黃衣道士賣佩符。或矜祿命推榮枯。歲除正見書。茶駢闔萬足唯利趨。顛倒輕重欺精粗。子母出入心計劬。僮僕鼓舌爭錙銖。古者爲市法噬膚。負販救敗思有虞。我行其地適有須。慳囊撲破羞青蚨。廊陰漸轉日欲晡。偶逢刈砌坐販夫。自言八十非故吾。當年交易轉轆轤。大賈不滯小不使。得錢易粟資妻孥。卽今來去空目盱。餘貨壓擔無人呼。我聞此語行踟躕。利以劑義貴灌輸。貧不學齋富自敷。古稱節儉誠遠謨。不度其勢議或迂。升平生齒較昔逾。生產益分得不痛。固知淫巧不中模。饒買乏賣困始蘇。人失人得言豈誣。盡吟蟋蟀歌山樞。富者益肥貧益擢。空諸所有惟浮屠。染指尙復思掛麩。而況蚩蚩彼氓愚。皇皇求利何足誅。有親欲養子欲娛。往來親戚歡臘臚。不得餓死爭須臾。高賢在職民愉愉。

讀書柯山精舍趙韞山以詩寄贈次韻奉答

不妨烟月卽超然。曾讀南華第一篇。成佛未甘居謝後。論文那得在盧前。聽鐘埜寺千山裏。打槩蓮塘萬樹邊。肯作連宵風雨話。簷端只許白雲眠。

雪後石帆太史留宿齋賦詩贈蒼用東坡集中韻

應是前身賦雪纖。多公文彩過徐嚴。脩髯繞作離離竹。妙句清於昔昔鹽。颯沓風聲時撼戶。微茫星勢欲垂檐。一樽試話平生事。退盡鋒稜笑筆尖。

騷淒無定似流鶉。謾說詩書載五車。空谷幾人愁倚竹。長安何處好看花。關山忽漫同爲客。談笑還疑舊在家。此夜漁磯應有夢。板橋紅漾綠溪叉。

陸 燿

字朗夫。號青來。吳江人。乾隆十七年舉人。官至湖南巡撫。有切問齋集。

蒲褐山房詩話。朗夫樞然而瘦。清操自勵。間涉書史。亦多爲樸實有用之學。其文集亦然。著漕運考。若千卷。皆有益于河渠。及爲山東布政。以巡撫貪暴。不相能。乞終養歸。再起。至湖南巡撫時。總督以閱兵抵長沙。朗夫迎謁。畢還署。總督鈕祜祿。特并額來候。直入解中。方午。食見所食。皆菽乳菜蔬。訝之。曰。天不雨。十數日矣。地方官戒殺清齋。故所食如此。總督素豪侈。聞語。瞿然。嘗其奴曰。吾此來傳舍。酒肉如山。何不以前雨具告。聞語。畢。寓舍。悉撤其豐腴。入羹。總督之知過。而益歎君之清德。感于入者速也。其後宰以勞瘁病療。而歿。其友徐貢生。堅入視。含斂。室中別無長物。嘆曰。一餐至此。卽不死。亦難度日矣。今入祀鄉賢祠。

太倉道中

百里中吳水。東流近海門。溼烟通蜃氣。淤岸有潮痕。落日孤城迴。陰雲野市昏。伊人住何所。今夜倒芳樽。

時訪王存素於所居西園

除夕

慣作經年客。今宵倍繫思。酒闌辭歲後。人靜獨吟時。雁去關門近。書來石里遲。遙憐雙白髮。明日又添絲。

偶感

喜無側媚干時術。不作媿媿諛墓文。知己未妨當代少。浮名深恐後人聞。研池餘墨臨窗試。初地清香盥手薰。決計疎狂竊微祿。閉門寂寂似揚雲。

寓園同阮唐山同年作

中庭促膝共蘧廬。諧笑云云習未除。苛節刪於相熟後。淡懷長似訂交初。才華須讓連城壁。蹇劣誰持下坂車。夜久不知河轉角。柳梢缺月挂方疏。

袁文康

字作山。保山人。乾隆十七年舉人。官姚州學正。

蒲鞵山房詩話袁氏爲永昌世族弟兄文典文揆咸知讀書鄉學能悉滇中舊事予先在滇三載作山率其羣從來受業尤喜講宋元人理學而致知格物以陽明爲宗涵養醇粹器識充然益中原土人所少也。

沙陽夜行

飲罷遂扳鞍。不待聞雞舞。游子促鄉心。憾未生飛羽。昏黑巡檢坡。石樹皆豺虎。帶醉下江峰。嚴關已閉戶。

夜靜濤愈惡。莫能辨譙鼓。茫昧一痕天。殷雷送密雨。僕夫怨寒甚。羸馬亦生怒。顧我候繻人。屏息倚簷廡。酒醒相慰勞。世事多愁苦。此行雖彳亍。閱歷非小補。不見題柱人。非遽致華廡。底事哭窮途。險夷悉自取。語罷曙光生。款關率江滸。

馮廷丞

字均弼。代州人。乾隆十七年舉人。官

按察使。

爲曹慕堂題亂仙山水圖

山峰滴翠山骨肥。山樹漫綠兼紅菲。背山臨水開荆扉。約略正枕紆迴磯。仙人拄杖衣丹緋。飄飄獨去忘所歸。涔陽極浦含落暉。亦有遠樹如秋腓。布帆兩葉烟中微。傳聞亂筆仙所揮。叩頭炷香固可祈。安用幻藥調蚌璣。空堂沉沉羃布幃。鈴聲一振風雨飛。鷺溪五尺烟霏霏。慕堂學仙癯不飢。獲此何啻身受禩。邀我作詩窮依稀。我言曷不張房闈。數數注意凝長晷。乾端坤倪忽發機。山水動盪雲因依。翻身躡舟舟橫碕。武陵桃花是耶非。世人撫畫空吁歔。

訪法源寺牡丹因飲王述菴西曹齋中

殘春猶有鼠姑繁。走馬來從古寺看。結夏僧閒都退院。天人惜花人到共憑欄。眼中節物渾相負。醉裏光陰且自寬。不是仙郎能愛客。銜盃那得到更闌。

阮葵生

字吾山，山陽人。乾隆十七年舉人，官至刑部侍郎。

梅花書屋圖爲伊雲林題

去年曾作憶梅詩，細數平生看梅處。朝來乍披梅花圖，此景依稀夢中遇。前山後山雲氣滃，少橋遠帶寒塘渡。數椽精舍寄岩坳，竹外窗前逗香霧。小閣工吟何遜詩，擁書戲擬廣平賦。往蹟君應憶武夷，舊遊我亦懷元墓。草堂空紀古淮干，風雪久拋湖上路。余家勾湖草堂在淮城西北隅，癸巳秋黃水灌城，梅樹皆被淹沒。詩成掩卷轉長嘆，卷端愁讀故人句。卷首有朱五竹君題長句，竹君於前月下世。

周震榮

字清在，號篋谷，嘉善人。乾隆十七年舉人，官武清縣知縣。

蒲褐山房詩話：清在一行作吏，久淹下邑，而嗜書好古，留心金石文字之學，又愛禮賢士大夫，如章進士學誠、徐蕪坡、陳以綱、兩明、經皆延之賓館，所撰武清縣志，詳核有法，又取鄭氏《周禮》注刻之，詩不多作，即此可見一斑。

金塗塔拓本詞

鳳皇山前萬松嶺，碧波雲鶴空遺亭。表忠觀但存二石，金塗塔況餘千齡。深宮五夜範金土，如來西城常畱形。白蓮蹟古已難問，白石詩在猶堪聽。家山夢遠桐鄉好，雅事翠墨爭傳靈。坐想臨安千載上，篤生異

人五季丁。弩卻肯濤樓疊雪。排衙石筍山圍青。萬姓依王王佞佛。佛身千億千穹冥。蜀漢同時紛割據。頻年戰伐悲熒熒。錦繡千山恣逐鹿。觸蠻一角終憐甕。翠鈿紫陌春花釐。私第黃金滄物瓶。還鄉唱罷王孫去。保叔崔巍月入櫺。烏井荒祠遺老拜。北邙宿草東風醒。君去更尋握髮殿。蒼苔敗瓦或有功臣型。

張五典

字叙百。涇陽人。乾隆十七年舉人。官上元知縣。有荷塘集。

乞陸二柳畫水竹屋基圖

吾家涇水陽。古原對畢郢。渭川在其南。修竹千畝整。振衣到崇岡。遊目時引領。斷靄浮太乙。殘雪明秦嶺。獨於蒼茫中。愛此蕭蕭影。風雨自刁騷。晴霽得明靚。心並綠天闊。興隨碧雲永。殷勤約此君。共我茅屋冷。中田兩泉眼。淳滋載枯梗。本來無町畦。儘與窮幽屏。風前揖檉柳。波上俯藻荇。請搦瀟湘管。爲寫篔簹境。潤筆吾已辦。溪茶與山茗。

將之松江

秋風昨夜到來初。料理扁舟任所如。顧我步兵堪絕倒。宦游還說爲鱸魚。

胡溶

字安公。鎮洋人。乾隆十八年鄉試第一。官蕭縣教諭。有吟石先生集。

君子行

君子貴知命。屢空非所憂。身不忘溝壑。心不爲怨尤。飢不飯嗟來。渴不挹濁流。練衫擁冬夏。園蔬薦春秋。行歌時捉襟。出門無所求。立志老飢寒。道義能自修。悠悠富貴子。嗟哉傷蜉蝣。

述志詩

達生觀物理。浮世歎人化。秋鴻足稻梁。春蠶有桑柘。震霆無鳴冬。嚴霜不實夏。百年爲大齊。瞬息亦代謝。君子知自然。好整復以暇。川澤難爲高。岡陵難爲下。奇功難爲賞。虛名難爲借。富貴非可求。神仙或多詐。代食希昔賢。願言請學稼。

都門喜晤王慈齋同年漫賦奉東

慈齋名宗綱字秩登穎上人。

七載相思盡。驚心見面初。鬢眉看漸改。蹤跡定何如。花信中春老。天涯舊雨疎。比隣逢作客。不獨慰離居。

自甲戌出都于今八年而同譜公車者不及五十人矣。慈齋寓與予相去數武。

十二月初二日泊仙女廟

東風吹客過灣頭。幾許離情獨夜舟。岸轉時藏林際火。雪明遙見水邊樓。三年舊雨應成夢。一盞新醅試破愁。不爲短篷衾似鐵。竹牀常擁五更裘。

甲申立夏次日爲余初度讓山邀集寓齋漫賦

花陰庭院午清和。九十春風似夢過。小酌自消遲日永。故人偏喜異鄉多。隣園櫻筍三年隔。旅次星霜兩鬢磨。檢點南窗學安樂。天涯何處有行窩。

廿二日又雪登樓漫成

寂莫花朝雪尙殘。又逢深雪一樓看。紅燈水榭逡巡酒。白髮青春料峭寒。世事不辭求馬骨。天涯還爲就豬肝。蕭蕭更憶隄邊柳。二月中旬欲放難。

春雨漫成

春雨蕭蕭向晚寒。鞿雌情緒好闌珊。畱心世事如書讀。過眼功名比夢看。燕石至今原可寶。隋珠終古不輕彈。紙牕破處來花影。頗識閒中有靜觀。

抵揚州

西風五雨櫓聲柔。斜照分明水上樓。三載天涯千里客。淡烟疎柳又揚州。

吳維鈔

字廉夫。太倉人。乾隆十八年舉人。

集南園作峨眉小松譔贈田在兼呈竹娛

世人不識蛾眉松。是松非松問坡公。坡公騎鯨數百載。請將吾意叩鴻濛。蠶叢以來蜀國古。積雪欲沒峨

眉峰元陰慘澹白日閉窮岩安得蒼髯翁西方羽人多異術帝遣縮取湫中龍雷雨一夜妙變化紛紛鱗甲散作千萬叢烟霏霧結自何代至今青青之色凝纖茸凌雲一寸心故在兒童竊笑蒿與蓬君不見兔絲附長松長松百尺何鬱葱一朝被伐橫道旁兔絲引蔓還春風嗟哉下士悲不逢首陽爲拙柳下工細觀物理未足異達者非達窮非窮願君持示竹娛老飄然一笑將毋同

吳桂

字一蓼鎮洋人乾隆十八年舉人官潛山縣教諭有優然堂詩草

丁沾阻風東錢大讓山

誰唱公無渡孤舟客鬢凋風欺官道柳月湧海門潮淺渚鷗眠穩寒空鴈陣遙萍蹤愧良友徒賦小山招

梁夢善

字兼士號午樓錢塘人乾隆十八年舉人官蠡縣知縣有木雁齋詩鈔

蒲褐山房詩話兼士爲文社公幼弟風神簡遠弱不勝衣聊欲弦歌非其好也癸未丙戌計借北上嘗寓子蒲褐山房作木雁圖以自況覺魏晉風流去今未遠

小除日偕施茗柯游惠山寺

緩棹梁溪又一時九龍山色互參差竹鑪烟靜茶初熟佛院香銷客到遲是處雲巒皆入畫偶來池館好題詩殘年莫漫嗟行役游屐今朝得自隨

秋草

捲簾人自對西風。回首天涯悵望同。金谷園中行跡斷。碧雞坊畔舊游空。梧桐影落斜陽外。蟋蟀聲寒小院東。記否踏青時節近。畫船歸去太匆匆。秋風嫋嫋倍堪憐。舊日曾來拾翠鈿。謝客詩成聞暮雨。晉公莊廢賸寒烟。羅裙捉蝶經三月。紈扇流螢又一年。太息紅心憔悴盡。輸贏誰與鬪嬋娟。

九月十二日出都自廣渠門抵張家灣登舟有感

通潞亭邊聽雁聲。暮雲無際且南征。西風禾黍臨官道。落日牛羊近古城。生意漸如衰柳盡。浮生只共片帆輕。勞勞蹤跡年年是。淒絕天涯此夜情。

病中偶述

飛騰意氣復何時。病裏形骸百不宜。薄宦竟同爲客苦。長貧方悔治生遲。癡僮誰奉王褒約。老嫗空吟白傅詩。蒲柳望秋憔悴甚。朱顏已是鬢成絲。

朱休度

字介斐。秀水人。乾隆十八年舉人。官廣靈知縣。有壺山吟稿。

蒲桃峪

昨尋易水源。在廣昌縣城外。今亂易水流。糾結成隘口。天險扼咽喉。是名蒲桃峪。高低列戍樓。客行愁詰屈。下上窮冥搜。撥石蹠硜硜。涉波車浮浮。羊腸霜滑道。雁陣風驚秋。身如緣竿掛。心若懸旌游。歇鞍入村店。喘息類吳牛。餽飭聊充腸。欲憇不自由。山盤水更複。日仄前途修。

集杜題巽妙軒壁

蕭蕭古塞冷。忽已歲時遷。未負幽棲志。添予別興牽。喜無多屋宇。自有一山川。置酒高林下。溪風爲颯然。翠屏宜晚對。碧色動柴門。豈異神仙宅。不知城市喧。衰顏聊自哂。世事與誰論。到此應當宿。讀書秋樹根。曉風芳草竟。芊綿畫出清明二月天。行盡江南數千里。一村桑拓一邨烟。

春日歸舟集唐

朱休承

字伯承。秀水人。稻孫之孫。乾隆十八年舉人。官城固縣知縣。

題鄞縣邱氏學敏古樹

仲孚東臬舊草堂。中有松柏參天長。龍蟠攫網出牙爪。風至浙瀝吹笙簧。高栴漫誇杜陵宅。古木應笑平泉莊。麻姑未來方朔去。人間誰與論滄桑。

盧鎬

字配京，鄞縣人。乾隆十八年舉人。官平陽教諭。有月船居士集。

蒲褐山房詩話：配京聞黃太冲萬充宗之學，故爲浙東人士所推。董君秉純稱其詩高處直逼柴桑，險韻長歌亦得眉山一體。蔣君學鏞稱其學凡三變，卒底于成。惜爲詩不自收拾，後人僅存四卷，未足以盡其長也。

初夏與張潛也顧清芳清濟清標徐鳳來管余諸生游蓀湖集護法寺以茂林修竹清流激湍分

韻得茂字

香草生幽湖，世外匿深秀。曲曲尋湖源，冀以覲柔茂。時當夏景交，衆山紛綵縟。遠遠水中姿，蘋香襲懷抱。因造松竹林，歡焉酌醇酎。村濃深綠浮，座寂絳絃奏。沉吟各支頤，散策羣引脰。檻泉弄珠球，石屋蔭華構。日永任游衍，源遠失窮究。欲尋新龍潭上清隱菴不果好月送歸舟，餘霞構翠岫。回首白雲深，幾時重邂逅。

冬日南村偶書

暮色從何至，蒼蒼一片平。烟生山欲去，人遠月空明。天入風霜老，詩成夢寐清。何須問衡霍，世外亦兼名。

施養浩

字靜波，號茗柯，錢唐人。乾隆十八年舉人。官榮經知縣。有出塞入塞詩。

邊碑

雪封烟鎖迴難攀，卓立貞珉鎮此山。集古欲增金石錄，搜奇端自漢唐還。銀鈎勢作迴戈勁，紫蘚紋疑戰

血殷堪笑閒僧能好。強將頑礪擬斑斕。巴里坤有漢永平二年敦煌太守雲中裴岑將郡卒五千人誅

山道又得唐姜行本紀功碑字亦殘缺

進嘉峪關

爾詩風景見窮邊。寒谷生春藉力田。勝國僅聞呼瓦剌。天家已見困祁連。氈裘君長今安在。戎馬書生事偶然。出塞等閑歌入塞。皇恩軫恤俟三年。到坤之次年即奉恩旨依滿三年再奏

王日杏

字丹宸。無錫人。乾隆十八年舉人。官刑部主事。殉金川之難。贈光祿寺少卿。

陶然亭題壁

西山晚翠上孤筇。斜照神州殿閣重。蘆葦蕭蕭渾似雨。寒聲併入隔城鐘。僧舍茶烟滿竹扉。繩牀整憩亦忘機。萸香菊淡人無語。聽到哀蟬落葉稀。

賈虞龍

字煥若。大興人。乾隆十八年舉人。早卒。

暑夜檢亡友龔予鮮遺詩愴然感懷作

閱世不一人。萬古共明月。浸我庭除間。浩浩如可掇。無人共幽賞。獨對亦清絕。長天寄塵海。生命輕一葉。

低心避訕謗。縷縷變元髮。此意訴何人。茫茫隔存沒。
存歿何足惜。念此身後名。之子美文藻。早歲蜚英聲。詩成千萬言。筆力戈矛橫。譬彼江海濤。適與天風迎。
斯人今不見。太上難忘情。剩有手種竹。夜夜搖空明。

題伏生授經圖

晨光入牕睡未起。誰扣我門朝夢驚。授經之圖署素壁。畫師十日經營成。在昔西周初播亂。岐豐王氣歸。
秦嬴惠文武昭養賓客。連衡合從諸侯爭。二周贅疣日奔命。祖龍仗劍王綱傾。千年禹鼎入泗水。海若走。
避蛟龍迎。先王法物自寶貴。不受秦舛潛其形。矧乃列聖著謨誥。煌煌大訓垂遺經。天奪其心盡焚燬。不。
使巨典畱秦庭。挾書有禁著在律。豈惜萬古聾兼盲。異哉當時衆博士。四百六十稱諸生。西行入關糜好。
爵。驪山礪谷遭其坑。發機填土骨撐拄。可憐一死鴻毛輕。爾時伏生在何所。鶴飛鴻漸綠青冥。漢皇龍興。
奮三尺。赤符手握扶炎精。蕭相圖書習秦陋。叔孫制禮徒硜硜。大文不欲就淪喪。慙遣一老王朝楨。髮白。
面皺口無齒。徵召不耐蒲車行。詔曰汝錯往授受。齜牙詰屈難爲聽。裾屐胡爲立几席。天然吐秀如調鸚。
古文篇章四十六。始味噉蔗終建瓴。咄哉智囊不善學。外託經術專刑名。刻薄寡恩導漢帝。宗藩削弱非。
人情。陳屍東市亦草草。坐令吳楚生妖星。先王作書道政事。當時面命空丁寧。此經之傳歷千載。諸家牋。
注紛畦町。解經經亡聖道晦。思之終夜心忪忪。我披此圖一惆悵。衣冠肅穆堪儀型。安得鑄金日朝禮。呼。

之欲出來精靈。

故明侍御史沈公殉節詩

公諱履祥起家進士爲福建縣令以養親去官絕意仕進爲父母所迫出爲桂王監察御史爲王借餉福建聞王兵破死於台州

蠻烟蒙霧蠻山青。猿啼鬼嘯秋冥冥。壞鏃斑斑土花蝕。游燐黯黯戰場腥。西風吹處殘魂哭。天命潛移難再復。南渡猶聽漢苑鶯。中原早失秦庭鹿。父母生余何不辰。四郊飛檄走烟塵。聊爲郭外勸瓜客。試學柴桑種柳人。頗聞越地開軍壘。故國遺臣投袂起。石城羞說褚淵生。匡山欲殉祥興死。驕兵悍將索軍租。憔悴朝侯少敝襦。宮中不見金錢賜。壁外空聞庚癸呼。奉詞告糴風帆疾。遺庶何人倉府實。捐助惟聞卜式賢。窮搜豈用宏羊術。家亡國破竟何歸。行殿蒼涼秋草肥。夢度重關依故主。淚和碧血點朝衣。聖朝寬大恩波廣。繹縛憐忠寬法網。齊桓不記射鈎仇。漢祖將行雍齒賞。耿耿孤忠矢不移。全拋馬革付荆茨。至今越水流嗚咽。來往行人哭蘇碑。

陳文錦

字綱齋。楚雄人。乾隆十八年舉人。官騰越教諭。

雜感

我本將家子。從軍有歲年。烽亭賓四守。坐老南山邊。日仰官廩食。走狗射飛鳶。羽書一夜馳。心膽飛賊前。韓盧喜短草。騏驎鳴秋天。叅養終惠愛。微軀寧惜捐。鋒指無完敵。蛇豕安足患。誓清南海波。以奠蛟龍淵。年少使俠氣。鄉里頗見苦。樗蒲擲百萬。甌石不足數。羽檄徼外飛。壯志隨風舉。朝占壯丁籍。磨食辭門戶。行行踰九陸。望望抵白古。元盞大如瓠。封豕羣嘯聚。狂象結陣來。詎論豺與虎。旌干揮毒霧。巨礮衝瘴雨。汲飲雷淵旋。麤散熏腥腐。鬼子雕題頰。嵌金漆兩股。黑齒嗜人肉。嚼骨詎肯吐。鏖戰動十日。晝夜不安處。將軍按劍馳。丞相日循拊。微勞安足程。一命輕如羽。生當勒燕然。形擲列珪組。死當爲鬼雄。訣絕故鄉土。

將之騰越畱別倪雲洲先生

孤生園中蓬。紛飛越長道。詎有青雲姿。東西跡如掃。芳草萋路隅。春禽變昏曉。君子崇高義。世德敦夙好。軫念無衣客。不自快朝飽。浮雲忽異色。羽聲傷懷抱。賤子亦何言。愁心蔓如草。征車首前路。西極漫浩浩。會合當何時。千秋期共保。

蛩

小閣渾無夢。寒蛩獨有聲。似憐風雨夕。勉慰索居情。響近窗間切。聽來竹畔清。涼秋知又近。月落見參橫。

除夕

雞聲人語漫蕭然。酒醒殘燈尙未眠。三十六句都浪過。偏將一刻惜流年。

湖海詩傳卷十六

王鳴盛

字鳳喈。號禮堂。嘉定人。乾隆十九年殿試第二人。及第。官光祿寺卿。有耕養齋集。

潘弼山房詩話。禮堂以大考翰林第一。由編修擢內閣學士。典試閩中。以多用驛馬。降光祿寺卿。丁憂後不復出山。移居吳下。先時與惠松崖交深。究羣經古義。著尙書後案及軍賦考。皆闡發鄭君之說。又爲十七史商榷。據各史紀傳志表。考其同異。而折衷之。更著蛾術編。列說十門。以見其學無所不該。古文宗。巒岩震川詩筆綜三唐。初爲沈文愨公入室弟子。既而旁涉宋人。歸田後復守前說。於空峒大復。鳳洲臥子及國朝漁洋竹垞。咸服膺無間。改雖轉益多師。終歸大雅。茲所錄者。皆其手自審定。寫以貽予者也。

矯志篇

牆上難搗。貧賤難工。昨日健少。今老成翁。長繩繫日。晡晚莫從。壯盛智慧。殊不再逢。俯仰天地。悲來填胸。
一驩驅捕鼠。乃不如狸。鳳凰司晨。乃不如雞。秋蘭雖芬。鮑肆聞之。明珠在泥。皦皦何爲。拔劍起舞。拂衣旋歸。
二左控夏服。右操黃間。趨趨狡兔。掩以修竿。命儔嘯侶。促坐爲歡。投壺六博。飛爵闌干。清歌激楚。妙舞娑槃。
三思慕王喬。研精軌道。乘躑遠遊。經歷深杏。僊人授藥。還精補腦。棗實如瓜。桂實如棗。排棄火粒。後天而老。
四典冊法書。藏在蘭臺。雖遭亂潰。獨不遇災。志媿羣雅。菟其鴻裁。藏山入林。蹈海鑿坏。百世有知。以俟方來。
五

山遊敍志

習靜歸巖阿。身世永相棄。眷言陶嘉辰。棲尋信遐寄。羨英綠野秀。蘭芳紫莖媚。綠源極演漾。曠渚渺空翠。水上風行徐。山下出泉細。屯雲正滿眼。孤煙杳無際。曾崖隱天維。登頓歷蒙翳。出窈入冥間。忽復造幽異。峭蒨松磴陰。滴瀝乳竇秘。境往情已遷。言忘理成契。養真誰爲同。齊物自無累。傾暉不戀人。晡晚映衣袂。逝將遊太元。逍遙辨深意。

東崦西崦

溪行忽無路。回首暮煙合。過橋湖水寬。隔岸亂雲接。圍繞玉鏡潭。寒影衆峰集。空色不可攬。彩翠似堪拾。東西崦幾重。蕩漾舟一葉。迢迢擅勝亭。隱隱光福塔。何處聞菱歌。清唱自相答。

入鄒尉山暮宿聖恩寺

蒼烟滿秋山。落日生暮靄。弭棹歷嶠嶽。理策尋靄靄。溪橋風泠泠。寒流激空籟。捫蘿長林迷。跼步崖石礙。微月墮幽澗。俯見清光碎。寺開知徑盡。客至自雲外。空堂響法鼓。羣動息香界。慮澹不用遣。深夜無夢寐。欲謝區中緣。攝生遠塵壒。

江行

沙岸明夕陽。楚江歇微雨。時聞野寺鐘。不辨烟村樹。白鷺背人飛。銜魚自來去。

渡河瀝谿過寧國縣行亂山中

急湍橫我前。欲行忽無路。商人負茶蕪。喧喧此爭渡。編筏資利涉。十百排鴈鶩。吾亦隨若曹。絕流從所務。山城殊僻陋。暫憩不暇顧。合沓羣峰來。登頓眩欲仆。危岑造天關。仄徑礙微步。深谷多修篁。曠景難久駐。躋攀眼一豁。始與平地遇。林轉峽角回。前嶺又餘怒。畏塗迫頽齡。顛倒作計誤。坐石望歸雲。故鄉良可慕。

石鳧山

舒鳧本水禽。場翼同斥鴳。忽作高舉形。軒翥在雲漢。我行入山深。險艱飽所憚。茲峰尤卓詭。疊巘挂天半。鐵壁斷攀登。線路曲縈轉。巖傾巨石出。磔磔墮絕澗。懸溜裂崖來。千丈觸石戰。殷地疑靈驚。飛空類珠濺。出谷見曦輪。造頂識山面。決吻復顧脰。非鵝亦非鶴。流傳竇子明。大藥于此鍊。縊真遂遺塵。白日生羽翰。學仙苦未成。愁辛旅顏變。鴻駕空紫烟。翹迹徒仰羨。

家德甫三泖漁莊圖歌

吾家令弟非常儔。蕭然窮巷百不憂。忍饑誦經銷歲月。閉門覓句工雕鏤。草堂前對谷水流。紅泉碧樹蒼山浮。有時散髮扣舷去。狂歌一曲凌滄洲。竭來金閫數相見。平生知我甘窮賤。吹簫擊筑多故人。十千沽酒同歡宴。酒酣起舞首自搔。當怀心共孤雲高。丈夫生世不諧俗。便當溷跡安蓬蒿。故園況復堪吟眺。鏡裏晴嵐滿雲嶠。扁舟已息漢陰機。短笠將隨任公釣。偶然遣畫垂綸圖。撈鰕射鴨皆可娛。嗟我落魄胡爲

乎。北燕南楚空馳驅。蒼茫葭葦平波外。何日相從陸瑁湖。

雨泊江岸登天門絕頂

我從南楚浮歸腳。中流浩蕩乘長風。布帆高挂似飛鳥。飄翻直指天門東。插江翠壁相對出。遙見突兀青濛濛。削成疑自巨靈掌。移置定出夸娥功。須臾雲起飛雨集。白頭怒浪掀孤篷。舟師相呼入浦溆。繫纜急傍菰蘆叢。興來便攜九節杖。思縱遠目開心胸。潺潺絕澗蹋亂石。層層仄磴攀枯松。振衣千仞發長嘯。驚起鵬鵠盤高空。峻嶒雨崖勢忽斷。岷濤萬里流當中。始知楚關此天險。屹立一鎖洪波衝。是時陰霞散晚霽。江光隱見磨青銅。欲從牛渚呼謫僊。更向青山懷謝公。東望石頭互虧蔽。迢迢天闕排巖崑。興亡六代付逝水。人寰刺促悲安窮。終當挹取玉漿飲。上吸倒景騎飛龍。

梁元帝廟行

青絲白馬圍臺城。湘東萬騎歸江陵。枕戈嘗膽徒虛語。行師代景紛相乘。長沙旣破同氣盡。才子併命殊堪矜。夏口已聞肆魚肉。荆門復見除股肱。胡豆洲前狂虜死。登壇慷慨稱中興。羣僚累表頌符瑞。爭誇紫氣交環絕。當時文軌僅千里。郢都叢爾良難憑。如何建業不復顧。欲取荆楚當殺漚。殿中輟講寇已至。柩把門外愁雲凝。龍文玉軸一朝毀。拔劍擊柱空摧崩。何年廟食尙遺迹。三楹茅棟連溝塍。殘碑蒼蘚巫覡漸。無復社鼓來鼕鼕。嗟哉章華亦漫滅。況乃此地荒榛莽。行人下馬一憑弔。興亡過眼如風燈。

夢遊岱嶽歌

我志窮十嶽。身佩真形圖。汶陽道上縱遠目。突兀岱頂青嶽。魯酒若琥珀。絲繩提玉壺。解鞍卽醉倒。偃臥胡姬墟。天風飄飄浮絕磴。導我忽轉松蘿徑。蘿徑逼高寒。蒼蒼十八盤。漢策闕古字。秦松瀉哀湍。振衣便覺凌紫極。倚劍直欲生飛翰。穹崖濺瀑多殊狀。決昔已在層霄上。碧霞四氣拱星辰。青帝五雲開崑嶂。崑嶂疊疊烟青青。封中雲氣縷縷生。安期一笑相逢迎。如瓜之棗出啗我。驂駕白鹿空中行。天門跌蕩日。觀龍從。河流挂樹。海色搖空。蒼煙九點望不極。合沓下見扶桑紅。銀臺倒影火輪出。驚回清夢仍相失。風馬雲車乍有無。丹梯翠壁看明滅。應劭記李斯碑。平生懷抱空好奇。餐霞鍊藥不早決。坐待蓬萊清淺始。悔朱顏衰。風塵回首驅征鐸。惟聽霜鐘殷巖壑。萬里終當汗漫遊。十年肯負煙霞約。

范上舍塞北省親圖

一人紫綺青羔裘。雕鞍側坐玉腕驅。導以僂從連輕輶。一人袴褶捲臂鞬。蓬頭突鬢佩吳鉤。停驂左顧欲進仍遲留。主人戴笠披赤鬪。意氣凌厲疑雙眸。問誰粉墨開金碧。咫尺煙嵐浮几席。軍中一范方專城。公子思親事于役。何甥謝舅亦肯從。徑自江南趨塞北。初出居庸關。黃羊白草蒼崖間。再度彈琴峽。霜林岔道風蕭颯。土木宣府都經過。柳屯積嶺征塵多。迴瞻來處莽無際。漸覺所歷高嵯峨。羊腸一線穿雲去。亂石驚湍灑寒雨。疊嶂摩天落日低。崩榛匝地荒煙暮。鳴鞭遙見飛狐口。代郡孤城隱雲樹。烽樓危旌凍欲

折指點先朝備邊處。六郡防秋有戰場。三關設險空殘戍。解裝一笑循南陔。綵衣舞罷欣徘徊。遠慰頻年望雲志。壯遊還上李陵臺。郊原泱泱平沙走。堠火關榆重回首。龍堆定有控弦兒。雁磧應思射鵰手。嗚呼男兒出門萬里輕。樂事況復當趨庭。功名會見繼老子。自有胸中十萬兵。

石鼓歌

太學戟門有石鼓。長廊大廈深藏緘。手摩妙墨剔苔蘚。細讀古調同雲咸。岐陽一蒐誇盛事。遮羅雉兔兼響震。作歌紀績用傳後。萬夫鑿石來巖巖。魯叟編詩偶不錄。此豈有意相夷芟。陳蒼野外棄置久。剝落缺畫成纖纖。其一作曰幸復出。氈包席裹封瑤函。宣和之年保和殿。森陰蒼鬱飄松杉。此鼓歸然珍襲好。香廚册府光芒銜。自汴入燕竟無恙。守護秘怪神所監。置諸兩塾始皇慶。近光作賦辭誦誦。于今又閱四百載。文中斷填空嵌。蛟龍攫網怒鱗凸。鸞鳳軒翥長毛多。滄桑久歷彌可貴。至寶豈特逾球城。昌黎宛陵遞歌嘆。雄章秀句窮鐫劂。宇文以下那辦此。子卿妄語空譏讒。我生金石有奇癖。嗜好頗覺殊酸醎。章樵潘施宿王厚吾衍薛尚鄭樵箋訓差能舉大凡。竭來京國睹此鼓。不負萬里穿征衫。試觀字體異蝌蚪。乃知梅賾言多僂。我方欲辨壁書偽。傳鈔秃筆勞秋蠶。

秋日集岡齡弟小停雲同顧景嶽諸君遲劉企三徐蒼林不至

黃金可成百不爨。霜鬢欲挽嗟無由。但願春秋多佳日。勝侶共賦逍遙遊。服除尙餘風木慟。臯魚淚點不

得收京華路。遠柅車轍。誓慕且復依林邱。小謝西堂多藻思。拍肩把袂。借虎頭。意行看竹不問主。長歌短
咏聊相酬。憶昔少年托廡下。平江胥口恒淹留。今來徑署寓公號。賃居竊擬營菟裘。官名自喜樂圃繼。寄
跡定許怡菴儔。八門盤門最僻左。雅稱箜篌來探幽。高齋況仿紅欄里。恰宜坐雨兼尋秋。比來詞賦作者
盛。體格漸恐趨俳優。春華競工秋實少。更傳鉛粉窮雕鏤。讀書自是我輩事。流光可惜同蜉蝣。肯徒酒食
事。徵逐要須高步追前修。當筵意氣互期許。我歌子和商聲謳。忽憶劉郎方示疾。丈室宴坐多窮愁。心情
縱令木石似。談笑尙卻熊羆不。城北徐公別亦久。不見籬畔維輕舟。何時眼中得二士。比鄰來往成風流。

遊道場山

吳興城南天下稀。自波翠巘相因依。道場一峰更巖絕。梵宮高下開林扉。我舟斜穿夾山漾。霜冬澹日寒
熹微。到山谿盡山滿眼。盤空細路衝烟霏。羊腸龜背互詰屈。石稜松鬣紛成圍。山腰亭子敞北戶。具區萬
頃環灣碕。清池一方浮湛湛。傑閣百仞凌巍巍。訥公開山此駐錫。香嚴水觀甘忘機。階前不啻啞虎善。簷
際共命仙禽飛。稗官謬悠那可信。共詫神異先知幾。更將卓筆誇秀鎮。浮榮似令出增輝。豈知道人外生
死。俗物祇足供嘲唏。吾生漫浪百無用。風塵回首辭籠鞿。寡聞惟持茗帚偈。壞色欲服掃塔衣。天花一室
道場在。把茅作計終無違。下山瞥見翠微遠。樹杪白雲蒼欲歸。

題吳興城南水閣

清暉當戶生。終日對虛明。曉漲雲浮岸。春山翠壓城。捲簾雙燕入。隱几一琴橫。會得閑中趣。臨流更濯纓。

夜歸

犬吠竹籬外。燈明草屋中。夜潮隨月上。孤棹隔溪通。稚子候門久。家人酌酒同。夜闌如夢寐。相對慰飄蓬。

天門

白浪天門斷。千崖杳莫攀。登艫一長嘯。遙見謝公山。我欲浮湘去。行吟楚澤間。今宵對明月。把酒慰離顏。

歸次蕪城懷錢曉徵

遠客辭巫峽。孤帆一葉輕。春江花月夜。獨宿廣陵城。念爾燕臺去。迢迢匹馬行。差池不相見。惆悵若爲情。

懷鄧尉

峰嵐淡靄映湖光。回首清遊興未忘。一徑松陰秋入畫。三層水閣夢生涼。風帘雲碓宜晴日。澗草巖花出異香。惆悵軟紅欺客袂。幾時洞口結書堂。

登黃鶴樓

萬里江天煙霧開。上頭棟宇鬱崔嵬。荆門曉色當窗盡。滙浦春濤繞座來。終古白雲餘斷靄。數聲玉笛落殘梅。茫茫人代銷沉去。拍檻狂歌思轉哀。

鄂渚雜詩

迢迢邗路古今情。夏首西浮更遠征。三戶遺墟春草碧。六朝舊事暮江平。米船誰遣迎溫嶠。羽扇還須藉顧榮。幾許興亡猶在眼。漢南雲樹感愁生。

大別山前落照頻。南樓清景迥無倫。蘆中問渡真窮士。漢上題襟少故人。渺渺晴川千里客。匆匆歸雁一年春。誰知庾信哀無限。每到登臨易愴神。

歸次金陵憇燕子磯清江院感賦

虎牙銅柱倦登攀。無恙孤帆此日還。遠夢尙驚三楚浪。舊遊重看六朝山。蕭條行李誰知己。濩落風塵損壯顏。愁絕白門楊柳色。應同庾信賦江關。

蘆溝橋

臥虹終古枕桑乾。泱泱渾河走急湍。馬邑風煙通一線。太行紫翠壓千盤。喚人喔喔荒雞早。照影蒼蒼曉月寒。沙際閑鷗應笑我。又聽鈴鐸送征鞍。

春盡日送同年平太史聖歸浙東

周南滯迹久同稽。把酒津亭忽唱騷。醉裏人將春並去。望中雲與水相齊。禹陵洞穴仙官守。越國山川謝客迷。鑑曲敢言煩特賜。鄉園隨處得攀躋。

題畫

披圖長自愛煙嵐。筍笠筠竿我舊諳。風葉滿山秋水闊。孤篷殘夢到江南。

九江舟中

渺渺潯陽烟樹齊。蕭蕭溢浦雁行低。長江九派東流去。何事孤舟獨向西。

雪中聯句

作客欣得朋暗風。畏人但枯坐。忽焉緜襄集甫德。乍疑微雨墮。淪淪怒雲凝微曉。稜稜寒意作。樹訝乖龍蟠殷來。檐

軫凍雀餓。六花舞欄楹暗風。四野洗堀堞。灑松密復疎甫德。碾玉揚更簸。疎篔折有聲微曉。老屋壓欲破。頗畏酸

風尖殷來。差喜酒戶大。韭芽暗。吳羹暗。蜜餌本楚些。食單列無多甫德。詩卷正可和。醉吟馬耳埋微曉。狂擬驢背

馱。我儕苦羈孤殷來。生計每摧挫。今秋聞倉箱暗風。連村收秬稷。歲晏緩租庸甫德。時平謝勞揮。矧見宿麥抽微曉。

益資春種播。對景良足懽殷來。稱瑞行當賀。蜚螭土已殲暗風。糶枯冰猶裹。白戰勿致師甫德。閉門任儻臥微曉。

同錢曉微曹來殷家德甫用昌黎會台韻送王次山先生歸常熟

眩日雪花高。痒肌朔暗風。重暗風。忽興故回思。遂見歸計勇甫德。裝成一羽輕。寒壓兩肩聳微曉。竅振風尚號。帆開

浪猶涌殷來。養痾公志便。問字我忱壅暗風。結添卜商衣。履曳原憲踵甫德。叩筵駭洪鐘。挾卷慳荒壟微曉。游常昇

輿從。境嘆望羊恐殷來。磴伉嗟俗師。流傳多繆種暗風。勃窣鮮囊該。踳駁徒雜冗甫德。逝矣昧火珠。誰歟搜汲塚

微曉。衰衰逐頽瀾。紛紛博世寵殷來。先生管道樞。末暗。作梁棋暗風。砭俗論必嚴。匹古意未恂甫德。覃思幹幽元。鉅

製冠應奉微曉幽鍵啟奧窾銛斤斲拳腫股來十道九域探三篋百城擁微開昔烏臺遷羣驚白簡捧山德志欲

懲訓狐沸豈耐羣微曉正色排嬖嬰直筆刺微股來然犀燭罔象強弩射闕微曉倭倭厲丰規稜稜振傷

罇山德乃知一士諤直令百夫悚微曉旋解紫綬還閒雍碧草茸股來酒陣整鞞鞞騷微曉集球琪微曉遂初欣還山

耽榮嗚得隴山德吾谷峯嶙嶙尚湖波溶溶微曉閒身付蓑笠屣映脫極萃股來竭來主講席多士資發冢微曉教

比時術蛾文喻吐絲蛹山德問事愧長頭解疑快曲踊微曉茲聆驪駒歌正值烏獸股來往矣冰堅腹奈思花

拆山德甬微曉佇立望河干霜林浩呼洵山德

紀昀

字曉嵐獻縣人乾隆十九年進士官禮部尚書

蒲錫山房詩話君閱聖博聞才情華瞻少日已為史文靖公劉文正公激賞及再入詞垣適以詞臣
奏請將永樂大典內人間罕觀之書鈔錄流布既而詔求天下遺書開四庫館令君與陸君錫熊總
司其事攷異同辨真偽撮著目之大凡審傳本之得失為提要進呈御覽上皆閱而善之其未鈔
錄者則為目以識之分繕七部貯于文淵閣圓明園熱河盛京及揚州金山杭州諸處嘉惠來學
又加以提要二百卷使讀者展閱了然蓋自列史藝文經籍志及七略七錄崇文總目諸書以來未
有閱博精審若此者蓋文官之極隆也儒生之榮遇也逮為禮官之上恭遇高宗皇帝御字六十年
行內禪之儀進册授規盛事皆上古禮儀之所未備禮臣參稽經訓綜以會典斟酌進呈均蒙
俞允次第舉行普天同慶亦君所擬定者為多君既離版外年數綜纂藉故其應制之作雖為詞苑
所宗而于尋常著書不復珍惜成編茲于館課偶存中錄存梗概已無愧于燕許楊
劉而其帖體乃國家所以取士大小試無不用之故所錄特多俾為士林準則也

西域入朝大閱禮成恭紀

一掃樓檜大漠空。陽關萬里使車通。全收月窟歸封內。原有星弧在掌中。天馬徠時行就日。靈夔吼處響生風。懷柔控制相兼用。應識君王睿畧雄。

花門作隊遠潛蹤。積石流沙路萬重。絕域何年迷漢壘。王師當日問崇墉。幾回碧蔕驅妖鳥。一旦軒轅召應龍。數曲金笳歌出塞。西戎早已避旗鏜。

趨趨羽騎走如雷。三部降蕃次第來。伴使經時攜勃律。仙莊早日覲蓬萊。秋深驛路人初到。雲捧旌門影正開。使遣平臯陪大獮。且看七萃躍龍媒。

曲宴芳園酒乍醺。將軍飛遞羽書聞。窮荒更遣蟠桃使。降表連收貝葉文。兩國名王馳贊普。同時別部走奚斤。殷勤攜得昭華瑄。計日中朝覲聖君。

日行三百入長安。別苑層城畫裏看。宿衛舊聞唐頡利。衣冠今賜漢呼韓。多時逋寇擒狼種。幾隊高蹄付馬官。好續周書王會解。千秋勝地記田盤。

東郊南苑路回環。蕃使行隨十二閑。九奏聲中瞻御幄。萬年觴側侍天顏。燭龍珠躍雲霄外。火樹花開指顧間。真是滄溟觀日出。六鼇頂上駕三山。

朔風獵獵乍盤雕。上將持麾下紫霄。天上星辰張玉弩。軍中鼓吹應金鐃。珠旂搖曳旗初展。銅埒回旋馬更調。十萬貔貅齊入伍。分明氣象認天朝。

環抱中權兩翼交。森嚴後勁接前茅。連營畫鼓聲相答。八陣雕旗隊不淆。燦燦星文浮劍氣。彎彎月影上
弓梢。六軍控馬齊翹首。尺五城南望翠旂。
五色明霞護綵旄。至尊韎鞞演龍韜。由來六職分司馬。況值諸戎貢旅獒。黃道平馳雕玉勒。烏孫遙識鬱
金袍。爭看聖德兼文武。九合天弓手自操。
羽衛交馳玉腕臨。陪遊仍遣召渠搜。重看犀手三千弩。爭拜龍旗十二旂。見說須臾禽母寡。果然容易戮
蚩尤。願將聖主天威重。傳到西荒海盡頭。

恭和御製九日侍皇太后宴並賜內外王公諸臣食卽席得句元韻

帳殿崔嵬曉氣澄。重陽不數宴孫陵。花開松漠圍黃纈。香佩萸囊製綵綾。五色安輿雲對捧。萬年仙酒露
新承。題糕勝事龍沙北。自古登高到未曾。

賦得山梁悅孔性

會心原不遠。樂意總相關。達者能觀化。仁人本愛山。天機同浩浩。物態共閒閒。偶爾逢心賞。悠然息轍環。
坐看雲自出。忽見鳥知還。童冠如偕點。行藏欲語顏。鳳翔千仞上。龍德六爻間。鄉黨終篇意。長吟雉子斑。

雉子斑樂府題名

賦得風絃漢殿箏

何處夜琮琤。冰絃帶月清。涼颼來玉署。秋殿動銀筵。乍聽風從律。真同響應聲。何須銀甲撥。已繞畫梁鳴。呼吸機相感。喁于調自成。爽如聞籟發。高欲遏雲行。斷續隨宮漏。悠揚散禁城。早朝天樂奏。一曲和韶諠。

賦得殘月如新月

缺月照庭空。纖纖畫不如。雖非三日後。却似半規初。祇道弦將上。誰言魄漸虛。依然千里共。還是一鉤餘。光但分增減。形難辨斂舒。誰能分顧兔。定亦誤驚魚。老桂花常在。仙葉漸疎。餘輝如可借。爲照案頭書。

賦得夏雲多奇峰

嵐氣初蒸鬱。雲容俄嶄嵒。卷舒形屢變。重疊勢相攙。峭立峰成筆。高張石作帆。雄鷹爭岱華。險欲類崑崙。拔地風頻鼓。摩天日乍銜。雷疑泉響澗。雨訝瀑飛巖。縹緲真難卽。嶽嵒自不凡。願陳紉縵頌。流韻入韶咸。

賦得秋月如圭

月色淨玻璃。秋宵畫閣西。無瑕原似璧。有角便成圭。仙桂開方滿。新桐剪乍齊。修來原是斧。切處定如泥。象以斜長肖。形從朧朧稽。涼天懸玉片。深夜照金闈。冷露中庭濕。明河右界低。方輝吟入戶。更憶隱侯題。

賦得水始冰

霜自何時降。寒從昨夜增。深灘多露石。淺瀨半含冰。細溜微微聚。流澌漸漸凝。經風纔欲合。遇暖尙難勝。瑣屑銀千縷。玲瓏玉幾層。一痕初界畫。數片乍觚稜。舒斂機相待。剛柔氣互乘。應知堅腹後。陽律又潛蒸。

錢大昕

字曉徵，號竹汀，嘉定人。乾隆十六年召試，賜內閣中書。十九年成進士，官至少詹事。有潛研堂集。

蒲褐山房詩話：君聰穎非常，警非時，卽有神童之譽。以召試入內閣，再入詞垣，覃研經史，根柢精深。詩賦之外，究心數理，精蘊歷象，考成能通中西之學。秦文恭公修五禮通考，屬以相助。自廣東學政，銜恤歸家，有終焉之志。歷主書院，輒以小學爾雅授生徒，所撰二十一史考異，又撰石跋尾四集，蓋鄭夾深王深寧之流亞也。詩清而能醇，質而有法，古體文亦以震川爲歸。年七十五，追溯爲諸生。已六十年，有司循例請重游泮宮，因有句云：三不朽問當立脚，四先生往孰差肩。其寔唐裴諸公，斷不逮其百一也。

擬古

亭亭孤生松，結根山之阿。于雷聳直幹，蔽日交繁柯。下有芝與苓，上有蔦與蘿。年歲條已暮，霜露亦以多。幽人卜居此，松下常高歌。願爲歲寒期，相對鬱嵯峨。青青河畔草，灼灼池中荷。顏色豈不好，秋深當奈何。龍門百尺桐，輪困盈十圍。斲爲絲綺琴，絙以白玉徽。水流何洋洋，山高亦巍巍。鍾期顧我笑，一彈情以移。奈何舍我去，破絃不復揮。不惜絃斷絕，所悲知音稀。郢人泣匠石，蒙莊感惠施。愁來不能語，千古同歎歎。

游天平山歷龍門白雲泉蓮華洞諸勝

夙昔慕臺尙，散髮事登陟。名山志遠游，攜屐探九域。天平況在邇，葱翠望不極。屯雲生層岡，蒙泉注巖隙。壁立石骨露，峻絕苔逕仄。梯空疑無路，攀蘿若可卽。行險心惟亨，仰止道自得。理以澗寂超，境與幽邃適。卽此澹塵慮，奚事逃藪澤。歲宴期重游，眷茲山中客。

讀漢書

黃綺避秦漢。采芝汗漫游。不與賢儒伍。而況辨士流。吾冠幸無恙。欲溺將奚由。姓名落人間。失計逢留侯。鴻鵠羽翼成。徒爲娥姁謀。假館建成所。安呂非安劉。區區具金幣。毋乃溷公不。茂陵慕不死。意與仙人期。豈知巫蠱禍。乃自方士貽。黃老尙清淨。文景所以治。變而談神仙。所見一何卑。我欲見鉅公。岡上如嬰兒。服藥可少病。勿爲妖妄欺。

在漢中葉後。政柄歸尙書。置相不選賢。竄取容嘿徒。流汗婦參語。僂背吏夾扶。扶陽與防鄉。醞藉稱通儒。恩澤列徹侯。媢媢保位俱。威福自臣作。履霜慎厥初。居攝頌功德。後來奚足誅。

厚味實腊毒。高位易觸罪。五鼎食幾何。失意使菹醢。不見葛繹侯。刻印拜上宰。涕泣不肯受。自云從是殆。才果濟蒼生。溘死亦何悔。淺哉曲學夫。持祿不知止。

秦坑灰未寒。士節日以貶。造請公卿間。見笑徒自點。膝席避田蚡。長揖無汲黯。將軍肯臨況。治具吾敢儉。乃公戒牀下。大要教兒調。偉哉平陵朱。願請尙方劍。

持平三尺法。人主與民共。云何武健吏。內深次骨痛。操下束溼薪。一時重足恐。殺人計自安。古法置叵用。天道有神明。好還神所恫。賢哉萬石姬。斯言可警衆。

寄述庵用東坡除夕倡和韻

少小好讀書。未有袁豹半。中年精銷亡。炳燭吁可歎。狗馬子弟習。珠玉兒女玩。樂極恐生悲。聚多終或散。元化以爲門。法喜可作伴。自從悟如何。何暇伐旦旦。惟餘文字癖。欲療醫無案。語辨宋魯訛。文證豕亥亂。吟詩鼻長擁。撲易手先盥。鄉人憎怪迂。古調嗤嘩緩。賞音獨吾子。嗜好同一貫。深入賈君勇。助登激子慳。如何久別離。夜雪誰送炭。當年劇談地。蒲褐闕空館。萍開必終合。井冷行復暖。懷哉曷月歸。願言見此粲。

題黃小松看碑圖

判牘有餘功。訪碑無寧晷。尙友到古人。翠墨雲烟委。歐曾趙洪後。立幟江夏子。古物聚所好。不踉走千里。金薤垂琳琅。收拾斗室裏。憶昨造高齋。清闕爲我啟。香廚一縱觀。如入五都市。畫手數顧陸。絹素那足恃。何期東京刻。真面壁可指。法服儼冠劍。禮器陳匡杙。銀鑿壁流離。甘露木連理。靈秘不能藏。一朝列棗几。奇怪驟難讀。過眼聊復喜。合并知何年。癖嗜略相似。披圖宛晤對。慚我聞履屐。想見手摩挲。比鄰招短李。片石如能言。風塵感知已。謂李鐵橋。

宋徽宗畫龍歌

畫龍古今誰妙手。前有僧繇後所翁。宣和道君亦能事。游戲落筆侔神工。空齋歛忽風雨晦。粉墨黠黠發光怪。陰雲合沓迷高穹。震電崩騰驚下界。一龍天矯胡髯垂。遙空隱現鱗之而。神物變化意飛動。豐隆列缺相追隨。左方題識更瀟灑。瘦金小字兼行楷。興雲吐霧豈有心。欲吸長江濟四海。題云。與天上雲。吸長江水。濟四海。民落天。

下雨凡一十六字。一我聞沛都全盛初。太清樓開收圖書。關全董羽妙蹟在。見宣和畫譜。至尊清暇時臨摹。良嶽山成劫灰速。輿廢一朝如轉轂。五國城頭寒馬嘶。真龍終受泥沙辱。吁嗟乎。尺幅丹青千載傳。烏號去杳竟誰攀。一從曲洧南歸後。寂寞龍顏想像間。朱弁使金得二帝御容以歸

題述庵三泖漁莊圖

昔遊三泖秋正暮。涼波十里浮吳艤。中流塔影插天半。突兀如建蓮花幢。蒼茫葭亂望不極。半篙淨綠流淙淙。漁人此時齊結網。蜻蛉一葉張棹雙。編篔挾罔繫答答。扣舷遠近歌無腔。斜風細雨波不起。時聽野寺疎鐘撞。前塵十載寄夢寐。此意耿耿誰能降。王郎本是湖海客。潛夫作論驚愚憊。清詞雅材追百五。勁筆直擬龍文扛。風塵侘傺不得意。便欲采藥隨老龐。故園況在長泖上。三間老屋開虛窗。維摩十笏塵容膝。却喜面面當晴江。漁兄漁弟還往熟。籬根那復驚花龍。有時一棹乘興去。繫纜竟到枯楊椿。背篷圓笠自攜取。得雋往往窺魚缸。銀絲鱸鱠味不惡。痛飲直倒頗黎缸。但見青芙蓉。九朵遙岑出沒連。空窅一聲欸乃交倡和。有似竽瑟墮簾控。人生所貴在適志。年華晚晚同奔馳。京華留滯幾寒暑。登樓信美非吾邦。披圖舊遊宛在眼。浮家有約無虛唬。拂衣我亦徑歸去。潞河南下挈輕舫。葑中澗上好相待。可許主客圖成雙。

王彙英家藏古錢歌

錢府上士受姓始。我今逃債無從逃。九章綴術亦曾學。不解子母營羊羔。平生最嗜金石刻。鐘鼎款識窮
爬搔。貨布雜品儲一二。如捉贏蛤遺鯤鼈。王生好古今都稷。卜居恰近吳南濠。十年藏弄肯出示。古色班
駁爛錦條。溯初尊盧首作幣。三品後出泉布刀。外圓函方法九府。扣囊底智自六韜。金刀錯出布么幼。黃
新代漢先塗高。真人白水讖已驗。造物終厭蛙聲囂。五銖之廢開通鑄。椒房指爪痕深牢。紀元各各吉金
勒。三司呈樣頒神臬。所嗤僭僞盜正朔。寸涔妄欲驕海濤。世間兒女尙厭勝。吉語宛轉銘周遭。幕文奇詭
難殫述。星官北斗下采旄。雙魚三雀隱龜背。蒼龍糾屈鸞翔翽。或言撒帳取善頌。貴主螯降夸富豪。或云
佩之辟五兵。却鬼可當度索桃。顧譜洪志人所讀。愛而不見空鬱陶。多君聚之在掌握。區別年代分牛毛。
臨川之愚和嶠癖。同牀異夢嗤若曹。阿堵中物如此良不惡。傾身障簾誰營營。孔方絕交吾已久。畫餅差
勝啖白菘。白菘草食之不飢乞君拓文遠相贈。瓊瑤欲報心忉忉。

同王鳳喈過昭慶寺訪學公不遇

五宗誰訓響。清絕有祇林。水月觀空悟。風幡荅法音。我來虎溪下。佛火一龕深。不見維摩詰。悠悠訪道心。
破山寺

竹逕不知遠。四山皆白雲。漸看蕭寺近。杳杳暮鐘聞。聞昔盱眙尉。清時鸞鶴羣。禪房花木在。吟坐憶夫君。
荆軻里

匕首懷中出。諸郎殿下看。燕丹心未死。趙政膽先寒。成敗論人易。從容舍命難。千秋猶灑淚。易水共洑瀾。

壽王述庵司寇八十疊用虎邱酬唱原韻共成八首

八十樂全翁。精神潞國同。西京兩司馬。東海一非熊。玉尺量才正。金鍼度世工。漁庄近三泖。消受快哉風。此叟非常叟。忘年得大年。籌邊雙鬢換。草檄百蠻傳。夜踏金川月。晨炊雪嶺泉。亥章曾未到。都入紀行編。恥作囁嚅翁。寒松雪榦同。南臺冠戴豸。西省掌批熊。霖雨霑濡渥。絲綸潤色工。踐敬三十載。人識曲江風。事業雲霄上。詞章漢魏年。行藏真不媿。福慧兩堪傳。力挽千鈞鼎。思探萬斛泉。分陰猶猶惜。樂府續新編。今古幾多翁。酸鹹嗜不同。道能融孔釋。味欲盡魚熊。許鄭淵原遠。歐蘇著述工。新排詩卷富。肆好穆如風。曹憲張蒼侶。孳經壽百年。千秋斯道重。四海大名傳。共仰星環斗。誰闕綆汲泉。羣英陪杖履。語錄及時編。當代董思翁。聲名壽樂同。三車參象馬。五戲卻猿熊。老學心逾細。詩傳選最工。懸弧冬日暖。入室坐春風。北郭隨肩日。南宮擢第年。青氈慚我倦。黃絹羨公傳。卓立靈光殿。紆餘難老泉。鶴南飛一曲。欲附五羊編。

秋柳和曹來殷韻

極目長條更短條。永豐西角最魂銷。渭城舊恨歌三疊。白下新愁送六朝。零落夜烏啼轉急。蕭疎客鬢話無聊。春來縱說輕離別。尚有濃烟拂畫橋。

贈翁朗夫徵君

縛蕭抱犢自家風。薦牘仍看達紫宮。東國人倫推郭泰。西京儒術數申公。江湖載酒風流在。蒼舊論交意氣同。擬向君山來問字。相從踏遍碧玲瓏。

懷述庵

井梧撼撼下閒庭。悵望同心隔遠坰。舊雨祇令勞夢寐。殘春曾此共飄零。白沙夜月潮聲急。紅葉秋山屐齒停。遙憶五茸雲正遠。折麻何處寄芳馨。

邵伯埭

澤國微茫長綠蕪。薄遊蹤跡感羈孤。疎鐘夜火秦郵驛。官柳長隄邵伯湖。往日漂流悲雁戶。祇今村落足魚租。明朝又下清淮路。媿爾沙鷗宿水蒲。

毛萇里

申培轅固各專門。誰似毛公詁訓尊。北海作箋傳古學。西河製序啓真源。四詩未墜斯人出。千載云遙故里存。太息後賢矜鑿空。欲將部婁廢崑崙。

董子故里

蒼莽長河古木疎。流傳董子下帷居。天人不媿賢良詔。道誼羞稱功利書。曲學公孫方貴幸。助邊卜式早遷除。空談災異真何用。絕倒從游呂步舒。

岳忠武墓

唾手燕雲願力堅。長城何忍一朝捐。小朝誓表和親日。大將圓扉絕命年。雪窖生還虛壯志。金陀論定剩遺編。君王自戀餘杭樂。不獨文臣解受錢。

秋晚訪述庵司寇三泖漁莊因同訪圓津禪院慧照上人卽放舟游佘山適雲間汪西村張坤厚金冶昆仲亦至偕入王氏園登皆山閣久之復至天馬山登周氏山舟堂還抵萬壽道院歸途得

詩四首

石湖乍報范公歸。容得溪翁晝欵扉。菊爲秋深香更厚。蟹當霜後味偏肥。文章真到歐曾壘。經術還傳鄭服衣。一榻高齋留小住。翦燈話雨重依依。

滄江共載米家船。只尺東侬一宿緣。莢泔椒園粗結構。櫻糝竹杖小留連。銀鈎猶榜尙書字。秘笈誰探處士編。頗喜參寥偕入座。麝香且證木犀禪。

客來不速恰三人。天馬峰前共泛輪。杜老酒徒招白旭。蘇門文士得黃陳。山如秋意含冲澹。詩有天機到朴淳。重過山舟舊池館。雪鴻指爪話前因。

行窩隨處足徘徊。鳥語鈴聲次第催。丈室靜繙經貝葉。羽庭留酌酒螺杯。誰能榮世兼名世。公是仙才又佛才。涑水縱題園獨樂。不妨真率故人陪。

尙湖夜泊

微茫雲水自萋述。平遠山光入望低。唱遍竹枝帆盡落。孤篷殘夢尙湖西。

紅橋

竹西十里路迢迢。檻外江南翠黛遙。翦翦綠楊風絮晚。半帆春水過紅橋。

王又曾

字受銘。號穀原。秀水人。乾隆十六年召試。賜內閣中書。十九年成進士。官刑部主事。有丁辛老屋集。

蒲謁山房詩話。穀原在部下極爲陳文勤公。汪文端公稱許。釋褐後。皆以爲當得上第。既入三甲。人猶以秀水朱檢討爲比。後用爲主事。觀彭禮部。又以王儀曹稱之。至補刑部主事。穀原以律例向非素習。且病遂乞假歸。性善飲。淡笑風生。神情瀟灑。雖飄泊江湖。而東南長吏管接者多。賦詩門酒。凡十餘年。卒憔悴。僣蹇而沒。作詩事仿宋人。信手拈來。自多生趣。休寧曹農部自藝選刻其詩。子復再刻之。皆不及十之四五。而審擇未當。其全集六百餘番。予曾點定。今尙存其家。

度盤山嶺望雁蕩諸峰雨止大荆旅店

此邦南戒盡山勢。驅入海。崛強屹元氣。雕劖出真宰。寫下嶺刺天。接眼益嶮巖。攢攢百青蓮。朶朶吐蓓蕾。春空媚雲物。醞藉固有在。應知太古前。猶未混沌改。卒見無急驚。山靈詎相給。詰朝果此游。須鼓腳力倍。姑去夢烟村。稍伺雨聲息。

曉度馬鞍嶺曲折行澗道中從剪刀峰下入觀大龍湫還憩龍湫菴

一蹶道場羹。鏘佩披鶴氅。穿徑雲共飛。躋險鳥同上。東西並谷幽。高下一泉響。泉響方愈寂。谷幽漸生朗。濕烟信黏履。穹翠歛盈掌。微聆鸞鳳嘯。遠窺壺嶠廣。折人最深處。高挂五百丈。近遠無定姿。變幻非一象。直下陂注馬。散迸谿割漿。勻圓鮫人珠。熨貼織女紡。蜿蜒蛟龍纏。空濛霧露放。或爲風所遏。欲俯旋還仰。或爲石所觸。始直中迺枉。或疾若雷轟。或細若鳥吭。絲琯洞庭張。鼓鐘太廟饗。日濃霞綺蒸。壁古虹彩長。頭寒不敢逼。目暈難屢仿。兌說萬派歸。坎習一潭養。虧盈河漢準。消息混沌想。廬山亮斯遜。天台詎能兩。凌流餌碧花。跋石攬宿莽。恂悅匡邱招。踴躍孫狄黨。任運獲貞觀。洗心韞靈賞。移情將所終。警眼遽成曩。聊茲李白遊。未可詎那往。愴彼留衣人。置身猶土壤。蘇有嘉靖間薛方山碑記漫漶不可讀後有七律一首頸聯云有悟不須相對面無緣猶自願留衣蓋徐也

出能仁寺踰四十九盤晚入芙蓉村

亭午露未晞。琳宇花尙滋。廣墀舞天鷄。壞檻臥仙犬。登頓悉奧區。首塗仍峻峴。延晷草逕微。嬾嬾寫蟲篆。磬折始漸高。冉旋復屢轉。盤盤升嶺脊。惕惕凌劍棧。趣苦賞難留。蹟危情莫展。回眺二靈雲。模糊夢成外。日仄狙嘯哀。吞深鳥歌善。藥草含綠夷。瀆魁洩清筧。澹漫墟煙青。陂陀春路衍。雖惜佳景睽。暫止僕夫喘。解裝曬宿雨。脫屣剔荒蘚。稍待芙蓉開。秋風約重寒。

茲晨風日美。散髮啟南軒。浮光蕩烟翠。衆草萋以蕃。水流花復開。陋巷如空山。朝菌發其姿。鸞鳩鳴相驩。物情澹來往。感此娛目前。聚糧適千里。消搖且窮年。會心無可說。緬與莊生言。

言有無何鄉。亦在廣莫野。大樹榮冬春。寂寞世所捨。與之兩無爲。消搖臥其下。不愁斤斧傷。寧戚顧盼寡。無用吾與汝。撫琴心獨寫。

半夜夢方覺。寥寥天籟入。嗒焉見眞君。授我環中法。百年同大夢。彭殤一呼吸。蚺蚺與蝸翼。微形焉可執。曼衍和天倪。邈與溟滓合。夢亦遽遽周。覺亦栩栩蝶。夢覺本強分。幻影安得拾。今者吾喪我。寤言誰與答。元君將畫圖。衆史羅右左。紛然受揖立。筆墨事碎瑣。一史獨後至。忘人亦忘我。僮僮走就舍。解衣槃礴羸。萬事不入心。擺脫衆史夥。是真得畫神。元君果日可。

泠泠七條絃。響澈霖雨中。霖雨有時歇。歌哭安所終。嗟嗟子桑戶。十日斷朝饗。良友暫裹飯。聊充俄頃供。命也知奈何。誰令丁我躬。勸君無廢詩。廢詩亦終窮。

和循初用韋蘇州自蒲塘驛迴駕經歷山水韻

深更坐寒雨。雨歇風亦轉。沉緜話粵遊。紛我離思衍。推戶星稍出。輝輝帶階蘚。葉脫辨疎林。雲歸想遙巘。如何遘良會。盃行較深淺。含愁良易盈。卽事況成緬。暄淒意每餘。去住情各展。何處曙鐘撞。殘燈耿難遣。

趙仲穆雙松水榭

霜氣日已厲。林中辨鴉舅。高軒面蒼塞。曲檻俯清瀏。左右飛雪雲。雙龍盤蚺虺。落葉掃鹿砦。涼烟濕魚笱。颺颺蘆葉戰。忽復響窗牖。水深易秋陰。不覺風雨吼。黽勉歲寒節。誰是同心友。不有短竹橫。微徑焉可取。

借乳巢孳石汎飲西湖晚登南屏至壑莽憩山亭觀磨厓家人卦

簪篷迷於鳥。拍拍出烟汶。一鏡動演漾。千螺堆姪姪。是時殘暑斂。霽景豁臺榭。芙蓉色已弄。茵苔衣半卸。頻來熟壚女。濁酒餅滿貫。剝芡數曩遊。頭顛互嗟呀。沙唇白鷺翹。寺角斜曛射。碕岸散筇屐。荒塗導槩柘。曠如歷平疇。涼風逗穠稔。無田可歸耕。長鑱我安藉。袖寒空翠澆。履濕鳴泉瀉。曲磴升窈窕。短壑迫巖罅。屹嶮猛虎張。肝瞑老蚪架。危約藤欲墜。飛步不敢跨。失道蕭艾間。尋磬獲僧舍。變見南山亭。腳力庶言罷。一片石面削。斗起足驚詫。家人卦誰鑿。力恐巨靈借。淋漓蛟螭纏。恍惕風雨化。當哉白地錦。覆以十丈把。詰屈愛窺幽。彳亍慮催夜。山響孤豎唱。雲破一樵下。湖濱落雁初。林外昏鐘乍。解纜謝山靈。來朝媿塵駕。

園泥

秧鍼雨纒足。新畦宜糞種。南村借釣航。港汶恣翻揖。雙竿舞燕捎。兩手禮鼠拱。縱遠項背傾。拔深腰腳勇。橫撐沙背閣。側立船舷重。亂牽菰米沉。冷觸鷗羣恐。礙渦蕩呀摩。水草拌偏縛。急須咨薙人。駢赤分上隴。

扳罾

漁具首網罟。罾與罟翼亞。千絲罟影張。四角筠枝架。輓索勇雙臂。擎竿夾前胯。欲起翻鷗蹲。既縱迺鳧下。

貯水

挈音聆舴舻。孤颺出烟汶。髣髴綠蓑翁。淋漓傍漁舍。連江翠雨昏。隔籬紅鏡射。冷笑狂奴廉。荒磯坐長夏。烹茶水功六。天泉占其雨。梅雨醇而白。品爭雪水上。五月簷溜簷。丁統幾句響。貧家無長物。差喜足甕盎。翠杓滿傾注。照面恰圓朗。茗葉新未試。石子靜堪養。藏任酒缸聯。立肯醬瓿黨。曷爲老桑苧。但恣山泉賞。
養水須貯
石子於甕

合醬

夏至逾三庚。懸空火輪熱。糴豆揀如金。磨麥篩作雪。爛蒸氣方餽。急拌黃不涅。痛按圓箔穩。涼攤曲房閉。
方結
切沸投鹽瀟澄。汲用井華潔。豔深杷屢攪。簷午笠齊揭。大歲面須對。黃道歷宜許。女醢勿言辛。嘉賓儻流歎。
嘉賓流歎見梁劉
李儀謝贊蝦蟇啟

重五日獨遊道場山卻簡徐穀函

曉榜夾山漾。蒲岸深吠蛤。未傳林際磬。早涌船頭塔。螺髻翳輕沙。雲日遞吐納。泥巷耕犂臥。秧扉蠶婦闔。升籠苔磴紆。到寺風泉雜。山門盡勝槩。曷用衆峰踏。苦茗僧自供。清言竹爲荅。榴朶豔道場。蕭然悅塵榻。意行愜靜便。惜不吾友拉。惟吟坡老詩。罄我三升榼。

易松滋招集抱山堂偶話龍湫舊遊同人輒爲題龍湫宴坐小景余亦繼作

平生邱壑緣。頗笑謝康樂。經行屐齒雙。徧爲佳處着。雁山峙東南。海氣所噴薄。千峰骨瘦聳。寸土必湔削。二靈尤瓌富。外視若郛郭。自非窮幽險。面目罔約畧。龍湫吾耳熟。凌晨勇腰腳。盤迴嵐翠交。迤邐苔逕拓。一登忘歸亭。坐恠巨靈鑿。飛流五千尺。劈面向我落。其上星月栖。其下蛟龍躍。支派析銀河。宮商諧廣樂。於時春向深。雲暖舞雙鶴。漫山繡芳草。踏處皆靈藥。暫容腸胃洗。還就塵盆縛。彈指條十霜。髣髴異今昨。殘春展舊圖。卻顧成錯愕。舉因非戀嫪。觸物逾淡泊。滿座聞琤淙。並荷清風作。爲言諾尊者。終踐還山約。

曉過石鐘山不得泊

空江不聞鐘。清曉續涼夢。黃帽不解事。靈境警焉送。金石首八音。次第若伯仲。茲山胡爲兼。虛牝妙相控。拳然凸水次。形質類覆鑿。竅穴中玲瓏。微風颺其空。水石暗擊撞。元音發一中。此理本坡老。少見恠者衆。我言亦耳食。歸尋水樂洞。

穀日迴谿草堂銷寒第六集訂雨霽郊外探梅分韻得象字

元日到人日。一雨斷來往。今日又穀日。深巷屐齒響。招我擘春甕。磊落間少長。握手出吉語。但飲屏餘想。古蕪茶葉明。芳肥蕙叢養。雪壓色轉深。風恬氣已盎。春早舊年立。梅先一月賞。使恐雨妬花。零落忽一餉。花信遲亦佳。北枝尙倔強。留取作上元。繁花耀晴朗。整頓雙絲瓶。郊遊陪履杖。也勝不出門。癡坐等犧象。蒼苔上下崦。春水東西瀼。梅花如美人。畫之須周昉。時將乞瓜田寫梅花小幅

上元縣齋上元夜雪同用東坡聚星堂詩韻并效其體

沉沉院落調銀葉。卻取春燈換春雪。天公試手聊作戲。誰家擁髻正愁絕。牀頭抱絮薄更撻。閣裏琴絃凍欲折。分曹擘柑春自盃。密座燒蠟風不滅。細啖菜甲耿多憶。牢捧玉船愁被掣。江邊新柳又青眼。墻角短梅幾紅纈。鼓聲十棒想縹緲。茗汁一甌太騷屑。阿香驚笳欲欲穿。素女窺檐笑成瞥。白戰偏教上元續。夜宴不讓南唐說。君勿僵臥頽玉山。海月一輪催老鐵。雪後月甚佳

視豫堂歸自馬蘭峪同香樹先生礬石偶圃賦

至後大雪厚一尺。城西報我有歸艇。莊窩小別歛五年。倒屣相尋濕塗漚。骯髒握手昔顏在。但有新霜欲垂頷。示我新詩代口述。篇篇豁朗絕畦町。憶昨癸丑之冬日。在斗提鞭北走氣何猛。袖中賦草三大禮。蒲牢一吼百獸屏。正逢天子新踐阼。柄用儒術恭摛斑。內外大官共薦剡。明光起草爭馳騁。用而爲虎退爲鼠。抗之則雲抑則井。娉婷不嫁子心惻。俳優而試吾齒冷。銜淚卻跨蘆溝橋。陟險遠上盤山嶺。長城之下饑驅來。夜夜關門虎躡打。風沙颯颯坐懷古。塞草陵花寫莊靚。歸心一縱箭破縞。暫解塵鞿息蓬梗。屋房隙地任鉏菜。架上破書堪汲綆。雖處貧賤聖所恥。獲遭太平生卽幸。何妨韓愈怯柳劉。未見華歆勝管邴。舊雨矧逢南郭合。長驅誰許中原並。臭味差憐投漆膠。英雄終必酬牲鼎。倘嘲鵬鷃恐未然。但逐雲龍定獲請。軟紅十丈急滿被。臘釀方醲須酌酹。

張穆畫馬行

垂楊過雨吹郊牧。洗刷權奇出天育。鐵橋畫馬蓋有神。纖離紫燕下筆親。一匹連錢五色白。一匹拳毛深鐵色。硃矸紛攢白象蹏。蜿蜒迴露神龍脊。春寒宛頸鳴不驕。仰視閭闔方騰驍。良材本合天仗獻。可惜昂藏走荒甸。方今四海盛太平。白首不睹烟塵驚。鐵橋畫此蓋有以。華山之陽在卷裏。我聞此老好劍兼好詩。更於畫馬神工施。乾坤漂泊丹青賤。死後聲名徒爾徧。嗚呼男兒學藝漫絕倫。君不見韋少府曹將軍。冰壑訂遊天台余不果。同行畧述前遊以爲導。

扁舟夜弄鑑湖月。一霎飛帆臨剡溪。詰朝衝炎謁天姥。森森綠樹青猿嘯。雲房澗戶歷百所。石梁未到陰淒淒。呀然一潭吼地底。毒暑凜欲披羔麕。曇華亭上剛一宿。方法丹師教餐玉。醴泉瑤草黯然別。雙闕瓊臺空跂足。天台陳君有仙骨。飽飲赤城霞萬斛。蕭然坐我谿閣頭。盡日千峰環破屋。炎風趣我還渡江。越山點點趨船窗。枯筇惜未支華頂。遠夢迢迢今莫降。故人相約穿芒屨。我被塵牽俗難藥。九峰次第挈陳君。第一先登摘星閣。

題林良九鸞圖

瑟瑟空江烟霧滅。風漪百頃鋪纖葛。漁父不響欸乃空。忽下前灘幾堆雪。畫工之畫真化工。水禽不與陸禽同。直從第一數至九。一一變相無一偶。寫秋更得秋性情。色是秋色聲秋聲。插以或作陂塘夢。引吭或

效鴉軋鳴。戲水或孤颺。脚魚或雙行。或點孤高類野鶴。或矜娟秀如春鶯。疏雨欲來蓮葉暗。小洲初落蘆花明。良乎良乎爾從何處得。此熊髣髴金沙港口。停船對竹篙。撐動忽驚回。飛上青天與人背。又記富春江上挽舟時。一行遙下嚴光祠。漁梁無人曬還落。斜日微風吹釣絲。眼前好景畫不得。脈脈篷窗空歎息。今朝見畫憶前塵。惆悵雨簑與烟笠。緝素漠漠開湖瀧。蔚然幽夢飛吳艤。醒來卻臥空堂裏。涼月一庭秋滿江。

次菱道居

一水縈官道。數峰環小村。趁墟人裹飯。畏虎客關門。殘照依林滅。寒鐙背雨昏。平生幾緉屐。欲共阮孚論。涼夜

暗葉兼風響。陰蟲得露嘒。秋生羣暑澹。月出衆星低。紅藕飄江院。清砧動夜閨。鄉心併涼緒。任醉不成泥。簡玉李

雀航南畔酒壚旁。小別忽忽醉暫忘。豈謂春風孤見面。翻令江水等迴腸。鶯花不屬張三影。煙月多銷脫十娘。莫管秦淮簫鼓動。燈船讓與別人狂。

酬桐石

寒影蕭然簇一鐙。雨峰應怪客來仍。稍緣病退秋情健。不爲涼多酒力勝。小技文章那制命。中年須鬢欲

飯僧與君且話通宵雨。如此溪山捨未能。

春雨次陶篁村上舍韻

如絲風外颺纖纖。早晚丁紉響畫檐。芸餅衾稠春夢擾。杏花樓閣曉寒嚴。時窺吹沫魚浮沼。不放銜泥燕入簾。除卻緼袍無可典。尋常酒債任頻添。

冒雨汎西湖小飲琴鶴棲

不見跳珠又四年。衝寒仍放總宜船。暫閑塵海鞭驢手。重數旗亭買酒錢。野鴨避人歸岸嘴。官梅迎臘出墻肩。東風幾日還晴色。來看雙峰翠插天。

湖海詩傳卷十七

倪承寬

字餘疆。號敬堂。仁和人。乾隆十九年殿試第三人及第。官太僕寺卿。

盱眙縣懷古用杜工部九成宮韻

盱眙南山湄。泗城浸如白。雉堞低迴環。流波蕩缺口。城心蠱浮屠。晃朗存戶牖。想當水未滌。山城大於斗。洪濤傾天吳。巫支祁駭走。遂使婦子居。竟作蛟蠃藪。導川順水性。神禹功不朽。水由地中行。妙用傳希有。後乃違厥度。湮水水失守。宣防英喆能。法鑒千載後。長空松風迴。憑軒惆悵久。掘地伊何人。注海重搔首。

胡紹鼎

字雨方。孝感人。乾隆十九年會試第一。官至監察御史。有所存集。

靖果園先生輓詩

大用窮經得。高言實事餘。哲人今已沒。論者復何如。若祭當於社。將傳信此書。顧瞻思往路。霜葉曉風初。

同陳雨齋劉秋巖小集

翰君健筆大如椽。意氣稜稜逼四筵。譚興可能通乙夜。詩豪不減似丁年。更邀明月當三五。卻買春醪足

十千。此景憑誰收拾去。一船書畫米家顛。

長途車馬自紛馳。比歲相依借一枝。又見春風吹碧草。偶傳流水上朱絲。他年相望仍勳業。往事追歡易

別離。幾度停杯還更酌。人生同此識襟期。

朱筠

字美叔。號竹君。大興人。乾隆十九年進士。官至待講學士。左遷編修。有笥河文集。

蒲褐山房詩話。竹君昆仲。早登高第。並著才名。而君為自眉。兼綜經史。精求古義。家積書數萬卷。金石碑版。亦數千通。尤喜汲引人才。輒軒所至。必按諸生之雋。異授業門下。家居問字者。滿堂滿室。君豐頤多目。伉伉鏗鏘。常以李元禮。范孟博自況。公卿中。惟劉文正公。愛其學業。稱為小友。其他貴人。招之弗往。為女翟學政時。奏請將永樂大典中人。開罕觀之書。悉為鈔錄。且求天下遺書。四庫館之。未嘗有所討論也。其後于文襄公。選用翰詹科道。及中書部曹諸臣。先後至數百人。君雖列名其間。固未嘗有所討論也。年僅五十。病歿。而卒。平日文稿。皆以草書書之。且塗乙十有七八。子弟不能辨別。故取其明晰者。刻成四卷。餘皆藏於家。

平定準噶爾恭紀

四言詩百韻 謹序

臣伏見皇帝陛下。六龍時乘。德與天一。四表兩聞。無不周漑。御極以來。奉皇太后。再巡盛京。謁三

陵。展孝思。東升泰山。幸闕里。以祀孔子。南巡江浙。躬省民事。皇哉大禮。備物未嘗有也。金川小蠢。

卽殄。卽平。乃者準噶爾部。僻處西荒。世其凶德。皇祖皇考。張申撻伐。不訖于誅。天厭厥類。其孽子

喇嘛達爾札。暨亂臣達瓦齊。更相篡竊。虺蜴荼蓼。厥部離心。時則台吉車楞伍巴什等。暨阿睦爾

撤納等數十萬戶叩關乞降。天子爲幸熱河，莅而享其人，飫沃謹呼，同請效命。皇帝神謀天斷，乘時發機，乃命將軍出師討之。卽用其人，道師前行，西北兩路，同日迅發。千軍萬騎，馳越乎翰海，若噉沸雪。若風剗草，自克烏梁海，至于阿爾泰山，梁更數十部落。台吉宰桑，厥角恐後。我師入于伊犁，降青海叛人羅卜藏丹津及其二子，又獲逋酋巴朗孟可等，悉俘以來。師涉伊犁河而西，標山趾川，掃閭蹈壘，用夜入其鄂立土營，賊兵負山面澗，自相驚蹂，追擒其帑，屬部人達瓦齊，以其子及數十人走和集斯伯克，盡獲之以獻。捷聞，皇帝躬至太廟，徧告郊社，陵越名山大川，羣臣請上尊號，不許。乃以吉日加上皇太后徽號，爵勳賚功，周布恩澤，與天下大幣。俘至獻于祖社，皇帝御午門以觀。辰旂豹罕，球鏞鐃鼓，飛揚鏗鏘，百秩序進，咸頓首賀。臣伏念易稱高宗般之盛，天子其伐鬼方，三年而克之，若是難也。小雅詩人欲張大宣王之功，曰薄伐玁狁，至于太原，若爲荒徼絕域之辭，所以震蕩心目，刻畫金石，然或遲之三年之久，近在晉國之地，猶且照曜方冊，其烈燦然。至古所稱王者之師，不戰而屈人萬里之外，蓋有其言而無其事。今準噶爾去京師，尙不啻萬里，出師不逾二時，不見一鋒一鏃之遺，而大功克奏，聞師入伊犁之日，椎髻之婦，未亂之童，望我旗纛，若慈父母。惟皇帝陛下，神聖文武，天之所授，日麗靈發，飈靈雨甘，百神效職，惟所左右，誠非尋常所得擬議萬一者也。臣僅作四言詩一篇，竊欲準古經義，覃思極精，所以導揚天子之光明，式

于世世其詩曰

皇帝聖德自天受授。風霆在左。雨露在右。惟四十年。蜀徼蠢聚。煽其蝥賊。內訌外媾。皇帝命相。一撻十仆。父子面縛。乞命邊垓。準噶爾部。西極是守。人孰信義。若羣鳥獸。聖祖獵之。朔漠三狩。世宗命將。再彈再設。策陵有子。非種而戮。不如鳥鼠。相同相鬪。是召亂臣。達瓦齊寇。通名天朝。不自寢陋。甘其下人。以飽鴟噶。諸部瓦解。呼天內附。皇帝曰。嗟。汝遠無告。宅汝予所。飲汝予糗。享之熱河。厥長賜綬。咸拜獲命。死曷以報。皇帝曰。吁。渠魁可宥。將軍出師。來者爲副。伐罪去疾。往哺而穀。十九年秋。帝謁祖考。以禱出師。惟列聖祐。天策旣發。西北兩道。師行三十。其里萬數。乃賈詔書。壯士馳驟。所過部落。山川巘岫。譯長宣布。咸使聽觀。各逐汝草。各收汝畜。除汝敗羣。安汝老幼。無驚王師。駭鹿激驚。乃聞乃來。若渴飲酎。跋海踰嶺。集賽是蹂。台吉朝迓。宰桑晏候。奉上玉盤。膜拜獻侑。弋不舍牲。耕不改耨。台背而扶。垂髻而走。草榮木長。雞拊犬吠。僕我王師。踴躍邂逅。旆旆大纛。長途不畱。天風吹颺。五采繪繡。沙漠萬里。如行中雷。無警其營。無頓其宿。不戮一人。不遺一鏃。直捭伊犁。諸部盡收。逋餽旣繫。叛藩自首。賊酋顛倒。無所竄伏。小狃大咒。獵取自寶。三捷上聞。告廟用祝。陳設圭瓚。奉册進讀。皇帝躬入。潔齊盥漱。曰。自我祖。萬邦是揉。太甲長弓。垂法嗣後。惟茲大勳。尙率由舊。用牲于社。上帝類造。神靈盼饗。福應來湊。山陵峨峨。遣皇子赴。登降執禮。觀于堂構。羣上尊號。謙讓至又。聿以吉日。奉皇太后。崇號純禧。金册玉鏤。乃坐正殿。受羣臣朝。詔告天下。自海丕冒。

五公四侯望秩燎標。高爵厚精。功大必售。晉秩有位。升俊教胄。存問禁獨。讖嶽平復。蒼廢決滯。剗瑕剔疾。恩澤三十。莫不周究。爰以俘來。牽頸袒肉。左命于祖。右社告奏。帝登午門。日出當晝。饒轟戮伐。金石撞扣。凱樂大作。曰俘是受。司馬司寇。百職咸具。頓首上賀。拜舞衣袖。雷電軒豁。乾坤明秀。皇帝大德。上與天茂。長養萬物。日月所透。至誠感通。各得中孚。皇曰念哉。與天下穀。皇帝大法。經緯宇宙。始金終玉。高成深就。配于文命。上刻岫嶽。皇曰勗哉。與天下裕。皇帝大武。止戈獻豆。爍爍黃鉞。孰敢叫吼。有不恭順。視厥頸脰。皇曰戒哉。與天下懋。皇帝大功。亘古莫較。東西之廣。南北之袤。帝不能羅。王不能囿。皇曰敬哉。與天下富。皇帝大孝。撫龐浹流。萬國合歡。四靈爲畧。以天下養。極于載覆。皇曰康哉。皇太后壽。小臣頌德。舉一萬漏。取辭不文。竊比史籀。

寄王羽仲

山葵傾當陽。水禽鳴在陰。萬物感同類。況子相知深。平生負奇氣。往往走嶽岑。猶憶戊辰歲。溽暑方淫霖。我擬文通詠。子和尉氏吟。安知後離別。會合常森森。恨無三萍合。思發二鳥音。放蕩爲奇文。真至乃古心。三正一以下。江河日浮沈。勿爲小人歸。庶幾君子林。

哨鹿同江岳南同年作

古塞八月霜嚴威。天風發發妃呼豨。雲荒葉脫木不飛。哨鹿之制傳行圍。木蘭以北山崔巍。野鹿乳字交。

匹妃。杈枒環角頭。則頤。圓花遍體毛鬣。鬣。銜草相食。鳴相依。歲歲游牝羣。無遠。此時帳殿漏依稀。寒星錯落宵未晞。虞人鹿冠衣。鹿衣。先導天馬驅駢駢。期門左右挽玉鞮。昉分壯士密指揮。赤燄照山山夜暉。猛獸惕息逃。嶇崎。嶇嶇。大谷人迹稀。哨聲宵鹿窮幽微。鹿聞相慕如歔歔。什伍來卽疑乍非。須臾躑躅不願歸。處處伏莽窺以睚。百得一失防幾希。壯士前搏若括機。血管生取利刃剗。若咀芝英華之噉。肉中寶玉天然肥。仙人之饌神福祿。陛下永命無疆祈。作詩紀實匪雕幾。奏之樂府陳帝畿。

翟灝

字大川。號晴江。仁和人。乾隆十九年進士。官金華府教授。有無不宜齋藁。

蒲褐山房詩話。晴江詩以清峭刻琢見長。蓋與杭董浦金江聲厲樊樹輩爲兩屏詩。其故風格似之。居杭城東北臨江鄉。附近有百年老棠樹。遂取甘棠名其邨。邨民咸以蠶桑爲生。不知有習舉子業者。自晴江讀書取科第。子是其弟。涵心淵瀚。元洲謝傳霖皆以能詩稱。臨江淳悶之俗。變而澤於詩。書矣。晴江見聞淹博。又能搜奇引辯。所撰四書考異。爾雅補郭。通俗編。貫串精審。爲世所推。又爲湖山便覽。亦有資於游者。

題吳東壁梅屋勘經圖

離騷忘却梅。姑第勿深議。皇皇甲庫書。梅花並遺置。焦氏亦有言。折枝及零蒂。易理僅旁參。未足補爻繫。書詩禮春秋。時或見一二。和羹商鼎用。標期召南識。加籩桃並掌。作雋李同記。言梅但言實。言花則有未。幽芳詎無取。乃爲聖賢棄。先生擁遺經。小屋擅清閤。屋內萬編齊。屋外萬花萃。疎影立亭亭。寒夜伴無寐。

研朱事謁點。草木不遺細。將何作解嘲。令彼聲價貴。吾聞梅與杏。轉變由他氣。梅至北方則變而成杏。故北人無識梅者。們益新語。云。櫟橘不踰淮。斯理乃一致。先王辨九州。荆揚畫百至。庾嶺羅浮山。版籍不會隸。蠻鄉烟雪深。寂寞語生翠。孤花自開落。驛使無從寄。嘉實載羣經。恐亦異族類。爾雅釋梅三。日柎英與槃。一一考名狀。皆非今所謂。總之古聖賢。多在江北地。南枝未經見。遺却直閒事。斯言雖淺近。或可析疑義。

寓齋鄰樹足供朝夕玩賞遂以嘉樹顏所居柯南墀孝廉善之同賦十韻

畸人擇所棲。達士隨其遇。偶比三宿桑。難待十年樹。城南舊客寮。林木饒古趣。高顛出重垣。繚枝遠敷布。不費買鄰錢。我獲東家住。餘翠隔簷分。落影當窻赴。涼風對散髮。靜月愜良晤。乃知假物用。在在理流露。劃然人我分。坐爲欣感誤。不見種樹人。息陰幾朝暮。

曉發滕縣

匆匆旅宿先鴉起。敲鞭直走二十里。數望東光不寫明。殘月殘星墮遙水。馬頭續夢夢思淺。戍壁畫人驚睡眠。槐眉列道見模糊。名蹟愁從暗中遣。有木榜題滕文公行井田處長風浩浩烟漫漫。平沙遠草征蹄寬。郊圻曠闊有如此。分田畫井夫何難。

禁體詠雪用東坡聚星堂韻

重雲凍合難分葉。紉雨隨風暮成雪。霏微數點吹未覺。顛倒滿空來不絕。充畦占壤失低坳。累砌加簷隨

曲折犬聲吠巷狂亦喜。馬蹟翻泥過旋滅。積團漸重忽并墮。斜點欲來仍反掣。紛紛互鬪逞威稜。一一詳看裁細纈。潔身方幸我非孤。擇地誰知爾未屑。關門任打竹聲頻。登樓怪換山形瞥。方圓無定却齊輝。南溷胥安不虛說。小堂僵臥獨推思。一任夜寒衾似鐵。

曉起雪止再用前韻

夜蟬行沙蠶齧葉。浙浙聲蠶駐勻雪。來朝俯仰但一照。抉背平原叫曠絕。寒花逞姸態橫陳。穉竹學恭腰屈折。冷壓廚烟濕不起。淨奪山嵐微欲滅。遠人著屐路新斫。密座垂簾風屢掣。但恐斑痕化愁鬢。卻愛晴光除醉纈。半壁猶然聚完塊。一林忽自散餘屑。冷尋未厭驢背苦。久滯翻憐鴻爪瞥。收藏試遣家童掃。占驗頗聞鄰老說。十斛憑將溼毒塵。歸向春田理耕鐵。

周心羅解元惠赤刀筆

中山老兔中書選。蒙將軍始傳分明。棗心栗尾束縛巧。象牙鱗角裝衍精。或青或白或五色。棗論各各隨花生。何來管城倍光價。顏如渥丹魚尾頰。赤心紀事義有取。豈徒文采矜華榮。其尖如錐利如劍。審象直惟文庫兵。諡曰赤刀著深刻。寶國遂與球圖并。我聞彤管職女史。又聞丹筆正祥刑。一雙日並隴麋賜。官儀復載東西京。有明尙方仿古製。元默困敦紀所成。管刻壬子年製小印文工名未見勒蔡澡。產地不貴來宣城。燕都宏規勝國建。其間五度辛壬更。米脂賊至逢壞劫。九藏珍費歸軍營。棄此槁竹不捆載。得留故府全清

貞昭回文治視今日。朝宁翔翥名公卿。尙書郎挾紫囊裏。侍御史歛緋袍擎。君有言動鐵筆記。臣有註誤霜鋒爭。君明臣良庶事舉。拜手稽首颺言廣。赤刀赤刀如此用。庶幾有實非徒名。公今蕊榜先一鳴。脫囊已出頭嶢嶢。玉堂薇省咫尺路。合珥此筆趨皇闕。脫手贈我殊不稱。塗雅屈虬空縱橫。攜歸寓舍窗几窄。瓦池竈墨交惶驚。跋奚喚作赤龍小。家老愛把珊瑚輕。善刀而藏俟時用。緹襲不許人窺鏡。答詩仍遣草根筆。神氣正盡疲糖撐。

邨中晚興

所居地幽寂。薄暮客來稀。一徑吠寒犬。數家鳴夕機。廚烟補山翠。林篠暗柴扉。踢葉忽聞響。鄰翁散社歸。

金慎齋比部出關圖

萬歲龍蟠地。山河控勢雄。明駝宵臥雪。健鶴曉呼風。樹斷天關出。沙平地界空。未能乘一障。枉自嘆途窮。

吳江

垂虹亭畔月。暫照木蘭船。秋老蓴鱸國。霜寒橘柚天。鶩飛烟路闊。人靜水花鮮。緬想三高士。披吟笠澤編。

秋草

關心河畔草。極目水邊洲。白露年年節。斜陽處處愁。啼蛄弔幽夜。牧馬散高秋。欲起靈均語。芳蹤何處求。

秋蟬

何人信高潔。徒爾愛孤鳴。秋杪不知歇。夕陽無限情。殘音移樹遠。微思入霜清。我亦蘇門客。臨風嘯一聲。

偶步東園

列隧千重比戶饒。閒身端合避浮囂。桑畦遠隔人家小。菜甲平連雉堞遙。東郭自來堪踏雪。南湖好在復通橋。邑居仍作荒郊看。林下何須杖策招。

丹陽

寒烟渺渺接南徐。形勝猶分故國餘。岸口人家皆種柳。船中客饌每供魚。鷗沙清況愁先遣。萍梗浮蹤計已疎。宛轉回腸忽關聽。羈孤聲在獨輪車。

糊室

十字編稌粘。雙層拓繭箋。輝開屏六摺。塵斷屋三椽。抹粉辭江蜃。連衣效壁蠶。油窻花影密。虛室貝光鮮。目眩樓成玉。宵明窟擬瑤。開爐防雪化。掃榻詫雲眠。敗堵周藏拙。寒風頓失權。潔勝香氎布。煖敵紫茸氈。戶有綿簾設。牀還紙帳懸。贅疣除畫障。黠污卻春聯。啓竇仍通月。張鐙莫惹烟。憑噓賣餅俗。不怕潤梅天。帙整籤相映。茅疎屋未穿。土風循儉素。吾計得安便。塞向隨狸塾。攤書共蠹研。詩成防自疥。休逞醉中顛。

湯婆子聯句

湯媪范錫成。戴廷燁利用異鼎鑊。質符坤永貞。汪沆名媿巽初索。皤然腹彭亨。金文淳宛爾肩戍削。竅上

犀口絨江晴砥下夔足斫旁無獸環垂掌頂有螺髻著混沌失眉蛾西光澤謝面藥居下適陰義夫爲燠協

時若外礪金性堅江晴內涵水德弱胡氣戒頑冬掌霜信人重幕獨客寡所依西單栖每不樂悽劇號寒蟲

夫凍憐警露鶴宵長鷺足拳江晴夢短蝶羽却鞍塚忽到踵掌蓋戾漸如斲朴握煖莫邀西辟邪香易鑠愛

茲廓能容夫昵汝重可託飲以百沸泉江晴裹以千絲縲熨體同衾綯掌橫陳附履屨相傍何蘊隆西相假

免焦灼微陽欲透繭夫奇溫匪隔膜美睡勝蒙頭江晴沉酣抵軟脚婦姑戡勃谿掌法喜伴恬漠客遠昵枕

嫌西兒防踏被惡轉側便醉鄉夫挹注授僮約老忘燕玉需江晴遠任驪泉涸溫柔縱難兼掌貞靜已能略

鉛淚制不流西金銘擬無恠敬傾伏本盈夫缺窳虛在薄紈扇遭棄捐江晴竹奴悲冷落策勳薦牀牀掌怙

寵戒莫莫三沐三薰纒西一詠一觴各蟄戶恰合并夫炙硯供笑噱聯吟繼前修江晴涪翁斐然作掌

平聖臺

字瑤海號確齋山陰人乾隆十九年進士官廣州府同知

琴城課士圖

盧君吏治天下稱治緣儒術匪空名西江捧檄舊同隊我爲臨汝君琴城歲時扁舟詣大府停橈把臂銀
杯傾我隨鍾潘登啓事君以循卓忻同升江湖旅雁落隻影吉安大郡迎雙旌十年衰墨臥草上敢與八
駿爭先鳴長沙新隴痛車過潘上海丙舍愁空鐙鍾聞君干旄遍郊野坐徵文獻恢庠爨忽牽吏議呼對

簿。虞羅直欲烹鷓鴣。白門僧舍笑相值。高吟岸幘方崢嶸。牛腰大軸在行篋。南豐遺愛留諸生。至今歷宦到銀艾。不忘下邑絃歌聲。開圖彷彿見都講。題句磊落鏗華鯨。定爲朱邑起祠廟。已看何武躋公卿。青蠅至竟不可玷。行當特詔膺藩屏。刊江鱣使盛賓館。矧以嫺姬聯簪纓。移家暫借水部屋。選勝屢醉康山觥。紅氍白雪不暇顧。更迎坡老尋詩盟。悲秋旅客亦何有。酬知老骨猶孤撐。匠石程林赦山木。鉛刀代割羞青萍。送君更望崇明德。終賈盈朝盡秀英。

自臨川至崇仁道中

林端雨霽散烟鬢。水抱村扉綠一灣。却忍朝飢行十里。笋輿才過米堆山。

蔡書升

字漢翔。德清人。乾隆十九年進士。有聽雨詩稿。

梅花嶺懷古

元戎纔建纛。南望陣雲高。局上爭殘劫。韉中置佩刀。杜鵑春自哭。江水夜還濤。碧血知何處。荒原滿野蒿。

春夜

花陰黯黯夜漫漫。雙穗銀燈只獨看。金屈戌移明月上。碧琳琅動晚風寒。心懸粉冷香銷後。春向鶯啼燕語闌。猶勝去年寒食雨。五更殘角逐征鞍。

訪王葦園遇雪翼日用壁間韻奉寄

飽經客况難迴首。雪虐風饕我獨知。忽憶去年元夜節。紅泥亭下話分離。壬申上元夜與胡雪巖頴上直大雪
日暮雲頭熨又開。粉痕明滅點錢苔。小虹橋外溪如黛。三兩漁船打網回。

葉佩蓀

字丹穎。歸安人。乾隆十九年進士。官至湖北布政使。有傳經堂集。

潘弼山房詩話。丹穎。覃心易理。獨契微言。著易守四十卷。凡昔人所言象數。如卦氣。及辰納甲。飛伏。升降。先天。河洛。悉掃去之。惟互卦。間有取者。即陰陽老少七八九六之說。亦所不取。勃窣理窟。多前人所未逮。詩其餘事也。予同年工易者。應山張君鳳鳴。及君二人而已。張深造自得。尤精於筭筮。由邯鄲令官至交州府知府。乞歸。今尚主漢陽書院講席。不闌吟事。故附志於此。

望瑯琊山欲訪醉翁亭不果

滁陽青不盡。山郭交相鮮。連峯亘西南。空翠紛聯綿。瑯琊隱其內。彷彿浮雲烟。及茲迴俗駕。屐齒阻層巔。遙憶六一翁。高致留林泉。危構架幽壑。飛瀑落門前。荇石既葱蒨。釀溪流涓涓。閒逐名僧舍。時勞載酒船。松竹一瀟灑。嚶鳴方寂然。西問見梅亭。香雪當春妍。繞亭千菌萐。卷葉小如錢。昔遊久淪沒。仰俯失夤緣。悵望更回首。野風吹帽偏。歸尋醉翁吟。臥遊託冰絃。遠慙太守樂。近愧博士賢。

正陽關

已入江南地。開顏望水關。孤舟清潁尾。疎雨壽春山。行路此身賤。謀生吾道艱。一聲柔櫓外。卻愧白鷗閒。

宿淇河田家

柳陌初歸鳥。松扉暫解鞍。真從田父語。莫作使君看。窻斷聯蛛網。床喧近鴨欄。羽書方夜急。棲息敢求安。

桐柏道中

柏子何年國。蒼荒接楚邱。村纔三戶聚。族少百年留。計畝秧論石。桐邑小田畸零不成頃。畝以種秧之多寡論價。開山樹架樓。尙

憐生聚苦。更忍急徵求。

謁淮瀆廟漢延熹間遷廟於此

漢時千年識。故封復陽山。郭觀齋宮。三川波合徐揚。唐開元祠淮瀆文蕩滌三川。四望壇齊海岱崇。宋元豐立四望

海岱沂並在東郊蓋禹貢海岱及淮惟徐州地也。門對金臺凝積翠。沙沈鐵匱護靈風。禹導淮沈鐵匱以鎮水怪在縣東十里淮河內人有觸之者輒致暴風雨。重憑

盼蠻邀神貺。疵癘全消稌黍豐。

自南陽赴新野查視軍臺午憩林水驛館見庭宇清幽雜蒔花竹秋桂二株

河灣古驛繞雲莊。日午停驂問草堂。甘井延齡徵故事。小山招隱對幽香。農經細共高年語。社酒忻逢樂

歲嘗。愧爾春陵風俗美。迂疎真忝漫爲郎。

自固廟鎮探淮井歷大復山而東峯巒環繞淮流清淺從中至淮河店漸廣境與隨州相錯

楚天秋淨鶴飛回。繚繞行穿翠碧堆。一線波盪江北去。百重山壓漢東來。沙邊虎跡新晴見。樹杪猿聲薄

瞑哀更指吳雲話歸路真從陽口片帆開。

贈大梁張道人

隻影飄然淡世緣。赤松子後散神仙。休糧并絕燒丹火。施藥常傾賣卜錢。戶外高軒寧識姓。市中老父不知年。紅塵何處尋雲臥。良岳遺邱小洞天。

襄城

路轉青山楚塞分。孤城臨水碧沄沄。六王故塚埋荒草。七聖迷蹤指亂雲。園樹陰濃黃鳥隊。汀荷瀾漫白鷗羣。潁陽幽賞真堪隱。愧遣塵纓濯縠紋。

乙未歲除

瞥見桃符覺歲更。官居如水晉陽城。牆根雪自經冬積。髻底霜從幾日盈。嘿數行年周太乙。今所傳洛書乃太乙九宮位也。其數四十有五。漫逢佳節祝長庚。尊前且幸忘先後。獨酌屠蘇對短檠。

題紅心驛

一天梅雨晚蕭蕭。十里蘋香萬柳條。小巷匆匆乞漿去。涼衫渡過赤欄橋。

雨夜宿廣陵

淡雲披拂幾長條。日暮雷塘半落潮。正是行人愁絕處。蕪城細雨近花朝。

白苧春衫雨乍零。隔船燈火幾星星。一聲水調吳娘曲。五度江南未慣聽。

沈業富

字方穀。號既堂。高郵人。乾隆十九年進士。官至河東鹽運使。

蒲褐山房詩話：君性情醇厚，篤於友朋。武進黃仲則過河東，留之賓館，病中哀其諸作，抄錄成編，俾無遺佚。又風峪有北齋所刻華嚴經，爲竹垞太史求而未得者，君遣工入山攀搨，得一百二十餘紙。貽予于西安，蓋好事如此。竹西自午橋太史沒，詩壇寥落，君以詞林書宿家居望重，士大夫南北往來，必造門請謁，香山洛社之風，賴以不墜。

永豐寺有感農事

寺外斜陽郭外村。我來時已近初昏。一林黃葉啼山子。滿地青秧長稻孫。過客情懷逢竹院。閒農風味是柴門。一年辛苦鷄豚社。容易田家老瓦盆。

清流關

到來絕頂衆峯齊。百里巖關萬仞梯。牛背遠浮新漲滿。馬蹄平踏亂雲低。干戈宋代空殘壘。文采歐陽感舊題。記得醉翁亭上坐。十年陳跡久淒迷。

送秋

向餘爽氣未輕寒。一日三秋話別難。漫說小春時正好。休將過客冷相看。凋年景急愁偏遠。落木天高路正寬。忍負西來當日意。爲隨新雁送沙灘。

有感

荒深庭院蘚苔斑。到處標題感舊顏。落葉半填穿砌井。夕陽斜倚對樓山。敦槃當日爭雄長。樵牧于今話等閒。太息梁間飛燕子。年年春盡尙知還。

渡河

霜鬢添來此日多。謾將心事託烟蘿。疎星曙色分嶠嶺。落日西風湧大河。春到傅岩應作雨。津開茅澗自橫波。吳歛忽起鄉關思。彷彿離筵一曲歌。

次對琴韻

一彈指已去來今。十日離憂抱此襟。短杖未憑詩早到。殘蟬初咽樹交陰。青雲久悟浮生事。白髮應無未了心。便合香山共圖畫。笑他淮海漫搜吟。

題蕉陰默坐圖

晚涼深處葛衣輕。獨向蕉林默契尋。滿院綠天回遠夢。半堦新雨澹秋陰。未遑息轍風塵日。肯負平泉草木心。明發有懷更誰共。坐牽題句憶聯吟。

九月六日余禮耕羣玉山房讌集次瑤圃韻

沾來衫袖酒淋浪。乘興還教更舉觴。華髮心情非少日。晚花風味是斜陽。燈前詩卷從新讀。霜後園蔬取

次嘗莫訝深宵飛醉墨。老年行樂更無方。

曹學閔

字孝如。號慕堂。汾陽人。乾隆十九年進士。官宗人府府丞。有紫雲山房詩鈔。

蒲褐山房詩話。慕堂性情誠樸。雖由詞垣。盡諫歷任京卿。未嘗榮心華靡。暇輒與二三同志。游潭柘戒壇。界入田盤。諸朋輩策蹇從。冰雪中來往。見者謂是神仙中人。也。作詩恬澹自然。中議論英特。非依仿格調。以爲之者。君歿後。令子御史錫齡。戶部祝齡。表彰不遺餘力。故朱尚書石君爲墓志。錢少詹曉微爲神道碑。翁鴻臚。覃溪爲傳。其見重於時賢如此。

和王述庵同年鄺淇若硯

淇若名露。漁洋山人所謂海雪畸人。死抱琴者也。工各體書。亡命入廣西。尋鬼門舊跡。又爲猿女。執兵符者。雲鞞娘記室。歸撰赤雅一編。以紀其事。其詩名嶠雅。手自開鐫。甚工。此硯鐫天風吹夜泉五字。又淇若二字。并朱明洞天小印。今爲述庵所藏。

良硯古所珍。奇士世罕有。二者常相資。米老石爲友。王子眞天才。瑰奇少匹耦。文章荷主知。屢試輒居首。所寶一片石。云出鄺牛手。曾以草檄文。軍令嚴干振。南入鬼門關。瘴鄉爲祭酒。指顧生風雲。羣獠任犬吠。倚馬得千言。與腹兩無負。寂寂百年餘。落落埋塵垢。君得自何年。寶光騰戶牖。娛客出藏珍。瑩然置燈石。能使筆如錐。能令墨如黝。斑剝有文詞。依稀蝓與蚪。黃琮白琥姿。儼若玉色剖。滑潤如波濤。水接蟾蜍口。由來自海雪。畸才洵非偶。得之重什襲。珍之若佩玖。淇若鐫其旁。不比淮父卣。攜此事從軍。遂成三不朽。

溟海與蠶叢。八年勞奔走。想當決策時。筆勢變螭螻。指揮盡如意。掉運儼食母。賴茲研磨功。執訊獲其醜。上將遂蒞勳。禮成勞郊藪。弱質耀戎裝。書生誇赴赴。酬庸晉顯職。卿月崇班九。因君硯益光。寒芒逼星斗。乃知世尤物。能用在能守。昔日佐雲鞞。僅僅免覆瓿。何如逢清時。得與俊又厚。不願石鄉侯。但願名垂後。坐令金沙江。風恬波瀾瀾。歸來雨雪霏。依依念楊柳。夜窻擁紅爐。意不忘堂阜。同心三五人。賞之樽貳缶。此硯多奇緣。用之更勿苟。願成平蠻頌。鐘鼎同永久。

書王芥子前輩涇渠志後

史志重河渠。經術通治體。須用讀書人。尤貴識時士。我讀涇渠志。歷歷如聚米。鄭白在當年。豈不稱利美。奈何後世人。尋源不究委。古今既異宜。山川亦移徙。但知耀其名。不復問彼此。遂使好事者。披圖費條紀。嗟哉萬夫役。那堪試疑似。百萬口嗷嗷。一人功自喜。壘壘涇渠岸。巍巍豐碑峙。唐宋及元明。利害俱可指。徵引既淹雅。識力尤俊偉。上下數千年。分肌而劈理。洞達古今情。匪侈言導水。不利以爲利。其利斯大矣。我生清晏時。竊自愧愚鄙。歷考利病由。較然著前史。紛更熙豐朝。非不用周禮。清靜載寧一。其言出老子。厚實與名高。效或相倍蓰。乃知聖人言。長府何必改。勿慕匡時才。勿遺他日悔。願言爲治者。涇渠志誠賸。

狄武襄公祠

飛射蠻氍毹。孳孳孳。穹碑紀績尙崔巍。致身有具從行伍。黥面無妨出將材。談笑從容韜略合。儀形颯爽畫

圖開蕭蕭松柏門堂路。猶似崑崙甲騎來。
故鄉祠貌儼來敵。青史威名世共欽。帳下孫張才孰並。朝端韓富契偏深。大勳屢向巖疆建。浮議休愁末路侵。一種深沈傳智勇。要從慎密識公心。

杜玉林

字寶樹。無錫人。乾隆十九年進士。官至刑部侍郎。

登雅州城樓

大渡河西畫角聲。投鞭撫髀若爲情。空慚司馬能傳檄。漫說終軍欲請纓。春盡林香猶作瘴。雨餘山氣未全晴。關心最是從征客。雪沒弓衣夜斫營。

癸巳六月聞木果木之警

羽書一道報嚴更。鶴唳風聲事可驚。萬里不歸都護馬。諸軍空望亞夫營。狼心自是忘威德。虎口憑誰寄死生。衛國籌邊良亦苦。昨來新築受降城。

昔嶺巉巖血戰時。幾人馬革裹還尸。曾揮露布工籌筆。

趙璞庵王涑田兩君

纔着戎衣便死綏。吳鑑南以直隸州牧試用赴軍營未久卽

遇猿鶴叫雲君子怨。龍蛇犯歲故人悲。倘逢遺僕煩頻囑。莫遣深閨少婦知。

范家相

字左南。會稽人。乾隆十九年進士。官柳州知府。有環淥軒詩草。

維揚

綠楊城郭水初銷。十里秋雲覆畫橋。何事人間最惆悵。月明風細聽吹簫。

薛田玉

字琤叶。無錫人。乾隆十九年進士。官保定府同知。有問澹軒稿。

懷周亦庭太守

治獄如君少。星曹舊有聲。廿年纔出守。六詔尙論兵。菽水高堂夢。風波宦海驚。昨宵書一紙。辛苦念平生。

題朱荅泉讀易遺照

琴書寂寞草堂空。猶認平生戴侍中。早日才名看倚馬。暮年詞賦悔雕蟲。一編寢食梁施學。百里憂思魏晉風。聞說桐鄉今俎豆。莫將經術笑冬烘。君爲大鎮令卒於官。民爲祠祀。

于宗瑛

字英玉。號紫亭。漢軍鑲紅旗人。乾隆十九年進士。官至監察御史。有來鶴堂集。

己丑九月與金香泖山中話別有贈

秋姿澹平野。暮氣起蒼山。林表月旣白。山中客欲還。高情慰愁夕。寒霜下松關。揮手復塵跡。心長雲水間。

和慎菴將軍晚景卽事原韻

天末霜風落虛齋。宕晚陰。小山淒石氣。野菊澹秋心。墨續雙鈎帖。聲尋百衲琴。主人不可及。得句太蕭森。

汪永錫

字孝傳。號曉園。錢塘人。乾隆十九年進士。官至內閣學士。

烏兜驛

客館萬山中。山居趣略同。白沙牛渡水。丹嶂鳥吟風。閉戶疑禪侶。開簾問野童。虔州何處是。不辨路西東。

南安

此去通南粵。雄關地脈分。水流皆碧玉。山嶂入青雲。曉日烏排陣。陰天虎嘯羣。休言風土暖。木葉已紛紛。

游飛來寺

禪宮何事此飛來。造物鍾靈亦壯哉。水勢總趨滄海下。山門長對翠屏開。二禺孰辨游仙路。初祖還留說法臺。不覺登臨動鄉思。冷泉亭畔舊徘徊。

李昌昱

字復旦。號渭川。鄞縣人。乾隆十九年進士。官臨江府知府。有畊讀堂詩草。

偕尹松陵九日登陶然亭。遲曹慕堂不至。聞其令子秋闈得捷。述懷柬寄。

一生合得幾重九。但是相逢開口。故人不見。踰三霜。佳節依然此杯酒。舍南直去陶然亭。萬頃蘆花千樹柳。高興還期直指曹。風雨城邊空佇入。令子當場喜得盧。賀客到門噴被肘。沈吟轉憶十年前。禪燈共耐三更守。今君喜氣鯉庭增。牆角短檠猶在否。我亦棲遲老作郎。舊話休論芻化狗。生平獨數松陵豪。笑注黃金等瓦缶。浮雲去去莫關心。落葉紛紛惜分手。插花歸到已黃昏。脫帽驚看俱白首。明年此會不須約。有酒仍來問升斗。

韭

春園微雨後。新韭夜來長。青翠眞供剪。辛溫別有香。洗根同白薤。留客問黃梁。儉食君無笑。翻令感故鄉。

劉鑾

字殿傳。號公卿。保山人。乾隆十九年進士。早卒。

蘭江古渡

迢遞滄江渡。飛虹百尺雄。雲梯開鳥道。鐵索鑲蛟宮。花色三春滿。雷聲十里通。天威思漢相。萬古濟川功。

周春

字松鶴。海寧人。乾隆十九年進士。官岑溪知縣。

次湘管聯吟韻

無軒之居書連屋。洛如花開傍修竹。倩誰寫此高齋圖。倪王合作聯珠玉。宋芝山爲安邑夫子令嗣陳我
未披圖先展卷。一編寓賞益尊綠。時以寓賞編見貽當年宋卞雨中丞。棠村江村與退谷。後來鑒古孰最精。交口
稱君工品目。聯吟百首壓名流。包萬荆賀胥編錄。想見斯圖景色佳。菊坡瑤鼻洗塵俗。擬之漢上題襟集。
揮毫我獨慚。巴曲風雅如君世所推。共窺豹斑嘗斲肉。讀罷新詩仍誦經。牖外不聽三呼穆。

鄭來祚

字永茲。南豐人。乾隆十九年進士。

入華子岡同郡伯徐讓甫夫子作次謝靈運韻

新秋天宇淨。策杖入姑山。林壑鬱道氣。虛空鳴石泉。頗識靜者妙。轉懷太守賢。攜芳兼采秀。越嶺復度阡。
紅蘭浸碧沼。青杉生紫煙。真人長已矣。此道空蹄筌。流光相代謝。忽忽如彈丸。不見百年內。詎云千歲前。
仙壇雲繚繞。丹竈水潺湲。欲問蔡經宅。臨風徒悵然。

拜李泰伯墓

鳳凰山下路。策杖弔孤墳。地壓雙姑秀。天開兩宋文。水田餘落日。山寺帶歸雲。一瓣平生意。區區證舊聞。

